


曲阜府檔案史料選編

第三編
第十六冊



K829/2

曲阜孔府档案史料选编

第三编

清代档案史料

第十六册

国家差徭上

编辑者

曲阜师范学院历史系

骆承烈

郭克煜

李启谦

孔令彬

张家伟

齐鲁书社

首都师范大学图书馆



20884229

884229



曲阜孔府档案史料选编

第三编

清代档案史料

第十六册

国家差徭上

曲阜师范学院历史系

*

齐鲁书社出版发行

山东人民印刷厂印刷

*

787×1092毫米16开本 20.5印张 2插页 244千字

1982年3月第1版 1982年8月第1次印刷

印数：1—2,100

书号 11206·37 定价 2.20元

编辑部顾问

杨向奎 王仲萃 翟盛奎 孙思白
蒋维崧 殷焕先 庞朴 卢兼三

主 编

张维华

副 主 编

葛懋春 钟遵先 孔繁银
骆承烈 胡明清 苏昭民

凡 例

一、本书所选曲阜孔府档案史料共分四编，第一编为孔府档案全宗分类目录索引，第二编为明代档案史料，第三编为清代档案史料，第四编为民国时期档案史料。

二、本书所选档案史料的编排，依照原档分为明代、清代、民国三个历史时期，每个历史时期内按专题分类，每类中按时间顺序排列。

三、本书所选档案均保持原件格式，一般均原文照录，个别地方重复过多，酌情删节。

四、本书所选档案的标题及标点系编辑者所加。每文标题后面列有档案原卷类目标号和原卷标题，以便查对。标点采用句、逗、顿、问四种符号，只断句，未分段。

五、本书所选档案原件中错字、漏字、残缺字，凡可断定者，用（）号标出正字，用〔〕号补出漏字，用口或〔缺〕表示缺字。

六、本书供研究使用，未加注释。

七、本书用现行简化字排印。

目 录

一、族人优免差徭·····	一
二、府庙属官优免差徭·····	一九
三、公府仆役优免差徭·····	二八
四、船户优免差徭·····	三二

一、族人优免差徭

给丰县族人孔宏助执照为优免差徭事

〔寄居江南各县孔氏族人申请续修支谱（一）（一〇三五）之十二〕

太子太傅袭封衍圣公府为查覆孔族以广

皇仁以普圣泽事。据四氏学贡生孔贞俊呈称，先祖克仲于洪武年间任丰县教谕时，奉 钦取到京，承袭世职。遗弟克静居丰，遵照恩例，守土建祠。世有衣冠之荣，家无赋役之累。迩来族属懦弱，豪民欺轧，恳乞查照 恩例，行文优豁。等情到府。据此，覆查明白外，为照孔氏子孙流寓他处者，俱免差徭， 恩例昭然。今孔宏助等寄居丰县，支流既真，谱派有据。相应照例优免民差，以普 祖泽。为此合给执照，仰本户即将现在户名开报丰邑，除豁丁差， 恩 恩例优免。其地方、里甲人等，不得恃强妄编民差。本户亦须守分耕读，恪守家法，不

生事端，俱勿违错。须至出给者。右给付族人孔宏助等收执准此
顺治八年八月十七日 贞美 尚麟俱此。照阙里帝

武安县族人孔尚浩启为恳请优免差徭事

〔顺治康熙年间孔氏族人请优免差徭（一四五六）之十四〕

具启人孔尚浩系彰德府武安县族人

启为恳恩軫念苗裔俯行优恤以豁里役以光祖德事。切浩等自顺治十年蒙

恩查详收录，准给奉祀生十六名，行文到县，前任赵知县遵依送学，大体周悉。有虎里李蔚天胆包身，把持勒索，竟不除免，百般苦累。浩等无奈，叩启

宗主老爷軫念寒族，咨行该府，复全优豁，恩同再造，永戴二天。连名叩启。

顺治十三年十一月初四日

准行府文

具启族人孔尚
龙从浩安论
奇起道心胤扬节章
玉德兴经

安庆府潜山县申为孔胤衍等请优免圣裔新增人丁事

〔增修皖江世系孔氏支谱卷一（一〇六一）之三十一〕

江南安庆府潜山县为恳查帖札俯赐申详光扶

圣恩事。据本县孔胤衍等公呈前事词称，尼山一脉，光裕万年，山东遗流，遍诸海内。子前朝万历四十七年叨蒙

衍圣公移文，遍行天下。差监生孔贞素、舍人王明玉等文凭到县，比对阙里谱牒相同。查得一枝孔资受饶州府教授之职，流寓安庆路，复迁潜山，历代业儒。后蒙

圣公恩典，查同的确，果系尼宣之后，賚札给付承祠奉祀生员孔尚志，荫袭子孙。申文京省院道，圣公奏朝

恩诏颁行天下，但有谱帖相同者，各县在册人丁一概蠲免，不必撒派杂行差役，并免门面差徭，府县帖札可验。自崇祯年来，不意寇乱兵贼交加，府县文卷俱燬。今蒙编审，新增人丁未援旧例入册优免。切

圣裔优免，亘古如斯。谱帖相同，并无欺弊。恳乞申详援例优免，培植后裔等情。据此，查得

圣裔孔资一枝，住潜，明季以前实有二十一丁，俱经蠲免丁差。续于明末之后，户丁叠遭寇残。鼎新初定之日，止存一十二丁，亦经优免在案。第查节次编审，新增孔氏五丁，原未入册优免。

前值大造之际，即欲照例蠲免。因未奉有

宪檄，是以不便开造。兹奉清查，随奉孔胤衍等通户具呈前来，合应请乞

宪慈，垂念先圣后裔，俯将新增五丁照例入册优免。庶孔氏子孙不致与齐民等也。伏乞批示遵行。缘系详请优免圣裔人丁事理，卑县未敢擅专，理合具文申详。为此县司今备前因，另造书册具申。伏乞照详施行。须至申者。顺治十四年十月奉江南安庆府正堂张批，既系先圣后裔，仰县一例入册优免。缴。

潜邑孔毓璋等呈县为恳给批据蠲免杂差事

〔增修皖江世系孔氏支谱卷一（一〇六一）之三十二〕

具呈生员孔毓璋孔毓达等为恳赏批据永奉不刊事。生族忝叨圣裔，免役免丁。虽云旧典，幸逢

宪宗师台下间代真儒，文宣再世，加意培植，远冠前徽。更将生族田亩另提十甲之外，自行输纳，不入编氓。又蒙面谕，除正供银米附六吉里带征带解外，其签头点解值月帮费差徭保甲，概行蠲免。其恩旷逸，洙泗重光。但里役经管一年一换，未奉批示，难必仰体天心。伏乞

宪裁金批捧据，共永河山。不惟生族世世衔结，而先圣在天之灵永冥佩高厚于无疆矣。上稟。

康熙元年四月二十二日

县宪常讳文忠批，

先圣后裔历代各有优典，尊

先师也。在县免役免丁，乃奉

操抚准行下县，仰六吉里照数征收银米，完日，其一概杂差不得波及。此照。

札付开州为祀生送学作养并免差徭事

〔顺治康熙年间孔氏族人请优免差徭（一四五六）之十五〕

袭封衍圣公府为照例给札衣顶承奉

祖祀以广

皇仁以光俎豆事。照得圣裔荷蒙

历朝崇重，凡寄居他省者，悉照阙里族人，一体优异。此历来旧典，相传无异。恭遇清朝鼎兴，奉有圣庙典例，俱照前朝，期于优渥之

旨。钦遵在案。向因兵荒相继，以致奉祀乏人。今查得直隶开州寄居族人孔尚美、孔胤用，青年

尔雅，礼仪娴熟，堪补奉祀。除本府给札衣顶外，合行移会。为此合用札付前去

贵州，烦将孔尚美、孔胤用送学作养，在于

祖庙承奉祀事。其本生一应差徭，仍希照例优免。庶得供事无误。须至札付者。

计移送奉祀生

孔尚美 孔胤用

札 付
开 州

康熙十年十月初九日

袭封衍圣公

世袭博士孔衍钰等呈为恳请移文优免邹县汶上族人差徭事

〔顺治康熙年间孔氏族人请优免差徭（一四五六）之六〕

太常寺世袭博士孔衍钰

翰林院世袭五经博士孔毓瑛等

国子监世袭学录孔兴荣

呈为恳 恩移咨请申成例以昭

皇恩以培 祖泽事。切照孔氏子孙自汉、唐、宋、元，历蒙崇重，不列编氓。其曲阜口邀 特恩，而流寓他处者，又令所在有司加意优恤。凡民间一应差役，俱行豁免。载在典册，昭昭可考。迨我

朝定鼎，恩遇尤隆。顺治元年，蒙抚院方题明，奉 旨，凡孔门典例，俱应相沿，期于优渥。此

朝廷崇儒重道之盛心，有加无己，振古莫及。职等念邹县为 圣祖鍾〔缺〕半蠲孔裔之粮。汶上为

圣祖试宰过化之区，特开圣泽一社。且两处设有书院讲堂并世袭翰林太常博士学录等官，世主祀事。以视流寓他〔缺〕俾。是以历代体恤，设法栽培。凡圣裔除正项钱粮之外，一概差徭，

概不派扰，遵行在案。自 国初以来，垂四十年，未有更改。盖以政体所关，比〔缺〕两年间，胥吏之奉行不善，里甲之攀扰时闻。将两县圣裔，照百姓一体编派。从前赫濯王章，弃同故纸，有负

盛代之新恩，顿坏累朝之成例。兹幸值 抚宪肃清， 藩台廉明，一凡〔缺〕奖圣教，为 国家传美万世之事，罔不殷殷举行。此诚吾道亨嘉之一会。职等因敢合词公请，伏乞

□□□□仰体先德，俯怜一本，恩准移文咨请当道，将现行事例，严加〔缺〕扰害永杜。则兴朝之隆恩愈彰，而 圣祖之余泽不泯矣。上呈
袭封衍圣公府大宗主施行。

康熙贰拾壹年玖月 日具呈

国子监世袭学录孔兴荣
太常寺世袭博士孔衍钰
翰林院世袭五经博士孔毓瑛

举人 孔尚粒 孔毓荣

〔下十一人略〕

贡监生 孔尚钰 孔尚愉

〔下十二人略〕

生员 孔衍鉴 孔尚永

〔下四十四人略〕

书致罗河督为请免族人河工事

〔康熙年间本府拟办书函稿簿（三）（六三五九）〕

一月二十五日罗河台书

岁序方新，

老亲台德威遐播，有并阳春。旭日物汇，靡不昭苏。式见河伯效灵，漕渠永奠，上慰朝廷宵旰之怀，下舒残黎昏垫之困矣。向来黄流傍溢，致廛良筹。附近郡邑，调夫办柳，谁敢不急公期赴，以济

钦工。但下邑中犹有艰苦輿情，不得不循例吁恩仰邀

宪鉴。曲阜隶充属东北隅，弹丸山区，编户止一十六里。砂石薄田，并无蓄柳。敝族众集居其地，每岁耕获措输赋役之余，恒不足以贍俯仰。旧例曲邑杂差照三分未减，从无远赴何干工程。

夫柳历不派及，是诚从来 各部院台重

先圣，因以恤桑梓，非他邑可较语者。业 据士民公呈具悉移文，藉郡守详 请。窃恐下议代申，未敢擅定全免。伏乞

老亲台垂慈察例，俯念

先圣后裔，任土荒区俾获均口

优复之仁。谅

老亲台御道崇儒之盛心所不靳也。敬此祈

恩附 渎，惟望 汪鉴。临启曷胜翹祝之至。

族人孔毓发等呈南宗宗主为照例优免差徭事

〔钦印乾隆朝代续修南海叠滄迁居邓冈孔氏家谱（一二一五）之一〕

优免呈

至圣六十七代孙毓发等

呈为垂念作主金批照例优免以隆后裔事。发等子姓原因唐元和十二年为岭南节度使孔戮祖，
惠政及民。戮祖曾孙昌弼，唐光化三年，避地依祖旧治，迁寓岭南，子孙繁茂，分居番禺、南
海、顺德等处。广志谱牒现存。今幸南宗子家大人辱临祠庙，题赐省城扁额，复光顾发等
叠滄房祖祠，印给衣巾相礼札付。其免夫役及一切礼仪，恳乞批示申飭，俾天南末派，知所
遵守。不负大人远临至意。为此呈赴

南宗子家老爷台前，伏乞作主施行。

批

天不变，地不变，圣祖之道亦不变。普天之下，凡我子姓，建有庙宇，即有奉祀衣巾，以
供祀典。差徭夫役概行优免。此系旧例，岂可旷废。该族人等即速将具呈以控。当道，理

必推念先圣，格外栽培后裔。本院匆匆就道，不能为尔等请给，心甚抱歉。俟回浙之日，
另文移送。存照。

康熙三十四年七月十三日准

商丘县孔氏族人碑记为与阙里族人一体优免差徭事

〔嘉庆年间孔氏族人请优免差徭（一）（一四六七）之二十〕

大清国河南归德府商丘县，乃先 至圣祖居之地， 帝誉高辛 微子庙墓，原有迁守孔氏一支主守祭祀，豁免差徭。自汉、唐、宋、元、明恩例相传，亘古无改。自明末兵荒之际，里书、地方混入民籍，而优恤之典以失。恭遇 清朝定鼎以来，孔氏恩例俱照前代，期于优渥之

旨。钦遵在案。又奉礼部咨文， 至圣苗裔，无分士庶，一应杂徭，概行豁免。文到河南巡抚都察院加四级阁宪牌到司转行归德，蒙府送县，行查 至圣苗裔无分士庶，一体优恤。诸凡差徭、人丁、户口尽行豁免。孔氏另为一册，一切差徭无所干预，与阙里无异。蒙本县周公遵奉宪諭，造册豁免。世袭圣裔生员孙兴玘呈稟宗主袭封衍圣公，查照志书，于康熙三十七年八月十五日，移札商丘县。有孔希鲁子孙一支，恩给奉祀主祭 帝誉高辛微子庙墓文雅台等，载在志书，的系正派，应与阙里族人一例优免。拟合移会。为此合用札付前去商丘县。烦查册内孔氏人丁户口地亩豁免徭役，立石永彰

皇口口典用垂不朽。又蒙现任 胡公遵照札文，立碑勒石，永为定例。

奉袭封衍圣公札文归德府商丘县知县周宗义

商丘县庠生员陈恂书

至圣六十六代孙商丘县儒学奉祀生员

孔兴玘 孔兴臣

孔兴仁 孔兴绪

孔兴邦 孔兴伯

孔兴祥 孔兴义

孔兴弟 孔兴顺

孔兴业 孔兴世

孔兴林 孔兴训

六十七代孙孔毓英〔下十六人名略〕

六十八代孙孔传口〔下十人名略〕

儒学圣裔生员孔兴玘等建立

康熙叁拾柒年岁次戊寅拾貳月乙丑吉立

河南商丘县孔氏族优免差徭碑

〔寄居河南省各县孔氏族申请续修支谱（三）（一一四〇）之四十三〕

大清国河南归德府商丘县乃先 至圣祖居之地，帝誉高辛微子庙墓原口迁守孔氏一支主守祭祀，豁免差徭。自汉唐宋元明，恩例相传，亘古无改。至明末兵荒之际，里书地方混入民籍，而优恤之典以失。恭遇 清朝定鼎以来，孔氏恩例俱照前代期于优渥之

旨钦遵在案。又奉礼部咨文，至圣苗裔，无分士庶，一应杂徭，概行豁免。文到河南巡抚都察院加四级阁宪牌到司转行归德，蒙府送县，行查 至圣苗裔无分士庶，一体优恤。诸凡差徭人丁户口，尽行豁免。孔氏另为二册，一切差徭无所干预，与闾里无异。蒙本县周公遵本宪谕造册豁免，世袭圣裔生员孔兴玘呈稟宗主袭封 衍圣公查照志书，于康熙三十七年八月十五日移札商丘县。有孔希鲁子孙一支，恩给奉祀主祭 帝誉高辛微子庙墓文雅台等，载在志书，的系正派，应与闾里族人一例优免。拟合移会。为此合用札付前去商丘县，烦查册内孔氏口丁户口地亩豁免徭役，立石永彰

皇口口典用垂不朽。又蒙现任 胡公遵照札文，立碑勒石，永为定例。

商丘县庠生员陈恂书

至圣六十六代孙商丘县儒学奉祀生员孔兴玘

〔下七人略〕

六十七代孙孔毓英

〔下十五人略〕

六十八代孙孔传璧

〔下二十人略〕

奉袭封衍圣公札文

归德府商丘县知县周宗义

康熙叁拾柒年岁次戊寅拾贰月乙丑吉旦

儒学圣裔生员孔兴玘等建立

移高唐州为改正奉祀生孔尚德等户籍免差事

〔康熙年间孔氏族入请优免差徭（一四五七）之十九〕

太子少师袭封衍圣公府为恳准移文以全成例事。据高唐州奉祀生孔尚德、孔尚后、孔衍确、孔衍绪、孔兴朝、孔兴文呈前事呈称，切照孔氏祀生，历朝通行天下，与生员一例优免，其来已久。生等蒙恩给札充为奉祀，安分守己，从不妄为。有本州礼房朦禀本州，差皂杨贵如将生等札付赚去三张，验看真伪，收住不给。与户房串通同谋，将生等六人俱改民户，一例当差。蒙天台差人同本州教口领取原札，至今不给。伏乞恩准作主，移文高唐，改正户籍，给还原札，以全旧例，感戴上呈。等情到府。据此，查得 圣裔优免杂徭，历代相沿。我

兴朝定鼎，奉

旨， 圣门典例，悉照前朝旧例，通行在案。钦此，则孔氏之优免杂徭，不独祀生为然，矧列在

宫墙乎。今据呈词前事，拟合移会。为此合移贵州，烦为查照，希将祀生孔尚德等改正户籍，

照例优免，以副

朝廷右文至意。须至移文者。

一 立案
高 唐 州

康熙四十八年二月十八日

太子少师袭封衍圣公押

移平阳府为赵城县族人孔衍才等优免差徭事

〔康熙年间孔氏族人请优免差徭（一四五七）之二十五〕

太子少师袭封衍圣公府为恳恩移咨照例一体优免事。据山西平阳府赵城县族人孔衍才、孔衍介、孔衍圣等呈前事呈称，切身等山西流寓一枝，系五十一代元裕祖之后，官游家居，世系可考。虽距阙里千余里，而历来优异弗替。因年远废弛，蒙天恩垂念，于康熙二十二年，移文赵城县，将河西里、韩西里、孔庄村优免丁徭。其河东胡坦里孔氏四十五丁，宝贤坊孔氏四十丁，俱蒙移文本县一体优免。詎奈里书作弊，止免河西，不免河东。一祖共派，苦乐不均，有负盛世崇文优异之典。为此投叩吁请，伏乞恩准移咨，一体优恤，庶一视同仁而大典有光矣。上呈。等情到府。据此，查得山西赵城县流寓后裔，向例优免丁徭，历经移文该县，遵行在案。今河西等里，俱已优免，独河东孔氏，未获一视同仁，明系里书混派。拟合移会。为此移文贵府，烦为查照文内事理，希将河东胡坦里宝贤坊流寓孔氏，檄赵城县照例一体优免，以副

皇仁，以培 圣脉，斯文幸甚。须至移文者。

一立案

平陽府

康熙五十年六月十八日

太子少師襲封衍聖公押

滋阳县移为拨夫修堤事

〔修治滋阳县境孔庙祀田附近河堤（四八五五）之四十二〕

兖州府滋阳县为河水决口伤损田禾事。据北辛王社士民龙猷琦、李际太禀前事禀称，切生等庄村与泗河相去咫尺，子本月初陆日、拾贰日河水横溢，决口贰处，伤损田禾，生等实有身家性命之忧。但河口有邹县

圣府地土，伏乞恩准行文知会邻封，阖县均感。为此上禀。等情具禀到县。据此，合行移会。为此合移

贵府，请照来文事理，希将被水庄村，拨夫协修。仍祈赐覆过县，以便拨夫协力修筑，以防水患，以保民生，幸弗迟滞施行。伫望伫望。须至移文者。

右 移

太子少师袭封衍圣公府孔

康熙伍拾捌年伍月二十一日典史〔缺〕
移

咨广东巡抚为烦请檄府行县照例优免广州等处族人杂差事

〔乾隆朝代续修南海白计塑华平坑溪孔氏家谱（一二二四）〕

袭封衍圣公府为恩恩照例优免以广

皇恩以恤远宗事。据广东广州府顺德县上冲庄生员孔尚莲等，番禺县洗敦庄孔衍焯，小龙庄监生孔兴祈，暹岗庄孔尚高，龙伏庄孔毓章，孔边庄生员孔衍经等，南海县罗格庄生员孔显文，孔村庄孔衍师，石碣庄监生孔衍颺，孔村庄孔毓溟，叠滘庄孔传御，双溪庄孔毓臣等呈前事称，切莲等支派系出

至圣〔三〕十八〔代〕孙戮后裔曾孙昌弼，登唐进士第，官拜散骑常侍。因朱温篡乱，避地入粤，依祖旧治，家于南雄保昌之平林村。至三子葆，裔孙继明，由南雄而迁居广州。及子孙蕃衍，散处顺德、番禺、南海等县上冲、小龙、洗敦、罗格等庄村各为户。前嘉靖年间，蒙先大宗主题请移文粤藩行县，比照闾里一体优免。莲等户粮差详载郡邑志书，并颁训典及印册可考。后于顺治十五年间，因工科马以劣衿员役滥免等弊一事奏，来文并无于及

圣裔免徭条款。县吏混概停止，有辜 历朝隆恩。兹恭逢 大宗主世承先德，泽荫远支，谨修家

乘进览，叩息赐印颁回，庶得珍藏符验。并恳俯准移咨各宪行粤，将莲等各户比照阙里事例，一体优免。庶使

朝廷盛典咸藉均沾。等情到府。据此，查照

至圣先师后裔，自汉唐以来，屡代优免。至兴朝重道崇儒，上超千古。屡代奉部文申飭豁免徭役，其流寓远方子姓，比照阙里，一体优免在案。今顺德等县孔尚莲等，的系支分，若概不优免，混派滋扰，殊负

皇上深恩，有累

圣门族姓。为此合咨

贵院，烦清查照咨内事理，檄府行县，将流寓顺德孔尚莲等，番禺县之孔兴祈、孔衍焯等，南海县之孔显文等各户，照例优免其杂徭。并飭该房立案，永远不得混派。庶

皇恩广旅

圣泽永绵矣。须至咨者。

雍正二年闰四月二十二日辰时右咨

巡抚广东等处地方提督军务兼理粮饷都察院右副都御史加三级年

太湖县碑记为永禁混派孔氏子孙差徭事

〔增修皖江世系孔氏支谱卷一（一〇六一）之一〕

江南安庆府太湖县正堂加一级胡 为违例灭圣恩赏勒石一杜嫉害事。雍正五年四月初九日，奉 本府批，据孔传衿、孔继广等稟称，身族孔氏子孙，自汉唐以至今日，宗子则承袭公爵，支子则选授官僚，流寓外土者，一概免丁免役。今古同符，普天一辙。身祖忝叨 先圣苗裔，世居曲阜。先朝官游皖籍，屡奉

皇恩及 部员移文，孔氏子孙承种田粮，照常办纳，余外丁役保甲门面烟差，悉照阙里事例，概行优免。两 朝印札可验。叠奉 各县历任县主照例批免，一体培植。幸逢 宪天斯文宗主，远迈前贤金批，向有优免之例，果系

圣裔，候行县遵照。已蒙飭县晓諭在案。岂恶等恃众藐公，尚生覬覦，捏以冒圣逃差。金批，仰太湖县查报。身等叩审详 宪，又蒙金批，果有免差札付文照为凭，准予宽免，余俱如详行。缴。金批煌煌赤据，岂恶欲不遂，姜又上等挾仇扎党，横议灭圣，妄报革沙夫徭，违示抗宪，藐法欺天，每生拖害，朦朧 新县，捏以冒圣滥免。恳祈 宪天大老爷施及全恩，诛党劈诬，

赏敕勒石，永佩洪恩。不唯身等世世衍结，即先圣在天之灵亦佩高厚于无穷矣。等情。奉批，前据县详优免，今复稟拖累，仰太湖县查照前详，批示勒石遵守具报。等因，到县。蒙此，合行勒石永禁。为此碑仰该地各烟户人等知悉，嗣后一应差徭，悉照前府宪优免之批，各各遵守，毋许一例混派孔氏子孙当烟，致干未便。须至碑者。

雍正五年岁在丁未孟秋月

江南安庆府正堂加一级记录一次徐、前原任本府正堂加一级记录四次章。

太湖县正堂加一级胡

南宮縣族人孔興教等呈為請移文州縣優免差徭事

〔雍正年間孔氏族人請優免差徭（一四五八）之十〕

直隸冀州南宮縣儒學生員孔興教孔〔缺〕

呈為懇賜移文照例優異以廣

皇仁以恤遠宗事。切教等寄居南宮縣十有七世，支派載在家乘可考。但教等一支，寄居南宮縣，

離闕里五百余里。恐世遠年湮，難保有等于編氓之虞。恭逢

天子尊師重道，崇禮

先師，

殊典屢頒，并仁及聖裔子孫，格外優異。誠生民未有之逢。理合呈明，懇乞

宗主俯念一本之誼，移文州縣，照依闕里族人，永遠一體優異。閭族子孫世世均感無既矣。上
呈。

雍正十年十月初九日

准行

冀州申复为准孔氏族人优免差徭事

〔雍正年间孔氏族人请优免差徭（一四五八）之十二〕

直隶冀州为恳赐移文照例优异以广

皇仁以恤远宗事。本年十月二十一日蒙

袭封衍圣公府 移文前事，烦为查照檄行该县悉照阙里优异圣裔旧例，一切杂泛差徭，地方保长等役，俱行豁免，幸毋等诸编氓。足征崇重

先师之至意矣。等因到州。蒙此，随即转飭所属南宮县遵照在案。今蒙前因，拟合申覆。为此备由具申，伏乞照验施行。须至申者。

右 申

袭封衍圣公府

雍正拾年拾月貳拾叁日

恳赐移文等事

知州加一级纪录九次乔焯

州判林腾云管粮

署吏目田珍巡捕

票行家庭族长为清查邹县例地以利优免差徭事

〔雍正年间孔氏族人请优免差徭（一四五八）之九〕

袭封衍圣公府为清查例地事。照得孔氏例地，已蒙

皇恩准免夫役差徭，至优极渥。诚恐地亩繁多，户名不一，或有藉端诡寄，幸免差徭，而我族中全无知觉，不几深负

朝廷优待圣裔之盛典乎。为此票行族长，严飭孔氏族人，各将一应置买邹县氏（民）例地亩，逐户开明呈报族长，汇造总册，申送本府，核实加印。一送藩司，一送邹县，永为成规。总以此番清查为准，嗣后倘有续报，即系诡寄，不准援免。限乾隆元年二月内汇齐册报，慎勿迟滞。火速。须至票者。

一立案票

家庭族长

雍正十三年十二月十八日

袭封衍圣公府押

牌仰孔庭族长为定陶县族人孔兴盛恳请入谱并求免差事

〔乾隆年间孔氏族人请优免差徭（一）（一四五九）之四〕

袭封衍圣公府为详陈历历恩优免以培圣脉事。准定陶县申前事内称，乾隆六年二月二十三日，据孔兴盛等禀前事禀称，切裔世籍曲邑，寄居巨野，迁居陶境，已六世矣。自明、清以来，四百余岁。为圣裔者，从无火夫杂差，其优免也非一日矣。此固圣祖之德，实

皇上崇儒重道之隆恩也。不意岁前十二月二十七日，有黄河草料，俱照地亩均出。公差催逼甚急，已经封印，欲诉无门，不得不遵法捐纳。裔等实为圣裔，凡为官长者，莫不矜而怜之，况裔族孔衍泗等，已得蒙恩优免，裔独非圣祖之后代乎。裔既居陶境，即陶邑之子民，纵不求免，安得不辨其泾渭乎。裔实为圣裔，非有确据，焉敢轻渎，以求优免。况现有家谱可验。如果垂怜軫念圣脉，免除杂差，不惟裔阖族顶戴，即圣祖在天之灵，默默中亦感鸿恩子无穷矣。阴隲万代，世世公侯。上呈。计开孔衍璧、孔衍先、孔兴周、孔兴化、孔兴福、孔兴治、孔兴望、孔毓其、孔毓芳。据此，又据孔兴盛等为再陈支派恳恩行文执照事。切裔送谱呈验，蒙批，谱内虽有西郭户支派，但无孔兴盛等名字等语。明批诚允当矣。第裔之家谱，六十年

甲子一造，凡为圣裔者，必年过十五，方许入谱，此定例也。自裔始祖希广传至闻邦，在修谱之前。至裔祖贞信，尔时尚幼，传至裔，皆未入谱者，在造谱之后，此不但裔为然也，即衍泗蒙恩优免九十余人，谱内亦并无现在之名，亦因所生在后之故也。况裔支派照（昭）然，官谱凿凿。裔虽不才，固不敢冒认祖宗，亦何敢以谱内无现在之名，而自迷其祖宗也。又批内有着裔至衍圣公处行文执照。县境至曲相距三百余里。裔系贫家，路资费用实难周备。再恳轸念圣脉，施反手之仁，行文查照，虚实立见。如有仿冒，情愿甘罪。等情。据此，查圣裔支派蕃衍，散居外境，真伪莫辨。今据孔兴盛等具呈前来，拟合具呈申请确查，以免仿冒。为此备由具申，伏乞照验施行。等因到府，合行飭查。为此牌仰该族长即将孔兴盛等一支，果否实系西郭户派，有无假捏附会等情，立即查明申覆，以凭移覆。须至牌者。

右牌仰家庭族长孔闻墩准此

乾隆六年四月十九日

圣府 限日 缴

潜邑族人稟县为恳赏镌碑永免差徭事

〔增修皖江世系孔氏支谱卷一（一〇六一）之二〕

具稟监生孔继济孔传锷等为恳赏镌碑永免徭役事。生族忝属 圣裔，由山左迁潜，历免保甲丁役。国初 常大父师加恩生族，奉操抚准行将生族田亩另提十甲之外，自行输纳。又将正供银米附六吉里带征带解外，一切点解帮费差徭保甲概予蠲豁，给赏印批。现据雍正五年生族分居太邑者，里中以拖派河差，控改旧例，生族叔孔传衿等上号江苏大中丞徐时为皖守，查 例恩予豁免，赐文镌碑勒竖太邑，永禁保甲差徭。生族到今衔祝，碑文炳据。但潜邑自常大父师去后，生族田亩多转售他姓，子姓大半散居远地，些须田亩，不便编户，遂将田亩编入十甲之内，照其民一体输将。其保甲门差仍照往 例蠲豁，无拖派者。生等恐日久例湮，或有好事之徒，复行拖派，虽有 徐大宪金碑 常父师印照，但未同赏镌碑，恐难并垂永久。恭逢 宪大父师早达贤关，优入圣域。冠群英于蕊榜，瑞应五云。发妙响于琴堂，风清气四野。瞻文庙而首加丹雘，俎豆重光。辟书院而不遗菲葑，渊源勿替。至子岁科小试，编次取冠乎同曹。若夫案牍余闲，霁威更逾于多士。凡滋栽培之有渥，悉荷 先圣之余麻。顷

者调任桐乡，更求恩施格外。伏乞查照崇奖圣裔定例，将生族隶潜邑者，一切门徭保甲敷衍禁革，并赏金笔，迅赐鸿文，寿诸碑石，使编户毋得借口。庶加恩生族者前有常后有徐继。自尔子孙得别于齐民，更受今宪大父师之赐，而沐鸿恩于无既矣。等情。

乾隆九年六月二十二日

县宪魏父师伟其瑛批，查潜山孔姓，实属圣裔，自与齐民不同。该生既称定例，将生族隶潜邑一切门徭保甲敷衍禁革，应如所请。除钱漕正供，照齐民一体输纳外，所有门差保役通行禁革。以尊先圣，以绥后人。里中编氓，不得借端拖派。仍飭泐诸金石，永远遵行。前令常批禀并发。

移宁阳县为宁邑孔传礼等确系族人应予循例免差事

〔山东省各县孔氏族人申请续修支谱（一）（〇八六〇）之四〕

袭封衍圣公府为圣裔久蒙查确恳请移知一体优恤事。据寄居宁阳县族人孔传礼等呈前事呈称，切礼等虽现居宁邑，实由阙里迁往，因道路遥远故坟墓立于其处，而考试亦在于宁。第恐久无查考，是以复有支谱，历次纂修，皆呈大宗主查核铃印。则礼等之为确系圣裔无疑，而差徭应一例优免矣。前宁邑摊派杂差，礼等曾经稟县。蒙批，查孔氏嫡派，即系曲阜，考试犹入四氏学，坟墓亦附孔林。今呈内并未叙及，谱牒未足为据也。不准谱发。切思孔氏支派，蕃衍流寓于他省他邑者甚众，坟墓固不能尽附孔林，而考试亦难以俱入四氏学。是果否圣裔，惟凭谱牒。但恐或有假冒，故蒙大宗主提谱核明铃盖印信。今若以墓不附孔林，考不在四氏，即与百姓同派差徭。独不知大清会典内，但言圣裔，而未曾分墓附孔林考入四氏与否。则可知一凡确系圣裔，皆在此例也。是以各省各县，皆凭大宗主铃印之谱优恤。是礼等虽寓于宁，实与仍居阙里者无异。一切差徭亦应霑

圣朝优恤圣裔之恩，概行优免。今宁邑县主未悉此例，故尔摊派。为此，稟恳大宗主查例移知，

使宁邑族人得免杂差，感戴无既。等情。据此，本府查孔氏支派蕃衍，流寓于外省外邑者实多，故墓亦不能尽附孔林，而考亦难以俱入四氏。是以本府俱令纂修支谱，呈明确考，铃盖印信，以别真伪。使有司亦有所查考。今孔传礼等实由阙里分迁，圣裔确切。一应差徭，自应照例准予优免。今据前情，合行移知。为此合移
贵县，烦为查照施行。须至移文者。

一 立 案

宁 阳 县

乾隆十六年三月二十八日

袭封衍圣公押

咨赣抚为豁免新城县族人孔衍满等运丁事

〔乾隆年间孔氏族人请优免差徭（三）（一四六一）之十一〕

袭封衍圣公府为恳详

题请豁免军籍以广

皇仁事。据浙江衢州府世袭翰林院五经博士孔传锦申前事申称，据江西建昌府新城县族人孔衍满、孔兴盛呈称，切满等幸托 圣裔，欣逢 本朝崇儒鸿恩，至优至渥，无论南北宗派，靡不沾被余光。至江右一支，实系衢支分派，屢沐深恩。缘明初洪武年间，满祖寿孙充入太宁中卫军籍，遂改为寄操军。相沿为运丁，附建昌厅仍其名曰旗丁孔寿孙舡，岁挽天庾。身隶贱役至今，未蒙豁免。故不得习诗礼于家庭，隐痛实深。今恭逢 国家大庆， 覃恩殊常，千载一时。念满祖并非原编运丁，似可邀除旧籍。且江西漕运十四帮粮舡共计七百余只。若以孔寿孙一舡之米，分带各舡，不过一石有零。天庾既无亏缺， 国帑又可省一协济之需。为此历陈原委，转详公府，题详豁免葛藟。末叶永邀鸿慈于无既矣。等情到职。查该处于姓实系衢州分支，印谱的据。现奉

上諭，國家遇大庆，則必有殊常之恩，是否循例邀免之處，伏乞察核施行。等情據此，恭照
聖朝崇儒 聖裔，恩及苗裔，一切差徭，例應優免。今孔衍滿、孔兴盛確系 先聖后裔，然其充
膺運丁，不識可否亦照此例優免。相應據情移咨
貴部院，煩為查照轉行查辦核奪施行。須至咨者。

一 立 案

江 西 抚 院

乾隆十七年二月二十九日

裘封衍聖公押

帖付铅山四十都孔毓伟等确为圣裔免差事

〔乾隆年间孔氏族入请优免差徭（六）（一四六四）〕

袭封衍圣公为给帖事。照得

圣朝尊礼

先师，恩及苗裔。除正供而外，一切杂泛差徭，概行优免。不特备载闾里志，而且详于

大清会典。兹江西金溪县四十六都、四十七都、四十八都、四十九都，贵溪县三十三都、六十五都，铅山县十九都、四十都，泸溪县十四都等，确系圣裔，名在谱牒。一应杂泛差徭，应俱

照例优免。本府业已移咨

江西总督部堂，并

巡抚部院，转行各府县遵照。第恐鱼目混淆，临时莫辨，合行给帖收照。为此帖仰孔毓伟等，除正供而外，凡遇各户杂泛差徭，准即呈明所在官司，照例豁免施行。须至帖者。

府字玖号

右帖付铅山四十都孔毓伟准此

乾隆十七年五月十一日

移庐州府为援例优免庐江县孔氏差徭事

〔寄居江南各县孔氏族人申请续修支谱（一）（一〇三五）之二〕

袭封衍圣公府为遵奉领谱恩恩移咨优免差□□□
圣脉以广

皇仁事。据江南庐州府庐江县恩生孔传惠、孔昭□等呈前事呈称，切孔氏蕃衍，散居各省，虽有远近不等之处，实皆先圣之苗裔。历蒙各朝之厚恩，杂泛差徭自来优免。今惠等荷蒙宗主大人印盖谱牒，遵奉领回。更祈移咨江南本府，檄行及各州县，将差徭一概优免。惠等感高厚于无既矣。等情。据此，查 阙里圣贤后裔，原有优免差徭之例。今孔传惠等本府已查明实系阙里分派，自亦应准其优免一切杂泛差徭。相应据情移知。为此，合移 贵府，烦为查照行知所属州县施行。须至移文者。

一 立案

庐州府

乾隆十七年九月初六日

袭封衍圣公 押

移滕县为族人孔继成等优免河差事

〔乾隆年间孔氏族入请优免差徭（三）（一四六一）之二十九〕

袭封衍圣公府为恩恩移知恩例以恤圣裔事。据五品执事官孔继成、八品执事官孔传济、九品执事官孔传准、原任七品执事官孔传治、候选州同孔毓溥、候选主簿孔传澄、庚午科举人孔传渭、孔传纶、丙辰科举人孔传习、生员孔兴口、监生孔兴永呈前事呈称，切照孔氏一族，蒙

历朝优恤，一应民间差徭，概行豁免。迨至我

朝，历圣相传，崇儒重道，恩及苗裔。凡我孔氏族人，俱准仍免差徭。载在

大清会典。查顺治十三年蒙户部通行，凡孔氏杂项差徭，相应优免。又于康熙二十三年内，蒙户部行文东省，凡系孔氏，遇有一切杂差，俱照十三年旧例优免，通行各府，一体出具遵依报部。至于康熙四十七年，蒙抚宪赵行文，泉募等夫食米，自应遵照部文内优免。且于乾隆四年，曹州府孔兴禾具控，抚宪硕行文，黄河料物等差，遵照旧例蠲免。又于乾隆五年，蒙藩宪魏飭行曹州府，查照前详，立碑永禁，仍取碑摹送查。职等散居滕邑，均属圣裔，

仰霑

皇恩，历蒙邑侯优恤。今自张邑侯下车，待我孔氏，尤恩逾于从前。族属俱感深五内。但现在江南黄河料物因系按亩而派，故职等均在派内。而议者亦以谓孔氏不办，人皆观望。不知滕邑之中，平民万倍于孔氏，一保之中平民千倍于孔氏。岂无孔氏而差不能办耶。伏乞轸念一脉，移知本县，始终加恩优恤成全，不使 恩例损坏，

永感无极。等情据此，查孔氏蒙 国朝厚恩，实有优免差徭之例。今既据该员孔继成等呈称，素荷

贵县念属圣裔，格外优恤。今黄河料物，应否仍加恩优免，抑或与齐民稍为区别，以示优异，以全 恩例，是在

贵县裁夺。相应据情移知

贵县查办，仍望见覆，以便飭知施行。须至移文者。

一 立案

滕县

乾隆十八年十一月十三日

袭封衍圣公 押

优免孔颜曾孟四氏圣裔差徭碑记

〔道光年间府庙属官请优免差徭（一）（一四九〇）之十六〕

特授兖州府正堂加三级纪录五次李 为恩照例飭行等事。本年四月初五日，蒙布政司票开，乾

隆二十年三月二十六日，蒙

署抚都院郭 批本司呈详四氏学孔传是等，请援例优免杂项差徭缘由，蒙批如详，转飭各州县仍取具碑摹报查缴。等因批司行府，蒙 批合行抄洋转飭。为此，仰县官吏照依批洋票内事理，即便遵照旧例，将四氏圣裔一切杂项差徭，出示晓谕优免。俾约地知有恩例，不得仍行派扰，而四氏圣裔亦得永沐恩施。并即勒石以垂永久。仍出具碑摹，径送抚都院 布政司及本府查考。毋违。须至票者。

计粘抄洋一纸

乾隆二十年四月

初十日票

山东等处承宣布政使司布政使阿 为恩照例飭行勒石垂久永沐 皇恩事。乾隆二十年三月

十七日，蒙

署理巡抚都院郭 批，据四氏圣裔孔传是等呈称，切孔、颜、曾、孟四氏圣裔，仰承祖业，历朝优崇，一切地亩杂项差徭，概行蠲免。其散居各处者，俱令所在有司，加意优恤。迨顺治元年

恩诏内一款，凡圣门典例，俱应相沿，期于优渥。钦此钦遵行在案。后因各州县奉行不善，派扰时开。顺治十三年蒙 户部行文申饬，凡一切杂项差徭，俱行蠲免亦在案。康熙二十三年，又蒙 户部行文，经前任转饬，仍照顺治十三年旧例蠲免。康熙四十年，蒙 户部复行文申饬，援例咨行，经前宪行文，又即将一切地亩杂项差徭，概行蠲免。如有复行派扰者，详报究处等语各在案。康熙四十七年，蒙 前宪赵行文通饬遵照部文内蠲免。乾隆五年内，曹州府孔兴禾具控 前宪硕 行文，黄河料物等差，照旧例蠲免，且立碑永禁，仍取碑摹 送查。是孔、颜、曾、孟蠲免差徭之例，上奉

恩诏，又蒙 部台 宪台屡次饬行，由来久矣。兹日久弊生，究属各州县，固有遵例蠲免者，复有捺案不行者。是使四氏圣裔，竟有得蠲免不得蠲免之殊，而所谓一切地亩杂项差徭，尽行蠲免者，几湮没不彰矣。四氏圣裔，拖累难甘，因敢公吁

宪台大人恩准照例饬行究属各州县，蠲免四氏圣裔一切地亩杂项差徭。并饬各州县治将勒石以垂永久。则四氏圣裔优游于光天化日之中，免追「呼」拖累之苦。不惟四氏圣裔永沐隆恩，而维持之功，亦与金石并垂不朽矣。沾恩上呈。等情。蒙批，四氏圣裔其一切地亩杂项差徭，自应优免。布政司查明旧例，定义详报，以凭饬遵。等因批司。蒙此，卷查康熙四十九年六

月初九日，蒙 前抚都院蒋 案验一件，恳恩再给明文严行申飭事。康熙四十九年六月初五日，蒙 户部咨，山东清吏司案呈，奉本部送，据五经博士孔传鋹、颜崇敷、曾尚容、孟贞仁、仲承述、闵兴汶、东野枝盛等呈称，职等仰承祖业，蒙 历朝优崇，凡属圣贤后裔，以及庙丁礼生乐舞，一切地面杂项差徭，概行蠲免。后州县捺案不行，于康熙二十二年、四十年两次复具呈本部，均蒙移咨东抚，照例飭行在案。诚恐相沿已久，州县复行派扰。伏乞部台恩准照例移咨东抚，严行申飭。等因前来。查康熙四十年四月内，据五经博士孔毓埏等具呈本部，移咨该抚申飭在案。今据五经博士孔传鋹等具呈，相应行文东抚，再加严行申飭可也。为此咨咨前去查照施行。等因咨院行司，当经转行严行申飭在案。今据四氏学孔传是等以各州县奉行不善，有遵例蠲免者，亦有捺案不行者，援例呈请 本都院严飭，蒙批本司查明旧例定议详报。等因。遵即卷查康熙四十九年六月内，奉准 户部咨文，据五经博士孔传鋹等呈称，职等仰承祖业， 历朝优崇，凡属圣贤后裔以及庙丁礼生乐舞，一切地面杂项差徭，概行蠲免。移咨东抚严加申飭，遵行在案。今据四氏学孔传是等援例呈请优免一切杂项差徭，似应飭令循照旧例，出示晓谕优免。庶约地知有恩例，不敢仍前派扰，而四氏圣裔，均得永沐恩施。并应转飭各州县勒石垂久，仍取碑摹送查。缘奉

批飭查议，是否允协，拟合呈祈

本都院鉴核批示飭遵。乾隆二十年三月二十六日蒙 批如详，转飭各州县仍取具碑摹报查缴。

皇清乾隆二十年五月上浣吉旦 兖州府嘉祥县知县加三级纪录五次建水佃震山立石 四氏学生

员曾贞性书丹 礼房经承张建设督工 石匠庞振基蔡玉镌字

移阳谷县为免孔衍詮等一应户籍里役差徭事

〔乾隆年间孔氏族入请优免差徭（四）（一四六二）之十一〕

为恳恩赐文照例优恤以广

皇仁以培圣裔事。据寄居阳谷县族人监生孔衍詮呈前事呈称，切詮系北公户族人，世居阙里，自詮高祖宏亮遭明末荒乱，流寓阳谷县张秋镇，贸易多年，遂于阳谷县城南，颇置宅产，号为孔家村，因而家焉。现有家藏族谱世系可考。但自阳去曲二百余里，即不得与阙里族人一体优隆，殊非我

皇上崇儒重道恩及苗裔之至意。为此恳乞移文阳谷县，除正供外，一切杂泛差徭，得与阙里族人一体优免，感戴无既。等情到府。据此，查

至圣后裔，例得优恤。即流寓他州县者，均应一体普沐。今据孔衍詮呈请前来，本府遂提取族谱查对世系明确，的系阙里流寓。拟合札付

贵县，烦为查照，希将孔衍詮等，凡一应户籍里役差徭，悉照阙里族人立案优免。须至移文者。

一 立案

乾隆二十年九月初九日

范县族人孔毓达呈为请移文免差事

〔乾隆年间孔氏族人请优免差徭（四）（一四六二）之六〕

具呈寄居范县生员孔毓达等为恳恩移文照例优恤以广皇仁以培圣裔事。切达等世居阙里，迨明末遭东山兵燹，达祖思友避乱，迁居范邑家焉。至今百有余年，人丁繁衍。第恐里书人等，视达一族等于齐民，一例派差。有负皇上崇重先师恩及苗裔之至意。亦未可定。且本年三月内，举人孔传是等呈叩上宪，照例优恤，荷蒙各宪飭令各属州县出示晓谕并勒石以垂永久。今达等远居范邑，离曲穹远，恐不得与传是等一体优恤。是以恳乞

大宗主公爷恩赐移文，照依阙里族人，优免一切杂泛差徭。感戴无既。上呈。

乾隆二十年十一月 日具

世袭翰博孔传锦申为孔传昊等优免运粮差徭事

〔乾隆年间孔氏族人请优免差徭（四）（一四六二）之二〕

世袭翰林院五经博士为循例恳免仰请详咨题豁以广

皇仁以培圣裔事。据江西建昌府新城县族人贡监生员孔传昊、孔继点、孔继燮、孔广材等呈前事内称，新城孔氏，自至圣四十七代裔孙传公，同四十八代祖端友公，扈宋高宗南渡，赐第衢州。传公长子端问公生四子，幼子莘夫公为临川县丞，遂家其地。历四世，至温宠公，迁居新城之贤溪，递传至今。清白安分，书香相继，科甲连绵。累朝以来俱邀优恤。乾隆十三年皇上幸鲁，举人孔传柱、贡生孔传昊入庙观礼，

钦赐帑金彩缎。

行在筵宴，又沐

恩纶，选拔十三氏子孙。

大部行文江西学院，拔取贡生二名。以拔贡作恩贡，

宠賚频加，

殊恩稠叠。千载一时，亘古未有之奇遇也。惟因温宠公五世孙德诚，于明初洪武年间身充府掾吏名寿孙。缘事发北直太守中卫军，嗣护益藩至建昌附入建昌所，名为寄操军。崇德五年，勒

运漕粮，并非实在旗丁。累延合族，莫可伸诉。伏思

先圣先贤后裔，屡奉

恩旨，一切差徭，概行优免。乾隆十七年，恭逢

皇太后万寿，普天同庆，

殊恩特沛，戡土食毛，无不沾被。曾经孔衍满等呈请详题豁免，蒙详

衍圣公府移咨江西抚院查核优免。因原词内以寿孙一船之粮，洒派江西通帮带运，粮道以缸有定额，未便遽减，悬案未定。前次洒带之语，实为节省岁修银两头舵水手行月粮米，及一切漕粮项下钱粮起见，今思额缸自难裁洒，但建昌一帮，额缸三十二只，除现在管驾运丁之外，其余实在旗丁尚多，尽可金换。且即此三十二缸之中，有一缸而两丁朋运者，有一缸而三四丁朋运者，均系谙练殷丁。就中分丁管运，实与额缸无碍，尤为妥便。若以寿孙曾经犯军，故令运粮，不知罪止及身，从无殃及子孙。况奉有

恩旨，现在军流人犯在配安分十年无过者，准其回籍。此本身自犯，尚得赦免，岂有百十余年后之苗裔，转不得沐一视之仁。

本朝鼎建以来，重熙累洽，崇儒重道，尊礼

至圣，迈越前代。明春

皇上复有

幸鲁之盛典，昊等族人重得观光。何使运粮一事，独有向隅之泣。为此叩乞推念新城族人，实系衢郡分支圣裔嫡派，循照

先圣先贤后裔，得免差徭，及现犯军流在配，安分赦免回籍之恩例，详请

衍圣公府据情咨题豁免，以孔寿孙军缸，另行金丁顶运，永免管驾。则新城合族沾戴不朽。等情到职。据此，该世袭翰林院五经博士孔传锦，查看得江西新城孔氏，实系衢郡分支圣裔嫡派。一切差徭，例得优免。即孔寿孙曾经犯军，原系寄操勒运，并非实在旗丁。事在前明，百十余年以来，子孙安分耕读，与现犯军流在配安分十年无过赦免回籍之例相符。其所管军缸，据称有实在旗丁可以金换，及现运丁内有朋运之谄练殷丁可以分丁管驾。则与额缸无减，挽运有人。用敢详请

大宗主循照

恩例，推广

皇仁，据情咨达

大部，题请豁免。庶见

至圣后裔不与齐民为伍，实鲁衢大节所关。不独新城一支已也。为此备由具申，伏乞照详施行。须至申者。

右 申

袭封衍圣公府

乾隆贰拾年拾贰月十四日五经博士孔传锦

札付平阴县为专理祀事请将孔衍翮送学作养并免杂差事

〔乾隆年间孔氏族入请优免差徭（五）（一四六三）之十〕

袭封衍圣公府为知会事。照得

至圣先师，蒙

历朝崇重，恩

及苗裔，不使等诸编氓。即寄居他省者，亦照阙里族人，一体优异，成例在案。一凡

至圣遗迹处所，例应选择后裔内贤能者专理祀事。今选得平阴县寄居族人孔衍翮，才品优长，

礼仪娴习，堪补此典。本府除给札荣以衣顶照例汇册咨部外，拟合知会。为此札付前去

贵县，烦将孔衍翮送学作养，其本生杂差仍希照例优免。俾得专供祀事，庶大典攸光矣。须至札付者。

一 立案

平 阴 县

乾隆二十九年十一月初九日

札付六安州为请将孔毓柏荣以衣顶并免杂差事

〔乾隆年间孔氏族人请优免差徭（五）（一四六三）之十四〕

袭封衍圣公府为知会事。照得

至圣先师蒙

历朝崇重，

恩及苗裔，不使等诸编氓。即寄居他省者，亦照阙里族人一体优异，成例在案。一凡

至圣遗迹处所，例应选择后裔内贤能者专理祀事。今选得六安州寄居族人孔毓柏，才品优长，礼

仪娴习，堪补此典。本府除选补汇册咨

部给照外，拟合知会。为此札付

贵州，烦将孔毓柏荣以衣顶，送学作养。其本生杂差，仍希照例优免。俾得专供祀事，庶

大典攸光矣。须至札付者。

一 立案

六 安 州

乾隆三十年二月十五日

裴封衍圣公 行

旧县户头孔毓昆等禀为恳请移文免差事

〔乾隆年间孔氏族人请优免差徭（六）（一四六四）之二十三〕

具禀旧县户头孔毓昆族人孔传彬孔继法

禀为恳 恩移会以免当差以广

皇仁事。窃照孔氏子孙，蒙

皇上崇儒重道，凡练地等差，概免充膺。屡奉

大宗主晓谕，并传谕 族长 举事以及六十户户头户举不时查察。凡族间有见利忘义情甘充当差

役者，详报革除。并奉祖训，凡有此等自甘下贱者不许入谱入林正恐上负

皇恩，有玷 圣裔。今族人蒙 恩给札为旧县户头，更非族人可比。今有泗水县阎大如报族人

等三人当泗水县甲长之差，窃思族人等系曲阜县籍，即本县亦不应当差。今为泗水县之寄庄

户，岂敢违禁当差。族人具禀 恳辞，且将所 赐户头札符呈验，今将札符留住，不准辞差。

不得不据实陈明。倘蒙移文照例优免，感戴靡既矣。

皇恩不昧，圣裔攸光。家范肃整矣。伏乞
大宗主恩准施行。

乾隆三十四年十一月十四日

札付任县为族人孔传绪等优免差徭事

〔乾隆年间孔氏族人请优免差徭（六）（一四六四）之二〕

袭封衍圣公府为恩恩移文事。本年六月十六日，据族人孔传绪呈称，情因生等自乾隆八年修绪谱牒，蒙恩移咨总督部院，又奉各宪牌票到县，着另立圣裔粮册版图，凡杂派差徭，一应户籍里役，俱已照例立案优免。但当时党同为国家子民，以优免为重，以另立户名为轻，故此未立。所以至今凡遇差使，往往扳拉。虽蒙 县公累次出示，未免阳奉阴违。总因户名未立，与百姓杂然混处。为此叩乞

大宗主查案移会，上呈。等情据此，相应据情移会。为此札付贵县，烦为查卷施行。须至札付者。

右札付任县准此

乾隆三十七年六月十九日

圣公府行

阳谷县恩生孔传桂等稟为恳请行县优免差徭事

〔乾隆年间孔氏族入请优免差徭（六）（一四六四）之十四〕

具稟恩生孔传桂等寄居阳谷县北一都中四牌

稟为恳 恩行文以广 皇恩以彰 宪典事。切乾隆四年，蒙

皇上恩诏 宪典饬行，恐日久年远，复行派扰，故勒碑垂久，一切地亩差徭，概行蠲免。使书吏知有恩例，不敢复行派扰在案。今 本县太爷办理城工，书吏仍照地亩摊派生等。则摊差之端，从而而开。不惟生等当身不能免差，即世世子孙，亦欲免差无由矣。伏乞

宗主大人恩准行文本县，代恳太爷格外之恩，优免生等，则皇恩普被， 宪典深长， 宗主之德亦并垂不朽矣。上稟。

乾隆三十八年十月

族人孔兴珍
日具稟恩生孔传桂
族人孔兴则

族人孔传浩禀为恳请转详免充各项差役事

〔乾隆年间孔氏族人请优免差徭（六）（一四六四）之十五〕

具禀古城户族人孔传浩住古城村

禀为恳恩豁免差役以庇圣裔事。切身于三月十六日被旧县耆老张德路报充耆约。窃思圣贤后裔，从无充膺兵丁、衙役、练地、乡耆之例，所以别圣裔于凡民也。一旦遽改前例，以充耆老，不惟族人蒙辱，即大宗亦且无光，而

圣祖在天之灵亦已不安矣。恳乞

仁明宗主恩准转详，永免差役，则阖族蒙恩。而族人之感戴无既矣。上 诉。

乾隆三十九年三月 日

移曲阜县为族人孔继志恳请优免耆老事

〔乾隆年间孔氏族人请优免差徭（六）（一四六四）之一十一〕

袭封衍圣公府为禀明转移俯准优免事。据大宗户本爵府族人孔继志禀称，窃志住崇圣社二甲张曲村，素守本分，力田为业。一切衙门事宜，毫不谙练。并且一字不识，忽被练地齐复孝、孔传沛报为耆老一名。本县正堂现在差押。俯念志平生碌碌，何知时事，而叨列圣裔，且属大宗支派，不特颜面攸关，实有玷辱圣门。势处无奈，理合具禀。伏乞恩赐转移免充，感戴无既。等情据此。查孔继志住居崇圣社张曲村，系本爵府近派宗支。今该处练地齐复孝等，禀报继志充膺耆老。兹据继志具禀恳免前来，相应备文转移。为此合移贵县，烦为查照来文事理，希将孔继志报充耆老，俯赐优免，飭令另行选报。实为妥便。须至移者。

右 移

曲阜县

乾隆四十三年三月十四日

圣公府

移大名府为优免长垣县孔里等村差徭事

〔清朝时期直隶长垣定兴两县生员等藉名助修境内孔庙请免差徭

（一四五五）之二〕

袭封衍圣公府为据实陈禀俯赐钧夺转移优免事。据长垣县生员殷可礼、监生孙克谨、焦孝先、檀治世、杨秉秀等禀前事禀称，切生等系长垣县孔村里户人，缘本村有学堂冈，冈上有至圣先师文庙一座，乃昔年四子言志之遗迹也。公爷缘疆域间隔，不克射亲致祭，向委学录一员，专主祀事。此冈居垣邑孔村里中，向来孔村里学堂冈墙里村、单家寨、杨家楼、殷家庄五村户人，专供

文庙差事，由来已久。今春据学录具禀，以垣邑冈上庙宇墙垣颇多坍塌，应请确估修理。迨至仲夏，蒙公爷委官赴庙查勘，庙宇墙垣委系渗漏坍塌，应请设法修理。当经生等孔村里五村户人，公同回明委官。查

文庙坐落孔村里中，向来祭祀，蒙公爷委学录一员，专主祀事。本县县主暨孔村里五村居民，亦均各敬谨肃成，以供祭祀。如有应需夫役，俱出孔村里居民，至遇修理

文庙，运送料物等项支应，车辆往来盘费草料，并有每岁三月初十日，村民祭祀

至圣备办祭品献戏等项，一切需费，俱出孔村里五村庄。查县治共六十里，外有五十九里，皆不与焉。是以向蒙本县恩免生等五村各项大小差徭，立有碑碣，日久年湮，事难循旧。今遇大差，孔村里与五十九里概行派办，则优免之典渐恐废隳。理合禀明。叩乞恩赐钧夺，俯准转移优免各项差徭。俾孔村里等五村居民，专供

文庙差事，自必踊跃从事，争先恐后，以昭诚敬。伏乞钧夺。等情到本爵府。据此，查长垣县孔村里有学堂冈，冈上向有

至圣文庙一座，设有学田，以供祭祀。凡春秋祀典，缘疆域间隔，不克躬亲致祭。本爵府向委学录一员，专主祀事。至供役

圣庙者，优免之例，自汉迄明，代有旷典。我朝定鼎，百年于兹，

尊师重道，超轶前古。凡各上游暨地方有司，莫不加意维持，以示优异。今夏本爵府曾委员前赴长垣县学堂冈查勘，据禀

文庙殿宇颇多渗漏，围墙亦多坍塌。应请设法修葺。将来办理工程，正资该庄衿民，并力办理。查孔村里等五村庄衿民，向来

文庙祭祀，一切应需夫役，以及修理工程，运送物料车辆盘费，俱出该里衿民，均属情愿。是以孔村里等五村庄，凡地方大小差事，向邀恩免。立有碑碣，因日久年湮，事难循旧。今遇差徭，将孔村里等庄与五十九里概行摊（摊）派，则优免之典，渐次废隳。是孔村里等庄，不无偏累之苦。既无优免之典，自必呼应不灵。查该县统计六十里，拨此五村免其徭役，俾使

专供

文庙之役，则该村居民，自必更当踊跃。伏念

贵府，为斯文宗主，吾道干城。圣门一切，仰赖维持。兹据该县衿民具禀到案，除移会长垣县外，理合移请贵府，烦为查照来文事理，希即转行该县，循照往例，将孔村里等五村庄，凡大小徭役，免其派办。俾使专供学堂。

文庙差事。则

圣贤遗迹不致隳废，燕尝永固。在孔村里等五村庄衿民，无重役之累，自当衔感洪仁。而本爵府亦佩德匪浅矣。须至移者。

右 移

大名府正堂

乾隆四十五年十一月二十九日

圣公府行

八品执事官孔毓灏申为查明平阴孔家集孔氏实况请移文优免事

〔乾隆年间孔氏族人请优免差徭（七）（一四六五）之十一〕

八品执事官孔毓灏为查明回覆事。切有平阴县族人武举孔毓栋等，为优免徭役呈请移文勒石等情到府，当蒙移文去后。旋据平阴县申覆，籍隶平邑者数百户，身充书役马夫者甚多。且有异姓乱宗，碍难一体优免前来，于本年四月初九日蒙札委飭查。职遵赴该处查孔毓栋九世祖孔彦斌，自明永乐间由仕平阴，因为家，居址孔家集，坟墓坐落村前村后。又有新林可稽。其中并无身充贱役及异姓乱宗情事。查平阴先令虽有孔姓为此者，俱系同姓不同宗之人，与孔毓栋等一支绝无干涉。职逐一查明访切，复亲诣该林查验碑碣支图，与访查无异。遂取具彼支族长甘结，户口花名清册，一并申覆。可否援例准其优免，再为移文彼县伏候

大宗主鉴察施行。

乾隆四十九年十二月 日

家庭族长稟为户头办理修谱恳请移县免差事

〔重修孔氏大谱办理收回旧谱事宜（二）（〇七九二）之二十一〕

三品执事官兼家庭族长为稟明事。本年本月初一日口孟村户头孔继楠、大宗户头孔广淮、宫端户头孔与来、华店户头孔继彬、蔡庄户头孔毓安同稟前事稟称，切族等现蒙飭发修谱格册，正在传散间，有县差传提，充膺耆约等差被押。族等忝系 圣裔，例不充膺杂差。且现在办谱，合口稟明。各等情到职。据此，职伏查本年八月二十日，蒙

宗主爵宪牌委严查族众，恐有干犯法纪者，查照修谱旧规，现逾小修之期，已距大修伊迳，即行查修等因。蒙此，业于十月十五日蒙 宗主爵宪当堂飭发格册办理在案。所有孔继先、孔继伦、孔传泗、孔传德、孔传绪、孔传彬、孔继文、孔广教、孔传桐均系选充户头，正在办谱之人。且 至圣裔向不充膺杂差。兹据具稟前来，理合据情转详。为此具详。伏乞 宗主爵宪电鉴移会施行。须至详者。

右 详

袭封衍圣公府

乾隆伍拾叁年拾壹月初壹日具详家庭族长孔贞梓

移曲阜县为免孔继先等县差以资修谱事

〔重修孔氏大谱办理收回旧谱事宜（二）（〇七九二）之二十二〕

袭封衍圣公纪录一次孔 为据详移会事。本年十一月初一日据三品执事官兼家庭族长孔贞梓详称，本月初一日据孟村户户头孔继楠等禀称，切族现蒙宗主饬发修谱格册，正在传散，有县差传充耆约等差，现在被押。族等忝在 圣裔，例不充膺杂差。且现今办理修谱事宜，理合禀明，转详。等情到职。卑职伏查孔继先、孔传桐等，俱系圣裔，例不充膺杂差。且现系选充户头，正在办谱之时，理合据情转详。伏乞爵宪移会施行。等情到本爵府。据此，查孔继先等俱系 圣裔，例不充膺杂差。且均有饬办修谱事宜，不克分身。拟合据情移明 贵县，烦为查照旧例，将孔继先、孔传桐等差务免其充膺，即行释宁，以资办公，实为德便。须至移者。

计移开

右 孔继先 孔继伦 孔传桐 孔传泗 孔传德 孔传绪 孔传彬 孔广文 孔继文
移

曲阜县

乾隆五十三年十一月初二日

圣公府行

衢州世袭翰博孔广杓申为送谱铃印恳请移免差徭事

〔乾隆年间孔氏族人请优免差徭（六）（一四六四）之三十〕

衢州孔氏世袭翰林院五经博士纪录一次孔广杓为呈送谱牒恳请铃印援例移免地方差徭事。据

寄居浙江衢州府开化县族人孔传旺呈前事呈称，切照南宗

至圣苗裔，自宋南迁至今，户多丁繁，俱皆星居散处，流寓不一。欣口

圣朝尊礼

先师，加惠苗裔，无论流寓何处，一切杂泛差徭，概行优免。兹旺实口圣裔，名在谱牒，由江西

铅山分支，现今寄居衢州府开化县三十二都十里铺地方。于乾隆五十一年三月间，续修族谱可据。伏查铅山子姓，曾于乾隆十七年五月间，蒙宗主详请

衍圣公府，将谱牒盖印，并蒙 衍圣公颁给府字九号给帖壹张，帖给铅山四十都孔毓伟收执在案。今旺六十六代祖孔兴显，又迁于开邑居住，事同一例，若不早为呈明，恐致将来鱼目混淆。理合呈验谱牒，伏乞据情照例详请

衍圣公盖印核发，并赐文移知开邑，优免里役杂差。

计呈验家乘四部，计八本，给帖一张。等情到职。据此，本职覆查孔传旺谱系，确系真正子姓，现在寄居开邑，并无假冒情弊。兹据前情，理合备文详请
大宗主给帖盖印收执，仍祈知照地方官，嗣后凡遇杂泛差徭，照例豁免，以维成例而示优异
实为公便。施行。须至申者。

计申送

请盖印信谱牒捌本

抄录原给铅山子姓帖一张

右 申

袭封衍圣公府

乾隆五十五年三月初四日

移郛城县为孔衍润等实系流寓郛邑族人应予优免差徭事

〔山东省各县孔氏族人申请续修支谱（四）（〇八六三）之十九〕

袭封衍圣公纪录一次孔 为恳恩移会优免事。本年二月十一日据孔衍润等呈前事呈称，切族等业蒙移查本县修辑支谱，虽寄居郛邑，实一本同源。凡流寓族人均荷行文优异。伏乞恩准移文本县，优免一切差徭，感戴无既。等情。据此，查孔衍润等系本爵府族人，寄籍贵治，均属

先圣后裔，向荷维持，并准

贵县移送该族并无过犯印甘结在案。兹据具禀前情，拟合移会。为此合移贵县，烦为查照，俾得均邀一体优免，实为德便。须至移者。

右 移

郛 城 县

乾隆五十六年二月十二日

定陶县孔兴淳等呈为恳请行文曹州府准予优免摊征帮办银两事

〔山东省各县孔氏族入申请续修支谱（四）（〇八六三）之二十三〕

具呈定陶县族人生员孔兴淳孔兴巩等

为恳恩援例行文优免事。切族人流寓定陶，孔氏优免向有成例，以故历任太爷凡

钦工河料无不照例豁免。即如乾隆四十八年定陶县筑护城堤，后又疏通本县南北两道挑河，挑挖

赵王河及征收挑挖赵王河银，无不蒙现任陈太爷援例优免，有案可查。目今摊征帮办曹、单

两县银两，该房将族人一例派出。族人具呈本县陈太爷台下，恳 恩宽免。蒙批，不准。伏

思此项银两，陶邑该银有限，孔氏优免业有旧例，何难豁免族人。且南曹县系临河县，尚未

派及孔氏，岂定陶县族人，独不能宽免也。况向来曲邑

大差，族人无不踊跃争先，如三十六年

东巡大差，族人捐修

祖庙。蒙

大宗主行文曹州府，转飭定陶县将陶邑族人概行免差。四十年

翠华东巡，释奠

阙里。蒙

宗主将族人粮册提到公府，使族人帮修

祖庙，转谕本县将族人差事一概豁免。今陶邑摊征银两，仍恳 恩

大宗主行文曹州府援例优免。庶旧例不坏，族人亦不至一身两役，口恩无既，上呈。伏乞
仁明大宗主恩准施行。

乾隆五十六年六月 日具

曹州府咨复为不得优免定陶县族人摊征帮办银两事

〔山东省各县孔氏族人申请续修支谱（四）（〇八六三）之二十一〕

特授曹州府正堂加五级纪录十次蒋

为咨覆事。乾隆五十六年六月十一日准

贵爵府移开，据定陶县族人生员孔兴淳、孔兴巩呈前事呈称，切族人流寓定陶，孔氏优免，向有成例，以故历任太爷凡

钦工河料无不照例豁免。即如乾隆四十八年定陶县筑护城堤，后又疏通本县南北两道挑河，挑挖赵王河及征收挑挖赵王河银，无不蒙现任陈太爷援例优免，有案可查。目今摊征帮办曹、单二县银两，该房将族人一例派出，族人具呈本县陈太爷台下，恳恩宽免。蒙批，不准。伏思此项银两，陶邑该银有限，孔氏优免业有旧例，何难豁免除族人。且南曹县系临河县，尚未派及孔氏，岂定陶族人，独不能宽免也。况向来曲邑

大差，族人无不踊跃争先。如三十六年

东巡大差，族人捐修

祖庙。蒙

大宗主行文曹州府转饬定陶县将陶邑族人概行免差。四十九年

翠华东巡，释奠

阙里。蒙宗主将族人粮册提到公府，使族人帮修

祖庙，转移本县将族人差事一概豁免。庶旧例不坏，族人亦不至一身两役。今陶邑摊征银两，仍

。 恩恩大宗主行文曹州府，援例转饬优免，感恩无既，上呈。等情到本爵府。据此，查

至圣后裔散居各州县者，向邀优免，有案可稽。兹据该族人孔兴淳等以摊征帮办曹、单两县银两，

该房均经派出，具呈恳请转移前来，拟合据情移会。为此合移贵府，烦为查核转饬援例优免

该族人等摊征帮办银两，以维成例，而示体恤，实为公便。等因到府。准此，查此项摊征银

两，系

抚河二宪会奏，奉到

朱批，依议钦遵在案，非别项差徭可比。兹准前因，拟合抄奏咨呈，为此合咨

贵爵府，烦为查照施行。须至咨呈者。

计粘抄厚奏一纸

右 咨 呈

袭封衍圣公府

乾隆五十六年六月十四日咨呈

前事

铜山县族人孔毓文呈为请移县免差事

〔寄居江南各县孔氏族人申请续修支谱（一）（一〇三五）之十五〕

具呈族人孔毓文孔传开为恳 恩事。切念

至圣后裔六十二代孔闻举因游学至江南徐州府铜山县城北四十里降山前孔家庄居住，后人因差务查阅谱内；蒙 恩历代向例诸等差徭蠲免。至今有徐州府砀山县王平庄工料河帑二百余万，按地均作，五年征收。自五十六年起至六十年止，差役下乡严催押交。孔氏无奈，连交五六、五十七二年，交纳县库。今有闻举后裔孔毓文、孔传开等共领地拾顷有余，今族人无奈，理合呈明。叩恳

宗主衍圣公电鉴行文，乞恩免派。施行。

乾隆五十七年十月十一日

批查此项银两业经奏明奉

旨钦遵在案，非别项差徭可比，例难优免。该族人等已完过两年，当属急公。仰即按年完纳，毋得观望，妄希免派，致滋事端。

范城县洙泗学录孔传述禀为恳请移县免差事

〔山东省各县孔氏族人申请续修支谱（五）（〇八六四）之十一〕

□□原任洙泗学录孔传述系黄门户〔缺〕范城县大猪潭

禀为地保扳派恳 恩移会照例优免事。切职虽在范邑，实系黄门户族人，故自迁范以来，历来县父母一切杂务差徭，均行优免，迄今 典例文存工房，碑立府城文庙。今岁四月间，有荷邑四氏学生员孔传铭以详陈条例恳恩优免等情，具呈宪台案下。蒙批，查 先圣后裔凡本名地而除正供之外，一切杂派差徭同帮料运脚均在优免之例，其余别户亦不得借名影射，仰布政司核明飭遵具报。金批昭然，而地保汤坤、李和众复为扳派米车。朦官藐例，恳恩移会，照例优免，以垂永远。伏乞

仁明大宗主恩准移会。永感。上呈。

乾隆五十七年十一月初四日

准移县优免

鹿邑县族人孔继祖等呈为恳恩移会优免事

〔寄居河南省各县孔氏族人申请续修支谱（三）（一一四〇）之一〕

具呈归德府鹿邑县族人

监生孔继祖
武生孔传鲁

孔传家
孔传礼

孔传宪
孔继永

孔传三等

呈为恳恩移会事。切族等寄籍豫省鹿邑，溯厥由始，实自三十五代祖讳贤。生于曲阜正谱嫡派，由儒籍历仕深州刺史，卜居宁陵。至五十五代祖讳克公因元末兵荒，避土寇之乱，迁于鹿邑，爱其风俗淳朴，遂以为家。生子五十六代祖讳希原，以嗣以续递传至今。于孙蕃衍，耕读为业。至于地方杂差，族等遵奉顺治元年

恩旨蠲复徭役相循期于优渥之例，敬谨办理。荷蒙历任各县主轸念圣裔，援照豁免。以故族等虽属鹿邑流寓，仍守儒素遗风，安静自爱，从无滋事干预之处。第恐逾时渐远，恩例易湮。兹族等查得归德府商丘县

先祖微子庙墓迁守孔氏族人一支主奉祭祀，荷蒙先太宗主札行豁免徭役，刻有碑碣，载在志乘。仰恳 鉴照，垂念族等宁陵宗派系出阙里，有水源木本之义。俯赐移会飭承立案优免徭役。树立碑记，以垂永久。有以克副

盛朝尊奉

先圣崇儒重道泽及后昆至意，则感赖

宗主大人关照宗族维持

恩例之德，更自靡有既极矣。伏乞

宗主大人恩准施行。上呈。

计呈碑摹一张

嘉庆贰年叁月

日

东省运河道札投效州判孔宪坤为漕道断流务速来济听候办事

〔族人孔宪埜投效东河河工（一三二二）之二〕

钦命山东通省运河兵备道策 札

投效州判孔宪坤 知悉。照得河南睢州上汛，现在漫溢，水归南岸。曹工现已断流，济宁以南被淹，纤道水无来源，消涸自速。所有两岸纤道，亟应兴办，以备来春粮艘挽拽。必须重运未到之先，一律完竣。为期无几，转瞬即届。所有上年投效运河各员，应即迅速来济，按照签掣原派工段，如式赶办。即派入闸坝人员，工完均有保固之责，亦应来工协同办理，庶昭慎重。除隔省人员一时未能周知，业经本道详请

河二宪分咨檄调，定限十月内齐集兴工，以便造册咨

部外，合亟札知。札到该员即便遵照兼程来济，听候办工。毋得迟违。致误

钦工。切切。特札。

嘉庆三年九月十三日

河督咨为转飭投效河工各员速赴济宁州以待兴工等事

〔族人孔宪埜投效东河河工（一三三一二）之六〕

兵部侍郎兼都察院右副都御史总督河南山东河道提督军务司马 为

详清分咨檄调事。据山东运河道策丹详称，奉本部院牌开，嘉庆三年七月初二日，准

户部咨开，投效各员，应送履历清册，应解部饭每两三分银两。节经本部叠次严催，迄今一载，仍未解部，殊属任意迟延。应令该督迅即严催，造具各该员履历，并捐年月日清册，及应解饭银，速即解部，毋任再延。等因。蒙此，除将改拨黄河投效同知孙豫元等一百十六员部饭银两，应听开归河北、兖、沂三道，就近催缴外，所有留办运河纤道各员，遵即专差妥役，逐加访查。内有现住济宁者，有随父兄亲属任所及游幕各属，并有已回原籍者，其应缴三分部饭，内有照数缴库者，亦有尚未完缴者，同各员年貌三代及捐年月日，有已经开送及尚未开呈者，拟合统造总册，于各员名下分晰注明详送。再查山东曹汛漫工，业已断流，即日堵合。下游漫水，日见消耗，运河两岸，纤道渐次涸出，均应次第兴办，以备来年重运挽拽通纤。所有前项人员内，已经认工签分段落者，固应早为来济，即派办闸坝人员，亦应先

期到此，以待兴工，及早完竣。理合一并详请鉴核，即赐分咨檄调各员，迅速赴东，缴完部饭，及开送年貌原捐月日，以便汇造详咨起解，并候办理工程。洵为公便。等情到本部院。

据此，查各员应缴部饭银两同履历捐年月日清册，叠准

大部咨催，亟应起解咨送。且纤道工程，现已涸出，即日勘估兴修。运河投效人员，均宜迅速来东。兹据前情，所有册造

贵公府人员，拟合开单移咨。为此合咨

贵公府，请烦查照，希将单开各员分别转饬，迅即催令速赴山东济宁州，听候分派办工。其应缴部饭银两，速为完缴。至年貌二代捐年月日，亦即开送清册，均交运河道衙门汇造起解。幸勿稍延。仍祈示覆施行。须至咨者。

计粘单一纸

右 咨

衍圣公府

嘉庆三年十月二十三日

河南淮宁县族人禀为恳移立碑以存永久事

〔寄居河南省各县孔氏族人申请续修支谱（三）（一一四〇）之七〕

河南陈州府淮宁县仪派大宗户族人

孔传贞
孔传钿

大宗主大人案下为恳 恩移请立碑以存永久事。切族等寄居河南，实系阙里一脉。于乾隆五十九年蒙取本县印甘各结，重修谱牒，照例移县优免在案。极荷本县县主援例即将一切差徭概行优免。今查河南仪封、宁陵、鹿邑等处俱请立碑学宫，以志不朽。族等窃思虽现蒙 本县县主作养之恩，恐日久事远，有失成例。为此，伏乞

大宗主恩准移县，立碑以垂永久。则闾族焚顶。上呈。

淮宁县管理户事孔继道

孔广博

孔昭炫

孔广恩

嘉庆四年正月

日

孔广载
孔传寅

河南济源县族人孔传瑞等呈为恳恩援例优免事

〔寄居河南省各县孔氏族人申请续修支谱（四）（一一四一）之二〕

具呈河南济源县族人孔传瑞孔继元等

呈为恳 恩再行移会优免事。窃族等于嘉庆四年蒙准修辑支谱，当蒙移免杂泛差徭在案。第将族等仍与齐民一例报充乡保。伏思 圣贤后裔，例无充当贱役之理，如有自行认充者，不准入谱。至遇有大差，自应遵照，不敢抗违，所有杂泛差徭及乡保等役，理合再恳 宗主大人移会，倘蒙 本县天恩优免，合族均感。

嘉庆七年二月十一日

移归德府为请照例免派鹿邑族人土方睢汛事

〔寄居河南省各县孔氏族人申请续修支谱（四）（一一四一）之三十三〕

袭封衍圣公府为移查事。嘉庆七年十月二十九日据河南归德府鹿邑县族人监生孔传兴等呈为云云。等情到本爵府。据此，查商丘、鹿邑两县孔氏族人，向奉 部文蠲除一切差徭，树碑微子庙中，历有案据。今鹿邑县所摊派开封土方，并睢汛帮价两项，如果系

奏明与东省漕工帮价摊入地丁征收之款，自难援例优免。若系寻常之件，豫省土方帮价屡有摊派齐民承办，该族人等既未经前县派及，今忽重复摊派，则此项银两似可仍照旧例优免，以仰副

圣朝优恤圣裔之至意。兹据前因，拟合移查，为此各移

贵府，烦为查明此项土方睢汛两项应否优免之处，檄飭该县遵照办理，实为公便。如若不能优免，希即查明孔传兴等应完若干银两，一并赐覆。望速施行。须至移者。

右 移

归 德 府 正 堂

嘉庆七年十一月二十九日

移归德府为请即覆鹿邑族人摊派睢汛帮价银应否优免事

〔寄居河南省各县孔氏族人申请续修支谱（五）（一一四二）之十一〕

袭封衍圣公府为移催事。嘉庆七年十二月二十九日，口贵属商丘县移开云云。等因到本爵府。准此，查此案业经数月未准移覆，拟合移催。为此备移

贵府，希烦查照先令文内事理，即为查明鹿邑县奉文摊征开封土方，并睢汛（汛）帮价两项银两，该县孔氏族人孔传兴等应否优免之处，即行赐覆，以便照办。望速施行。须至移者。

右 移

归 德 府 正 堂

嘉庆八年五月十二日

圣公府行

归德府呈送鹿邑孔传兴等应完开封土方睢汛帮价银两清册事

〔寄居河南省各县孔氏族入申请续修支谱（五）（一一四二）之十二〕

河南归德府为移查事。嘉庆柒年拾贰月初陆日，蒙袭封衍圣公府行查鹿邑县奉文摊征开封土方并睢汛帮价两项银两，该县孔氏族入孔传兴等应否优免之处，檄飭该县查明遵办。如不能优免，将孔传兴等应完银两若干，一并赐覆。等因到府。蒙此，遵即转飭查覆去后，兹据鹿邑县知县叶灼详称，遵查

圣裔孔氏奉文蠲除原指杂派差徭，如军需车马解部硝斤之款，一概免办。所有嘉庆贰年挑挖开封等处城濠土方，系奉前抚宪奏明，分庚申、辛酉两年在于地粮内摊征归款。伍年连闰分每粮银壹两摊征银伍分玖厘壹忽伍线贰尘伍埃。陆年分每粮银壹两摊征银伍分捌厘捌毫陆丝陆忽柒微叁线叁沙。又嘉庆叁年睢汛漫工秸麻加价，亦经前抚宪奏明，按地粮摊征。以柒年为始，分伍年征完。柒年分每粮银壹两摊征银壹钱贰分贰厘柒毫柒丝肆忽玖微贰线叁尘肆埃贰沙柒漠。以上城濠土方及睢工加价两项，均系摊入丁地征收之款，与寻常杂派有别，自难援例优免。乃孔传兴等以遵奉部咨树碑勒石有案，抗不输纳，并非卑县前任各令未经派

征，卑职任内始行催缴，实系不应优免之项。兹奉檄飭，理合将孔传兴等应完摊征城壕土方及睢工加价两案银两，分别造具清册，具文详送本府赐查核转覆，实为公便。等情到府。据此，卑府覆查无异，正在具文转覆间，兹奉差催，所有该县送到孔传兴等应完开封土方并睢汛帮价两项银两数目清册，拟合具文交差呈覆。为此备由具呈，伏乞照验施行。须至呈者。

计呈送 清册贰本

右 呈

袭封 衍 圣 公 府

嘉庆捌年陆月初九日知府 富忠阿

移查事

归德府鹿邑县造送孔氏后裔孔传兴等应完摊征土方加价银两数目清册
归德府鹿邑县为移查事。遵将卑县孔氏后裔应完摊征城壕土方银两，理合造具清册，呈送查核。须至册者。

计开嘉庆伍年连闰分

卑县额征丁地银肆万捌千壹百玖拾伍两伍分叁厘

摊征土方银贰千捌百肆拾叁两伍钱伍分捌厘

核计每丁地银壹两，应摊征土方银伍分玖厘壹忽伍线贰尘伍埃。

孔氏后裔孔传兴等共叁百叁户

应完民卫更名等项丁地银壹百陆拾伍两柒钱捌分玖厘捌毫

应摊征土方银玖两柒钱伍分肆厘贰毫

嘉庆陆年分

额征丁地银肆万柒千肆百捌两壹钱陆分捌厘

摊征土方银贰千柒百玖拾两柒钱陆分肆厘

核计每丁地银壹两应摊征土方银伍分捌厘捌毫陆丝陆忽柒微叁线叁沙

孔氏后裔孔传兴等共贰百玖拾伍户

应完民卫更名等项丁地银壹百伍拾捌两捌钱捌分肆厘陆毫

应摊征土方银玖两叁钱叁分贰毫

具

右册

嘉庆捌年伍月

日知县叶灼

归德府鹿邑县造送孔氏后裔孔传兴等应完摊征土方加价银两数目清册

归德府鹿邑县为移查事。遵将卑县孔氏后裔应完摊征睢汛伍堡漫工加价银两，理合造具清册，呈送查核。须至册者。

计开嘉庆柒年分

卑县额征丁地银肆万柒千肆百捌两壹钱陆分捌厘

摊征加价银伍千捌百贰拾两伍钱叁分肆厘

核计每丁地银壹两应摊征加价银壹钱贰分贰厘柒毫柒丝肆忽玖微贰线叁尘肆埃贰沙柒漠

孔氏后裔孔传兴等共贰百玖拾捌户

应完民卫更名等项丁地银壹百陆拾壹两肆钱肆分伍毫

应摊征加价银拾玖两柒钱柒分捌厘柒毫

右具

册

嘉庆捌年伍月

日知县叶灼

札鹿邑县为应征睢汛价银已饬族人完纳嗣后差徭尚望优免事

〔寄居河南省各县孔氏族人申请续修支谱（五）（一一四二）之十三〕

袭封衍圣公府为移送事。嘉庆八年六月十五日，准贵府宪移开云云。等因到本爵府。准此，兹已饬令该族人等将应完嘉庆五年分摊征土方银九两七钱五分四厘二毫，嘉庆六年分摊征土方银九两三钱三分二毫，应完嘉庆七年至十一年共五年摊征睢汛加价银九十八两八钱九分三厘五毫，二共银一百一十七两九钱七分七厘九毫，一并办齐，专差移送完纳。至该族人等嗣后凡遇一切杂泛差徭，尚望照例优免，以昭体恤。为此札付

贵县，希烦查照文内事理，将前项应完银两照数查核收纳。仍望赐覆。须至札付者。
计移送

银一百一十七两九钱七分七厘九毫计三封

右札付河南鹿邑县准此

嘉庆八年七月二十一日

裕州族人孔继文稟为恳请援例移会优免差徭事

〔寄居河南省各县孔氏族人申请续修支谱（七）（一一四四）之十三〕

具稟裕州族人监生孔继文

稟为恳请援例恩准移会事。切族等自蒙 恩移会本州酌示优异以来，凡遇差徭，俱蒙优免族感戴无既。忽于三月二十三日，因有解囚犯一差，本里地方王珍派族牛车二辆，催办太急。

族呈明本州 大老爷，恳请援例优免。缘车牛皆在佃户陈则曾、郑学等家中，所以蒙本州批云，既系阙里支派，着优免本身差徭可也。族蒙批之下，因思本州既有此批，自当遵照，此次供备车牛，无庸远途禀达 钧听。但伏念族虽寄藉裕境，而渊源本出洙泗，嗣后倘得仰邀一体优免，不致混同齐民，事事当差，以臻永久。实为德便。不得不匍匐来曲，恳请

宗主大人援例移会施行。

嘉庆九年五月二十九日

杞县族人呈为恳恩移会府县循例优免差徭事

〔寄居河南省各县孔氏族人申请续修支谱（八）（一一四五）之五〕

具呈河南开封府杞县族人宗门生孔传藻孔继带统泰等呈为恳口移咨援例优免以广 皇仁以绵 圣

泽事。窃孔氏一族，自汉、唐、宋、明以来，历有典例，期于优恤。恭遇

皇清鼎兴，纶恩倍渥，不但隶籍山东，即寄居他省，凡系

先圣苗裔，悉照阙里族人，一体优异。顺治元年，蒙巡抚山东方大猷具题，圣门典例，俱应相沿，期于优渥。奉

圣旨是，钦此钦遵通行在案。康熙二十三年 户部行文申飭，仍照顺治十三年旧例蠲免。四十七年蒙 户部复行文申飭，仍将地亩杂项差徭，概行蠲免。乾隆五年 工部行文，黄河料物，照例蠲免。又蒙巡抚 硕别邑寄居圣裔，一切地亩除大粮糟米外杂项，一概豁免。具立碑示禁，仍出具碑摹送查。五十七年蒙巡抚觉罗 吉行文，

至圣先师后裔，凡本名下地亩钱粮除征正供外，其余一切地亩杂派差徭口帮料运脚，均在优免之

例。其别姓产业，亦不许藉名影射。此我

朝恩例相传无替者也。惟是商丘于康熙三十七年，鹿邑于乾隆五十八年，皆志 恩于 黄宫。淮

宁于嘉庆五年志 恩于弦歌台。以及太康等县皆蒙

大宗主移会优恤，均被豁免差徭。族等亦前蒙

皇上天恩，但未蒙

大宗主移会本县，是以未沾实惠。为此冒昧陈情，恳乞

大宗主俯查成例， 恩赐移会 府县，与商丘等县一体优免，同沾雨露，勒石 黄宫，以垂永远。

庶

国朝之恩例常昭，

圣祖之德泽永存，而

大宗主之慈惠亦永感无既矣。

嘉庆九年七月二十六日

禹州族人稟为刁绅欺灭圣裔攀差捏控恳恩移究事

〔寄居河南省各县孔氏族人申请续修支谱（九）（一一四六）之十八〕

具稟河南禹州族人毓书

为据实陈明恳请移会事。切族等于嘉庆五年修序支谱，蒙 恩铃印，移会本州。当蒙本州恩施优异，族等感戴无既矣。詎意有刁绅陈中良、李永年、胡景宸等，攀拉差事，诬控数次。屡经明批不服，及呈阅宗图， 批，查阅孔毓桐系圣门后裔，自应一体免其差徭，以示优异。着落地方，即传谕李永年等毋再诬控可也。以上皆前任 杨太爷所批。至去年六月间，李永年稟称，为苦乐不均事。蒙 孟太爷 批，孔毓书果于嘉庆五年间谋免差徭，该生等因何不即具稟，至本年六月间，始行呈控耶。据称已难遽信，况此案既经前州批定，即当恪遵办理，毋庸再为翻读，不准。奈李永年仍抗批再读， 又批，前批已明，毋庸再读，不准。詎意李永年又与陈乾诬控到开封府，当蒙府 批，仰禹州确查旧章飭办，无任朦混滋讼。当经本州孟太爷堂讯，李永年、陈乾出具供结供，结得前不知诬控，今蒙讯明，始知现有家谱，谱有明文，永不敢攀拉差事，再控干究。等情已悉，案已结矣。詎料胡景宸之子胡振基，放炮约众，

科斂钱文，誓灭孔氏。唆挑李永年、陈乾越诉在藩台台下。为假充圣裔仗谱免差叩提讯究事。蒙批，支应差徭，自有旧章，仰开封府即飭该州查明，秉公讯断具报。毋任细事上渎。现在本州太爷奉批，传唤一案人等到案候讯。窃思凡系圣裔，例异齐民，差之免与不免，应免与不应免，皆出自父母官之酌施维持，与伊等有丝毫之干涉乎。伊等数数烦渎，抗批不遵，结党上控，欺灭圣裔。如彼刁顽，不加严讯，何以知惩。族等修谱时，原蒙公府文行本州，施示优异。族不得不匍匐来曲，上叩

宗主大人恩准移会施行。

被禀监生李永年

监生胡景宸并伊子胡振基

陈中良

陈乾

抱禀孔毓德

嘉庆拾年闰陆月初叁日

开封府申为孔传旺等均已优免差徭并勒石营宫以垂永远事

〔寄居河南省各县孔氏族人申请续修支谱（九）（一一四六）之二十七〕

河南开封府为公愬鸿恩援例移免以广

皇仁事。嘉庆拾年肆月初捌日，蒙

衍圣公文开，嘉庆拾年叁月拾玖日，据陈留县族人孔传旺等呈称，切族等派出阙里，今逢甲子大修谱牒之期，业将族等迁豫缘由详叙，蒙准自修支谱，并行查族等本籍。蒙本县县主查明申送，并无违碍过犯各结，加具印结各在案。族思

圣贤后裔，原与齐民有别，例得优免地方壹切杂泛差徭。今族等已修支谱，所有地方差徭，仍求移免，并勒石志之，以垂永久。为此公具恳呈，伏乞宗主大人恩准移府，閤族感戴。等情到本爵府。据此，查

至圣后裔，凡有寄居别邑及外省者，俱蒙

圣朝优恤，所有壹切杂泛差徭，概行豁免在案。今孔传旺等，俱系

圣贤后裔，自应照例办理。兹据伊等恳请前来，拟合据情移会。为此合移贵府，希烦查照文内事

理，檄飭陈留县，准其壹体优免，勒石黄宫，以垂永远。实为德使。望速施行。并希赐覆。等因到府。蒙此，遵即转行陈留县确查具报去后，兹据该县申称，卑职遵即确查孔传旺等壹族，现有贰拾贰户，共有民田地拾壹顷柒拾陆亩，每年应输丁地正赋银陆拾伍两贰钱壹分玖厘，该完漕粮玖石玖斗肆升壹合，均系本人户名，并无借名影射等弊。除钱漕等款正项钱粮，例不准免外，其该族等应办地方壹切杂泛差徭，现在均已优免，并勒石黄宫，以垂永远。兹将孔传旺等壹族人户地亩钱漕数目理合开造清册，具文详报。等情到府。据此，卑府覆查无异。理合具文申呈
圣公查考。为此备由具申，伏乞
照验施行。须至中者。

计申送清册壹本

右 申

世袭衍圣公府

嘉庆拾年拾壹月初玖日知府诸以谦

公恳鸿恩等事

河南唐县族人孔广毅等稟为援例优免差徭事

〔寄居河南省各县孔氏族人申请续修支谱（十）（一一四七）之十八〕

具稟河南唐县族人孔广毅等

稟为恳请援例恩准移会事。切族等于去年修谱，蒙 恩铃印移会本县，当蒙本县优异。族等感戴无既矣。情缘完纳本年粮银外，有加价银项，又蒙飭令河工土方料价以及加价银项，概不优免。窃思圣裔贤后，例蒙优免差徭，以示别于齐民。此项银价，族等冒然承纳，恐负圣恩。欲不完纳，又恐迹涉抗差。为此再叙情由，恳请 宗主大人恩准俯赐明示，备文移会，以便遵照施行。

嘉庆拾壹年拾月 日

磁州申覆为仍依旧章不允孔传本免充地方头役事

〔寄居直隶省各县孔氏族人申请续修支谱（九）（〇九六二）之十九〕

直隶广平府磁州为再恳移会等事。本年拾壹月拾叁日蒙

袭封衍圣公府札开，本年拾月贰拾日据洙泗学录孔继殷偕族人毓贤、广恩等呈称，切族等虽寄居外境，实与阙里无异。伏念

国朝圣典，凡圣贤后裔，皆不许充当头役杂派差徭，此诚至优极渥之典也。族等虽居外境，亦系至圣祖苗裔。于柒月间遵甲子大修之例，修谱呈阅。当蒙恩移会磁州免办差徭。乃保正成美反串谋，特报载入谱中之传本，充膺地方头役。似此明系衙役舞弊朦朧州主也。族等伏思世居阙里者，固得仰沐

洪庥，恩及苗裔之典，而寄居外境者，亦思少沾余荫。切族等修谱之家，不过玖拾余户，现有谱牒可稽。即按谱名优免差徭夫役。伏乞恩准移会，罔族焚顶无既。等情据此，拟合据情移会。为此札付，烦为查照来文事理，希将孔继殷等谱内有名之人，酌异优免杂差，以示体恤，实为德便。仍祈见覆备案。等因。蒙此，查充膺保正地方贰项，向择人品诚实居心方正者，始能

准其轮膺，经理钱粮公务，迥非衙门头役壹切隶卒贱役可比，无碍上进之路。至于奉派壹切差务，缘直省近在

畿辅，差务殷繁，凡有差徭，均按亩分派，不能不借资民力。较之外省更有不同。历年办有旧章，由来已久，并非始于今日也。卑州于壹切地方事宜，皆仍其旧，未便稍有更张，致滋讼端。

伏祈

公台垂念壹方情形，因地制宜，壹切率由旧章办理，实为公便。缘奉前因，理合具文中覆。伏乞钧鉴施行。须至申者。

右 申

袭封衍圣公府

嘉庆拾贰年拾壹月拾玖日知州博尔多州判魏生辉管粮

署吏目袁谦巡捕

再恳移会等事

归德府申为呈送孔毓洙等应摊衡工加价清册事

〔河南孔氏族人按照置有田亩摊缴河工派款（一）（一六三四）之三〕

河南归德府为愚移知会以维恩例事。嘉庆拾贰年捌月贰拾陆日，蒙

宪台札开，本年捌月拾叁日，据柘城县族人孔毓洙、孔传书、孔传楠呈称，切族缘康熙叁拾柒年蒙

先太宗主咨会河南巡抚阎大人咨明 大部，奉 部文蠲除一切杂派差徭，树碑微子庙中。概行优免，永远为例。斯固历代宗主体恤族等之深情，实推

圣天子崇儒重道之至意。族等恪守成例，永沐鸿恩，诚盛事也。于本年适有摊派衡工加价一项，将族等粮名与齐民一体摊派。县主出示，系上宪奏明之款，催令刻期完纳。伏思族等地亩，本属无多，所摊派银两，亦自有限。即行完纳，何关轻重。第恐此端一开，致破成例。伏乞备文移府飭县，将衡工例孔氏摊派银两册提阅，则感戴无既矣外，并将碑文呈验。等情到本爵府。据此，查柘城县孔姓族人，于康熙叁拾柒年间，蒙前任河南巡抚阎 推念 圣裔，咨明 大部，奉准部文，将一切杂派差徭，概行优免。立碑微子庙中，永远为例。所有杂派

差徭，理应援例优免。今衡工加价一项，既经摊派，自应谕令该族人照数完纳。但不知孔毓洙等共应摊派若干，兹据前情，拟合移查。为此备移贵府，烦为查照来文事理，希即檄提柘城县衡工加价摊派银两册数，查明孔毓洙、孔传书、孔传楠等名下，共应摊派若干，赐移过本爵府，以凭飭令解缴本爵府，备文移送。实为公便。等因到府。蒙此，遵即转飭查造去后，兹据柘城县造册申送前来，并声明孔毓洙等各名下应完衡工加价共止拾陆两贰钱玖分陆厘，为数无几。若令其前赴完纳完纳，再行飭发，未免周章。现在该县自行就近催完，等情。卑府覆查无异，理合将送到清册，具文呈送宪台查核。为此备由具申，伏乞照验施行。须至申者。

计申送 清册壹本

右 申

袭封衍圣公府

嘉庆拾贰年拾壹月拾柒日知府富忠阿

愚移等事

元城县申复为孔广恩等应随众出夫整修河堤事

〔寄居直隶省各县孔氏族人申请续修支谱（一〇）（〇九六三）之九〕

直隶大名府元城县为申覆事。嘉庆拾肆年肆月拾玖日，蒙

爵宪札付内开，即将族人孔广恩、孔广德所摊修整河堤夫贰名，援例优免，以示体恤。等因到县。蒙此，查直隶临河堤工，除应动项兴修外，余皆民筑民修，通力合作。卑县境内卫河西岸，向有民埵壹道，每岁叁月间，无论绅衿士庶，壹体出夫修筑，以防卫水涨发，害及田庐。历久遵行，从无违抗。今岁各段堤工均经里民照例修竣，惟北峰村工壹段，计长拾捌丈，派夫贰拾伍名。内孔广恩、孔广德应出夫贰名，抗违不出，以致合村观望，延挨皆不赴工修筑。设将来河水异涨，溜势西趋，不特该村地亩被淹，即邻村邻田亦必同遭漫漫。正在详晰劝谕，兹奉札付前因，卑职伏查

至圣后裔壹切杂泛差徭，均系遵循旧章，向不派办。至修培堤埵，系各村民自行保护田庐，并非力役奉公及别项差使可比。即孔广恩等从前亦随众办理，今竟欲役使众力，代其兴修，以致村民啧有烦言，同时袖手。核其应出夫仅贰名，卑职不难代出，惟既紊久定之章程，里民势

必相率效尤，堤废水冲，于河防大有关系。现与

宪差详细陈说，亦云修堤原以自卫，理应与众共劳，并非官派差徭，何得意存规避。孔广恩等无可置辩，现已情愿出夫，遵照公办。除俟各工全竣，申请

道宪亲临查验外，所有接奉

宪札未能遵办缘由，理合据实申覆，伏乞

照验施行。须至申者。

右 申

袭封衍圣公

嘉庆拾肆年肆月贰拾陆日知县胡继曾

諭文安縣族人爲凡遇大差卽當遵照辦理并不得冒戴金頂事

〔寄居直隸省各縣孔氏族人申請續修支譜（一〇）（〇九六三）之二十六〕

諭文安縣族人孔傳瑞、孔繼賢、孔繼仁等知悉，案據該族人等懇請移免雜泛差徭，當經兩次移會

文安縣，酌示優異去后，茲于本年七月十九日准

文安縣申開，查此案前蒙札付，已將孔傳瑞等一切雜泛差徭，遵照免辦。惟縣屬千里長堤，系奉部

奏明無論歲修大修總照十一年所修工段，責成各該村逐年修筑。孔傳瑞等有應修十一年原辦堤工二十五丈，責成該村承修，孔繼名等自應遵辦等語。查該族人等忝屬聖裔，理宜恪守家範，安靜自愛，遇有

皇差軍需河工堤工各大差，理應首先踴躍承辦，以盡子來之職，以保田廬。孔繼名何得擅戴金頂，語多不遜，抗違攔阻，殊屬不識大体。本應移會嚴加究治，既承本縣優施，今本爵府亦姑且免究，合亟嚴飭。爲此諭仰孔傳瑞等，卽傳諭各族人等知悉，現准

文安县已将杂泛差徭免办，足征优异。凡遇

大差，则东省近支族人尚且遵办，何况尔等远支。嗣后该族人等即当遵照首先办理，勿失

圣裔之谊。倘敢仍前怙恶不悛，冒戴金顶，借端滋事，一经查出，定行移会本县，就近照例严行

究处不贷。毋违。此谕。

嘉庆十五年七月二十一日

圣公府行

札高淳县族人为着其赴公府面禀优免差徭事

〔寄居江南各县孔氏族人申请续修支谱（三）（一〇三七）之十八〕

札江南高淳县族人孔毓申、继趣、广兰、广械、广英、广钦等知悉，照得该族人重修支谱，业经印发去后，查谱内登载优免差徭，均系前明优免之文，

国朝未经理。现在所有一切杂差，是否有无优异，本爵府无从查办。合行专差札知。为此札仰该族人等，札到，立即星飞来曲，径赴公府将现在一切地方差务是何优异，详晰面禀，以凭酌办。并将所修支谱带缴一部存案备查。毋得违延。速速。此札。

嘉庆十五年十月初九日

圣公府

行

河南嵩县族人孔广先等稟为援例优免差徭事

〔寄居河南省各县孔氏族人申请续修支谱（一一）（一一四八）之三十四〕

具稟河南嵩县族人洙泗学录孔广先

稟为恳准移会事。切族等于嘉庆十三年十一月二十日修续支谱，当蒙文行本县，优异施行，闾族均感戴无既矣。今蒙本县酌余谷石，族等虽已奉公完纳，不敢不具实禀明。但圣裔贤后，例有优免。现在本境程氏贤后，优免无异，岂圣裔反等齐民乎。且此典原系

圣主鸿恩，族欲遵行，罔口输纳，大恐辜负

盛惠。为此恳请，伏乞

宗主大人恩准移会施行。

嘉庆拾陆年贰月 日

蠲免差徭碑记

〔铃印道光光绪朝代续修山东沂水县孔氏支谱（〇八九三）之二〕

钦命署理山东等处承宣布政使司按察使司加二级纪录八次张 为重申 为

恩例严禁扰累差徭事。顺治十三年山东前布政使司奉山东前抚部院耿 准 户部咨，查

先圣 先贤四氏后裔，以及庙佃两户，原与齐民有别，凡一切差徭，概行蠲免。等因。久经遵行在案。第恐日久弊生，间有书役妄行派扰之处，深为未便，合再申飭。为此示仰该州县并书役人等知悉，凡

先圣 先贤四氏后裔，以及庙佃两户，嗣后遵照旧例，遇有差徭，一体蠲免。如有妄行扰累者，一经告发，除将舞弊书役严行究治外，定将该州县严参，以示警戒。决不宽贷，各宜凛遵毋违。特示。

嘉庆二十二年十一月十六日示

五品执事官兼孔氏族长孔衍潢奉

袭封衍圣公府札委勒石

移曲阜县为练地扳扰请行责革并优免户头差徭事

〔嘉庆年间孔氏族人请优免差徭（二）（一四六八）之十二〕

袭封衍圣公府为恩恩移会援例优免事。本年十二月初八日，据蔡庄户头孔传梓稟前事禀称，切族系成公社住蔡庄村，务农为业，兼办户事。本月初六日忽有成公社练地孔毓明，硬派族充当车夫。族思族充当蔡庄户头，有札付承办户事，向不出地方差徭。今练地孔毓明，硬派族充当本县车夫。理合稟明，伏乞宗主恩准移会优免施行。等情到本爵府。据此，查

先圣 先贤后裔，向不出地方差徭，例久遵行。现在又经布政使司出示晓谕，通饬遵行在案。本爵府恐通饬之文，由府分饬贵县，未能即时奉到，特委员将

藩司咨送到告示送阅，并面嘱先行严谕各该社社差练地，不得仍前派扰。何以

贵县并不遵照，即为晓谕。仍任听该练地孔毓明硬将蔡庄户头孔传梓派充车夫，实属违例藐玩。兹据孔传梓具稟前情，拟合移会免派。为此合移

贵县，颇为查照来文事理，希将孔传梓车夫优免。并将违例妄派之该练地孔毓明，即行责革，以儆将来。仍祈将办理缘由赐覆备案施行。须至移者。

右移

曲阜县

嘉庆二十二年十二月初八日

圣公府 押

曲阜县移为县役孔玉明并无派差免予革除事

〔嘉庆年间孔氏族人请优免差徭（二）（一四六八）之十五〕

署兖州府曲阜县为移覆事。本年十二月初九日，准贵爵府移开，烦为查照来文事理，希将孔传梓车夫优免，并将违例妄派之该练地孔玉明即行责革，以儆将来。仍祈将办理缘由赐覆备案，等因准此，当即差传练地孔玉明到案，讯据孔玉明供，伊在乡雇车起运赈米，原雇孔传梓推车，后来孔传梓走到城里，不肯推车。伊即另雇别人，并无硬派情事等语。查练地孔玉明虽讯无硬派孔传梓充当车夫情事，但率行雇觅当差，殊属不合。当将孔玉明重责二十板。该练地雇觅孔传梓进城，因孔传梓不肯推车，即行另雇，尚与硬派有间。是以免其革役在案。所有讯办缘由，拟合备文移覆。为此合移贵爵府，烦为查照备案施行。须至移者。

右 移

袭封衍圣公府

嘉庆二十二年十二月十九日

移 押

永年县申复为叙明收缴孔广志谱牒缘由事

〔寄居直隶省各县孔氏族入申请续修支谱（一四）（〇九六七）之三十〕

直隶广平府永年县为呈覆事。道光陆年玖月贰拾叁日，奉

袭封衍圣公府 札付内开，本年玖月拾肆日，据寄居永年县族人尼山学录孔昭德具禀前事词称，窃族流寓永年，实系 圣裔。于嘉庆贰拾壹年呈恳修绪宗谱，蒙恩移会永年县主，援例免差，业经拾余载未有出差。忽于今年八月差役赴乡催派差徭，有同族广志、庆兰等赴县呈明恳免。不惟不准，反将谱追去，广志等现押班房。族不得不赴县呈明，叩乞赏文移县释还宗谱，感戴无既矣。等情到本爵府。据此，查该族人等是否应免差徭，向来自有定例。乃孔广志等赴案呈恳，必有冒昧不合之处，致被追谱管押。兹据前情，拟合移会察核。为此札付，烦为查照文内事理，倘孔广志等别无不法情事，希即发还原谱牒释放施行。等因到县。奉此，遵查卑县地方系通衢大道，过往差务殷繁，不得不借资民力。向系按地行差，均匀轮办。凡有衿地，准其减免杂泛差徭。如遇

大差，军需河工，向与民地一律摊办，历久遵循在案。本年捌月间，蒙

各宪札开，西口外逆回滋事，奉

旨派调吉林黑龙江官兵驰往剿捕，飭调卑县车马与邯鄲磁州连站在永邑之临洛关更换轮流应付。

等因，卑职因驿马不敷，兼之分起驰送，起数较多，难免劳伤疲乏。必须宽为预备，俾免临时缺误。随将奉调车马，循照历次办理兵差旧章，谕飭各村保地均匀轮雇。内有东乡孔家庄，票差皂役张玉堂飭传保地去后。旋据原役具禀，该村并无地方，只有向当保长之孔广志，抗不遵办，亦不服传唤。等情。卑职因兵差紧急，若任其抗违，势必相率效尤，贻误兵行，所关匪细。当即飭差严传孔广志到案，并有伊族孙孔庆兰亦自行赴县。随唤至当堂，查得孔广志、孔庆兰均带金顶。诘其系何功名，因何不办兵差。据称，伊等系孔氏后裔，从山东迁至县属孔家庄居住年久。嘉庆贰拾壹年，族人孔继诗等赴公府呈准，自修支谱完竣。经公府移会前县优免差徭有案。所以向来止完钱粮，不办差使。伊等本无功名，自修谱以后，给有顶带，谓之谱系恩生。并未领过执照。现有谱系呈验可凭。等语。随卷查嘉庆贰拾壹年拾壹月间，奉公府札付，以族人孔继诗、孔继续等请修支谱，如在籍并无过犯违碍情弊，取具该里邻甘结，加具印结，移送核办。等因。当经卑前县袁令飭查孔继诗已故，将孔继续及地邻传案讯明。孔继续虽未经自往山东认族，平素安分，取结加结呈送。旋于是年拾贰月间，奉公府札付内开，据寄居直隶永年县族人孔继续呈恳自修支谱铃印，以昭世守。等情到本爵府。据此，当经备文移查。旋准移送印甘各结在案，是以准其续修去后，今据修辑完竣，呈验前来，除铃印飭发外，拟合移会。为此札付，烦为查照。嗣后遇有杂泛差徭，仍祈优异，以示体恤。等因在卷。又卑县行差地亩曾经前任按村清查确数，分别衿民设簿登载，以凭按地办

差。检查嘉庆贰拾贰年以前县属东乡，并无孔家庄名目。其孔姓向在东乡东大山村内，按地行差。现有贰拾贰年东大由村地亩底册可证。核之贰拾壹年保甲册，孔姓户口亦编入东大由村牌内，并未另有村名。即拾捌年办理兵差，亦未有孔姓出头阻挠。自贰拾壹年冬间，据孔继续等呈准修谱之后，始有孔家庄村名，所云应行优异者，札付内指明系杂泛差徭，而军需等项，本无应免之例。且直隶差务繁重，凡缙绅士族止准优免杂差，遇有军需等差，例不优免。今孔广志等既称为孔氏后裔，无论有无功名，准其优免杂差，已足以示体恤。今值兵差过境，例得衿民同办。乃屡经卑职反覆开导，孔广志等坚执不从，并称如要伊等随办兵差，除非公府逾遵，否则不能办理。出言顶撞，甚为藐玩。若任其狡执抗差，则军需关系紧急，更非别项可比。且恐相率效尤，有碍地方政体。似应申请

圣公府查明向例，核定办差章程，分晰飭知卑县，以凭遵照而杜抗违。查孔广志等除遵照圣公府札付止准优免杂泛差徭外，其现在应办兵差及将来恭遇

皇差，该孔家庄地亩应否照例按地办差之处，伏乞

俯赐察核，分晰示遵。兹奉前因，拟合将卑县办差章程及孔庆兰等抗违兵差缘由，具文呈覆圣公府查核。再查孔广志当时即行释回，孔庆兰令飭取保候示。所有谱牒壹本，系伊等自行呈验，因须详请示遵，是以暂存，并非卑职追起。至孔广志等并未报捐职衔贡监，亦未领有公府执照，据称，因修过支谱，俱系谱系恩生，向未闻有此名目，显系捏词朦混。应否准其带顶之处，并请

公府示遵，以杜冒滥，实为公便。为此备由具呈。伏乞照验施行。须至呈者。

右 申

袭封衍圣公府

道光陆年玖月貳拾陆日知县沈惇厚

典史胡 钧 巡捕

淮宁县申为孔继尧等抗交摊征银两事

〔道光年间孔氏族人请优免差徭（二）（一四七〇）之三〕

河南陈州府淮宁县为申覆事。道光柒年捌月贰拾日，蒙

宪台札开，本年柒月贰拾捌日，据寄居贵治族人孔继尧、孔广玉、孔广缙等具呈前事词称，缘族等承

圣祖之德，感蒙 恩例，凡我 圣裔，优免杂派，载注家谱 恩例。孔氏除丁地正贡之外，其余一切杂派差徭，概行优免。族等遵奉檄文，呈明县主，立碑弦歌书院。公府有案可据，并有 县案可查。詎料遇奉杂派，现蒙差催。理合公恳移县，照例优免。叩乞恩准施行。等情到本 爵府。据此，查

先圣后裔，散处各省者，向例优免壹应杂泛差徭。由来已久。今该族人等寄居贵治地方，既有案 据可查，似应援例准其优免，以昭体恤。兹据前情，拟合移会察核办理。为此札付贵县，烦 为查照。希即核案酌量优免，并祈移覆备案施行。等因到县。蒙此，遵查孔继尧等寄居卑 县，向不派办杂差。本年肆月间，孔继往、孔继良、孔广玉、孔广有等，拖欠历年睢工加价，

并賈魯河例價銀兩、經卑縣差催，孔繼往等以加價作為雜差，抗不完納。赴本府具呈，當蒙批飭不准優免。查睢工加價賈魯河例價銀兩，因工需例價不敷，系奉

旨每年按地攤征，隨同正賦報解，非別項雜差可比，自應照數完納。茲蒙前因，理合具文申覆。仰懇憲恩俯賜飭令孔繼堯等迅速按數完納，以濟解項。實為德便。為此備由具申，伏乞照驗施行。須至申者。

右 申

裘封衍聖公府

道光柒年捌月 貳拾伍日知縣永銘 縣丞趙秉衡

曲史韓庭椿

申覆事

札族长孔衍潢为准立优免差徭碑记事

〔道光年间孔氏族人请优免差徭（二）（一四七〇）之十二〕

札五品执事官兼族长孔衍潢知悉。案照四氏后裔、及庙佃两户、并各屯厂佃户人等，一体蠲免地方差徭，久经遵行在案。嗣因日久弊生，间有书役妄行派扰。业于嘉庆二十二年咨会布政司，重申

恩例，出示严禁在案。兹据详称，牌示不能持久，恐年远禁弛，渐滋扰累。欲奖劝族人，捐资立碑，以垂永久。所见极是。相应如详，札飭办理。为此札仰该员，遵即倡率捐资纠工勒石。务宜尽心办理。毋得借滋事端，致干未便。此札。

道光八年十月初六日

圣公府行

泗水县移为免派孔广吉充任保正事

〔道光年间孔庙各屯厂官庄佃户请优免差徭（二）（一五二〇）之十七〕

泗水县为移覆事。准

贵爵府移开，烦查文内事理，即飭保正王元正，将孔广吉开释，无使扰累，实为公便。望速施行。等因准此。查保正王元正禀报孔广吉堪充保正，尚未传案点充。兹奉前因，自应免其充当。除于原票内将孔广吉姓名摘除外，拟合备文移覆。为此合移贵爵府，请烦查照施行。

右 移

袭封衍圣公府

道光九年二月 日移

武安县族人孔继和等呈为援例优免差徭事

〔寄居河南省各县孔氏族人申请续修支谱（一五）（一一五二）之十四〕

具呈寄籍武安县族人

洙泗学录 孔广谦
尼山学录 孔继和等
七品执事官 孔广业

呈为恳 恩援例移会优免事。情缘族等自汉、唐、宋、明以迄
国朝，凡

至圣支派，除应惩（征）大粮外，其余一切杂泛差徭，屡荷
国恩概行蠲免。切思顺治元年钦奉

恩旨，圣门一切典例，俱应相沿，期于优渥。今族等虽寄籍武安，实系阙里

至圣苗裔，与六十户无异，比齐民有别。遇有地方差徭，理应一体蠲免。为此，匍匐来曲，伏乞
仁明大宗主恩准移会武安县天，出示优免，勒石垂久，以昭体恤。庶族等感戴大德于无既矣。上
呈。

道光十年四月 日

浏阳县署前优免孔氏差徭碑文

〔铃印续修湖南平江浏阳二县孔氏合谱卷一（一一二九）〕

浏阳县署前优免勒石碑文

署湖南长沙府浏阳县正堂加十级纪录十次赵为优免杂派差徭以广皇仁以降

圣胄事。道光六年，据监生孔毓曙、佾生孔继馨、监生孔继璠、童生孔传通、孔传经、孔继存、

孔继世，协同族众呈请优免差徭一案，经前宪 赵通详，并前宪杜详奉

藩宪 裕转奉

抚部 康咨明

衍圣公府查明。

至圣三十七代 孔巢父，唐时为潭州刺史阵亡，荫男孔瑛仍袭父职。五季兵阻未归，遂家于平江

鲁德山。前 明洪武六年，五十五代孔靖安公始迁浏阳东乡滩头，万历二十七年暨乾隆三年

印谱确凿，世系昭然。前经

衍圣公委员持札到县，催修谱牒，准其永远优免。兹奉

衍圣公札付，所有杂派差徭，例应酌异优免，以昭体恤。等因奉此，合行勒（勒）石晓谕。为此示仰合邑军民人等知悉，嗣后孔氏所有田产粮册，另立圣裔都，编立圣裔字样。除正供并采买谷石外，凡一切杂派、保甲、牌头、区首、团总、斗级、社长、运丁、夫役、行铺、船户、百工手艺差徭，概行蠲免。以仰副

盛朝崇儒重道

令典。自示之后，恐有借端混派，许该孔氏人等立即指名赴县具禀，以凭拿究。各宜凛遵毋违。

特示。

右仰通知

大清道光十年岁次庚寅九月吉日立浏阳县署前

直隶元氏县申为孔氏族人不应优免皇差兵差事

〔道光年间孔氏族人请优免差徭（二）（一四七〇）之十七〕

直隶正定府元氏县为洋请示遵事。本年贰月贰拾肆日，奉

袭封衍圣公府 札付内开，据直隶元氏县族人孔继凤、孔昭益禀前事禀称，切我孔氏自汉、唐、宋、金、元、明俱有优免差徭之例，入 本朝来，

列圣钦恤，更为隆渥。其世居东鲁者无论已，即流寓他省亦壹体免其徭役，使与齐氏有别。如现在寄居正定府赞皇县孔继泗等，赵州柏乡、隆平、宁晋、唐山孔广嗣、孔传刚、孔传孝等，俱蒙移文本县优免在案可查。族等寄居元氏，虽地亩不多，亦同系

圣裔，例应优免。为此陈明，恳恩移会，与孔广嗣等壹体优免，感戴无既。伏乞恩准施行。等情到本爵府。据此，除将续修支谱铃印飭发外，拟合据情移会。为此札付，烦为查照文内事理，嗣后遇有地方杂泛差徭，仍祈酌示优免，以昭（昭）体恤

圣裔之至意，实为德便。望速施行。计移送元氏县孔氏支谱壹本。等因。蒙此，遵即差传孔继凤等到案，将支谱给发领回。兹据东张村地方孔广和以该村差徭系按粮银派办，该村每年应纳

粮银只有壹百柒拾余两，而孔继风等名下粮银共有肆拾叁两零。今孔继风等称系圣裔，不肯办差。而村众以孔继丰、孔广用等曾充本县快壮衙役，疑非

圣裔，不肯代办。议论不壹。等情据稟请示前来，卑县恭查嘉庆拾叁年闰伍月初捌日奉

上谕，本日据德瑛等奏，审河间县民赵文义等纠众毆差并生员夏文等列款诬控各缘由，分别是拟壹摺，已批交叁法司速议具奏矣。又据另片奏称，河间县肆百陆拾叁村内新旧立碑者只有壹百柒拾贰村，使之承应合邑之差，其余贰百玖拾壹村，并不轮流承值。应请飭下直隶督臣，严飭地方官劝谕各村，通行设立保约，以均差徭等语。直隶河间壹带州县，为各省通衢，过往差务较多，势不能不借资民力，朕每岁春间谒

陵，并举行秋称典礼，及銮辂经临处所，固须均匀力役，即往来奉差大员，需用夫马等项，亦应通融。不独河间壹县为然。但地方官吏不得借端勒派，致滋扰累。今河间县塌碑避役者，贰百余村，其承应差务者壹百余村。是良民扰累益重，而刁民任意抗玩，转得置身事外。各州县村民俱率相效尤，尚复成何事体。此风断不可长。且惟在地方官遴选得人，自能办理妥善。着温承惠派委妥员明白晓谕，将通省应行设立保约及均匀差役之处，酌定章程，妥为经理。如果地方借用民力，实系应付差使，并无借端需索之事，小民俱有天良，自必踊跃急公，亦断不致肆意抚玩。倘地方官竟有科派扰累情弊，即着查明严参，以示惩戒。将此谕令知之。

钦此钦遵议详。凡属生监优免本身杂差，其

皇差兵差以及河工等差，同庶民壹律办理。等因。详蒙

各宪批准飭办在案。兹查卑县寄居之孔续风等，既系

圣裔，壹切差徭，似应遵

谕酌免杂差，以昭体恤。惟查该村闾村粮银仅止壹百柒拾余两，而孔继风等名下竟有肆拾余两之多，若将其应办差徭，分摊村民代办，不惟村民受累益重，且恐不依上控，滋生事端。若卑职即照

札谕酌量优异，而孔继风等借为

圣裔，抗不遵办，理合详请

查核，迅赐将孔继风、孔昭益应办差使是否优免杂差，端办

皇差兵差以及河工等差，或查支谱内所开之孔继风、孔昭益并其嫡亲兄弟子侄，本身名下纳粮银数之内，酌免壹半杂差余银，并不在支谱之内孔姓，均仍随民壹体办理，或免轮充乡长地方佣书，以及夫役等项差使，余具照旧办理。均祈

酌定分晰批示，以便飭遵。并请将卑县寄住之孔继风、孔昭益兄弟子侄，开壹名单发下，以便稽查。庶免冒认包揽，减为公便。为此备由另册具申，伏乞照详施行。须至详者。

右 申

袭封衍圣公府

道光拾壹年柒月 初伍日知县闻超

直隶正定府申复为县役郝刚与孔广权结讼事

〔道光年间孔氏族入请优免差徭（二）（一四七〇）之二十四〕

直隶正定府为中覆事。道光拾壹年拾贰月贰拾捌日，蒙

圣公府移开，据流寓赞皇县族人署洙泗学录生员孔广权呈称，切生等自徙居赞皇以来，荷蒙皇恩优免差徭，迄今十有余代。忽于今岁伍月初壹日，本村地方郝刚，勾串姜受福等，聚众敛钱，

贿通书吏，捏控本县马仁天。于伍月初柒日，票传生等到案，谕令办差。生以优免多年，且吾孔氏流寓直省赵州、顺德等处者，俱蒙宗主移文与总宪方大人批飭优免在案。未肯如谕承办。郝刚等仍是违例滥派，于玖月贰拾柒日，逼呵生等摊出差钱。生当以违例派差等词呈明马仁天案下，未蒙批示。至拾月拾柒日，郝刚率领乡长郝能等叁拾余人，堵门辱骂。生弟文生广模、生孙文童宪堦，出与理较，未及开口，姜受禄郝文等欺生弟孙文弱，使石子将宪堦头殴致命伤壹处，将广模胸前脚踏青紫，有本县验明著单存卷。生因马仁天未将郝刚等按律治罪，以挟嫌聚众等词，赴控府宪案下。蒙批，委员前往讯详。诘伊等恶性愈恣，拾壹月拾壹日，生堂弟广栗向井汲水，乡长郝能亦汲水在井。声言保举广栗充膺地保，令其随伊进城点

卯。广栗以吾孔氏从不充当贱役，理较数语，即担水回家。及数步之远，伊忽自跃于井，当有汲水之人，将伊捞救。伊妻即纠伊同谋多人，持刃堵门辱骂，逼广栗出门，绳束拉赴县城，诬捏广栗推坠入井。生村居民百有余家，惟有村西叁里余孤山有井，每晨汲水恒聚数拾人，伊与广栗汲水之时，先后业有伊同谋数人，及伊坠并先拯救。其故意坑赖显然矣。伏思生等流寓赞邑，世代读书，从未与人争讼。兹郝刚等违例派差，大肆凶殴。生冤尚未得伸，伊等又投井坑赖，以图陷害。兼本县书吏，俱伊心腹，生恐冤上加冤，祸无底止。为此赴控案下，伏乞恩准移会文正定府，亲提讯拟。生所控如虚，亦甘坐诬。叩乞恩准施行。等情到本爵府。据此，查

至圣裔流寓各直省者，向例均照曲阜孔氏所有一切杂泛差徭，概准优免。

国家所有优崇圣裔恩至渥也。查孔广权等实系圣裔，并无冒充隐射情弊，核与优免之例相符。今地方郝刚违例滥派，任意扰累，已属不合。乃复串同乡长郝能，诬控孔广栗将伊推坠入井，冀图陷害，尤为刁恶。拟合移会提讯。为此备移请烦查照文内事理，希即将郝刚等提案讯究，俾知畏惧。并转飭赞皇县，所有该处孔氏一切杂泛差徭，概予优免，禁止地方乡约等，毋得违例滥派，致滋扰累。以广

国恩而崇圣裔。实为德便。望速。等因蒙此，查此案前据孔广权以前情赴府具控，当经卑府飭委元氏县前往赞皇县会同审办在案。兹蒙前因，除飭赞皇县将应讯人证解府审办外，拟合具文申覆圣公府查核。为此备由具申，伏乞照验施行。须至申者。

右 申

袭封衍圣公府孔

道光拾壹年拾貳月叁拾日知府关炳

移正定府为优免族人杂泛差徭事

〔道光年间孔氏族人请优免差徭（一）（一四七〇）之二十七〕

袭封衍圣公府为移覆事。道光十二年四月初十日，准

贵府移开云云。等因到本爵府。准此，查元氏县孔氏族人，既照曲阜孔氏除

大差兵差壹体办理外，其余一切杂泛差徭，概予优免。则居住赞皇县之族人孔广权等，自应仿照

旧行章程，凡载入谱牒者，除

大差兵差一体办理外，其余一切杂泛差徭，概予优免，以示体恤。兹准前因，拟合移覆。为此备

移 贵府，烦为查照施行。须至移者。

右 移

直隶正定府正堂

道光十二年四月十四日

圣公府行

广宗县族人孔继泰等呈为优免差徭恳请移县备案事

〔道光年间孔氏族人请优免差徭（三）（一四七一）之四十八〕

具呈广宗县庠生孔继泰

房长孔毓化族人孔广录

为呈恳移文备案事。切查我孔氏自汉唐以迄本朝，无论世居东鲁与流寓他省，胥有优免差徭之例。如现在寄居直县唐山永年邯郸孔毓文等，业经呈明宗宪，移文优免在案。即族广宗一支，自续修支谱，久蒙本县历任仁天优免有年。第恐日久弊生，再行派扰，为此呈恳

宗宪移文本县备案。族人均戴德无既。上呈

宗宪大人恩准施行。

道光十五年十一月 日

济源县申为孔继楨等借免杂差不纳加价银两事

〔道光年间孔氏族人请优免差徭（三）（一四七一）之三十九〕

河南怀庆府济源县为详请转飭遵奉事。窃查前于道光拾壹年，据学录孔继楨、孔继韶、举人孔继孔、生员孔继昌、孔继积等，以均系

至圣后裔，前赴

公府呈请优免杂差。当奉札付知照，即将该职员孔继楨等各名下一应杂泛差徭免派在案。惟豫省滨临黄河，每遇大工之后，经用

国帑，酌分年限奏奉

谕旨，按地摊征，名为加价。不惟非杂差可比，实与丁地并重。该职员等

自当踊跃输将，乃竟视同杂差，妄冀邀免，抗不完纳。迨经飭催，复呈辩不已。理合申请公宪俯飭该职员孔继楨等，各知急公之义，并谕以免派杂差，系专指一应徭役而言，凡

国家按地应征之款，不得借词牵混。俾该职员等有所遵奉，免致观望。实为公便。为此备由具申，伏乞

照驗施行。須至冊者。

右 具

冊

道光十九年二月初六日知縣周承錦

许州族人孔广远等稟为优免差徭事

〔道光年间孔氏族人请优免差徭（三）（一四七一）之四十三〕

具稟许州学录孔广远生员孔广载

廩生孔广涵五品执事官孔广程 等叩稟

宗主大人案下，为杂派难堪恳准行文优免事。缘生等查历代

恩免旧例，凡属 圣裔，除地丁正耗外，一切杂派，概行蠲免。生等寄居许昌，历有年所。一切杂派，向皆优免。惟每年漕米丁地粮项，与平民一例缴纳。亦属理所应然，安敢妄生事端。

但小粮一项，甚是可疑，起初名曰衡工加价，次改名睢工加价，今改名马仪工加价。每年变换，毫无正名，而总名之曰小粮。究不知此项小粮，是否杂派。生等忝附圣裔，于嘉庆十六年曾经续修支谱在案。为此仰恳

宗主大人移会本州尊，查明此项，若非国课正额，自是杂派差徭，应否概予优免。俾永遵守而免拖累。生等感戴无既。伏乞

宗主大人恩准移会施行。

道光十九年十月十一日

许州直隶州申覆为查明小粮名目事

〔道光年间孔氏族人请优免差徭（三）（一四七一）之四十一〕

许州直隶州为遵飭查明小粮名目申覆事。道光拾玖年拾壹月初柒日，蒙

公府移开，据寄居许州学录孔广伸、孔广泽、廩生孔广远、孔广涵等，以凡属

圣裔，除地丁正耗漕米，与平民壹例缴纳。但小粮壹项，初名衡工加价，次改名睢工加价，今改名马仪工加价。每年变换，毫无正名，而总名之曰小粮。飭令查明是否杂派差徭，酌冀优免。以示体恤，以广

国恩。等因蒙此，遵查各项加价，俱因历年黄河决口，借项兴修，奏明分项按地摊征归款，非地方官所敢违

旨优免。除将孔广伸等应完历年加价银两，除仍钦遵

谕旨，勒限严征完解外，缘奉飭查，理合具文详请

公府鉴核。为此备由具申，伏乞

照详施行。须至申者。

河南汝州府申为受刑及有罪孔氏族人不应优免事

〔寄居河南省各县孔氏族人申请续修支谱（一六）（一一五三）之十九〕

河南汝州直隶州郟县为续修支谱等事。道光貳拾肆年伍月貳拾伍日，蒙

宪府札付内开，本年肆月拾壹日，据河南郟县族人孔传俊、孔广红等呈明修辑支谱恳请铃印前来，除将支谱铃印饬发外，拟合移会。为此札付贵县，烦为查照，嗣后遇有地方杂泛差徭，仍斟酌示优异施行。须至札付者。计移送支谱壹本。等因蒙此，遵即发房备照去后。旋于七月拾叁日，据卑县黄道保六甲乡约孔昭亮禀称，缘身充当本年乡约，管林家村、马圪塔两村，约壹百柒拾余户，其中孔姓不下陆柒拾家。向来公事除孔继炳、孔广泽、孔广膏叁人有优免外，其余孔姓，与众花户一体办公。凡出车马喂草等项，与众花户公为摊办。詎有孔继汉滥叨圣裔，把持不令孔姓办理公事，仓谷不令出领，身与花户商议，俱言孔姓亦仁天子民，不应将孔姓应出之项，摊派旁人，苦乐不均。身无之奈何，身查身支谱所载，凡流于僧道入于下流，及受过刑责，概不准入谱。今孔继汉于道光陆年与孔广泽兴讼，蒙前任县天责打拾伍大板，有卷可查，其为受刑之人可知。伊只壹于孔广运，乳名炳辰，现在囚禁。其为有罪

移河南府正堂为册书滥派族人差徭请援例优免事

〔道光年间孔氏族人请优免差徭（三）（一四七一）之二十八〕

袭封衍圣公府为不遵旧章勒派差徭禀恳移会优免事。本年六月十五日，据河南洛阳县族人孔昭宪等禀前事禀称云云。等情到本爵府。据此，查孔氏子孙流寓各省者，遇有地方一切大小差徭，向与曲阜无异，悉予优免，循例遵行已久。且洛阳县东北乡孔氏差徭，于道光三年经前任河南抚部院程 批准其减免，飭县出示在案。今册书牛茂林等复行滥派，似属不合。兹据前情，拟合移会。为此合移贵府，烦为查照文内事理，希即檄飭洛阳县，将该族人孔昭宪等差徭，援照旧例，概行优免。以示体恤，以彰

国恩。实为公便。望速施行。须至移者。

右 移

河南河南府正堂

道光二十二年六月十六日

圣公府行

右 申

襲封衍圣公府

道光拾玖年拾壹月拾陆日知州萧元吉

州判李洁

吏目曹履端

之人可知。乃改为孔广辰，希图滥明圣裔，欺瞒宗主，朦朧仁天。身系身家本门大宗，身虽充乡约，实非贱役。支谱内独将身名列于谱，任意增删，是何居心。况身家修谱，甲午甲子，过期不准续入。现孔继汉所呈支谱，俱新刷印，又非递县给领，系亲自携来。支谱公文其踪可疑，难保勿舞弊情事。身不敢因私废公，恐经宗主查出，滥明情弊。身系大宗，难免容隐之罪。身听其把持公事，诸难妥协，又难辞玩误之责。事处两难，因禀乞夺等情。据此，查此案先子道光贰拾叁年拾贰月贰拾壹日，据黄道保下五牌绅民林经等公举孔广富充当贰拾肆年柜书。当经卑职传认去后。詎孔广富匿不到案，串谋孔继汉、孔广仁以孔广富系属圣裔，不令具认。节经卑职查吊支谱，延不呈送。兹蒙飭发支谱，查系本年仲春新刊。伏查本年岁次甲辰，并非甲子，如系甲午小修，断不致迟至拾年之后，始行告竣。何以孔传俊等越例续修，谱内既载于犯名义者不许入谱，充当贱役者不许入谱。卷查道光柒年，孔继汉因毁伤孔广泽，经卑前县林令杖责结案。孔继汉之子孔广运因札伤张张氏身死，现在卑县收禁，已入秋审办理。又道光拾柒年孔广富曾充卑县黄道保六甲甲长，确有卯簿可查。且乡约甲长系按年轮流充当，仍准应试报捐，并非隶卒等项贱役。孔传俊等如以孔昭亮现充乡约，指为贱役，不许入谱。孔广富充当甲长在先，似应一体开除。况查孔广富现年伍拾肆岁，当嘉庆甲子年大修支谱之时，其时年已拾肆，断无不入谱内之理。而孔继汉身犯刑责，孔广运即现已改名之孔广辰，羈囚囹圄。似与干犯名义者相等。显因孔广富推充柜书，计无所出，串通孔传俊等冒认同宗，混乱宪谱。现奉

諭旨劝捐中牟工需，孔姓藉口圣裔，概不认捐，以致办公掣肘。理合具文详请

宪府察核，孔继汉、孔广运即孔广辰、孔广富应否出谱，并飭发甲子年支谱下县，以便核对。实为公便。为此备由具申，伏乞

照详施行。须至册者。

道光貳拾肆年柒月貳拾叁日知县汪杰

郟县族人孔继汉等稟为辨明真伪援例优免事

〔寄居河南省各县孔氏族人申请续修支谱（一六）（一一五三）之二十一〕

具稟河南汝州郟县族人孔继汉孔广富等

为挟嫌捏控屡屡不休公息移会晰明真伪援例体恤事。切族等恐其支派紊乱，仲春匍匐来曲，续修支谱。蒙恩钤印飭发，以昭世守在案。情因族内孔昭亮为人不正，素行不端。族众商议，其人有犯出谱之条，是以未将伊名载入谱内。詎伊不知自悟，反怀怨在心，把持乡约在身，希图林经等钱项，妄控林家村马圪塔孔氏柒拾余家，合郟县之内孔氏共有四拾余家，实系妄控。又捏控族等冒认同宗，抗违劝捐中牟大工。以及孔继汉身受刑责于本县主汪太爷案下，朦朧欲混乱孔氏族规，混其历代恩例。伏思圣贤后裔，除国课正供完纳，其余杂派差徭，向邀优免，遵行已久。族等焉敢抗违中牟大工。至谱内所刻孔广辰之名，实系孔继汉之夭亡次子。情因孔广运行凶收禁，族众商议，似有干犯名义，是以未列于谱。将广运之子接续次子广辰之后，庶昭穆行辈，不致紊乱。即孔广富充膺甲长，实非贱役，不是优徇吏卒，有犯出谱之例，俱系孔昭亮捏控。又控孔广运改名孔广辰，并言新刊印谱不足凭信。实系挟

嫌。似此屢控不休，族等無奈，不得公為陳明，懇乞
仁明宗主大人恩准移會辯明真偽，以示體恤。族等感恩无极矣。

被稟人孔昭亮

道光貳拾肆年拾月

日

许州牒覆为孔广瑄等擅戴金顶抗欠税银事

〔道光年间孔氏族人请优免差徭（三）（一四七一）之十三〕

许州直隶州为牒覆事。案准

贵府移开，以据籍隶敝州族人孔昭新禀恳优免杂差，情愿税契优异加价钱粮，令即查照优异等因。卷查孔昭新之父孔广瑄，并孔宪廷，擅戴金顶，匿契不税，抗欠加价银两，当经移查。旋准贵府移令速飭孔广瑄等完纳核办在案。兹准前因，复查孔广瑄置买地亩，多年匿不税契，例应治罪，追一半契价入官。敝州因念孔广瑄讯系贵族，今其呈契投税，照自首之例，从宽免议，原属推广

皇仁，以示格外体恤。其所欠马仪工加价银两，系奉

旨按照丁地钱粮摊征，有关正项，难容违抗。乃孔广瑄不知悛过速完，辄遣伊子孔广新赴

贵府捏诉，实属刁健。至孔广瑄等杂泛差徭，敝州久已优免。除照例飭令孔广瑄等立即税契及完纳马仪工加价钱粮，并酌示优异办理外，拟合牒覆。为此合牒
贵府，请烦查照施行。须至牒者。

右 牒

袭封衍圣公府

道光二十四年十月二十一日

札付信阳州为族人孔继宋等援例优免差徭事

〔道光年间孔氏族人请优免差徭（三）（一四七一）之十一〕

袭封衍圣公府为公恳鸿恩移会援例蠲免差徭开释事。本年四月初八日，据信阳州族人孔继宋、孔广任、孔广予等禀前事禀称云云。等情到本爵府。据此，查

先圣先贤后裔，散居他省者，遇有差徭，向邀优免，久经遵行在案。该族人既蒙优免，杜诚一因何朦胧捏禀，反行逼索。兹据前请，拟合移会。为此札付贵州，烦为查照文内事理，希将孔继宋、孔广任等所派差徭，援例酌示优异。并祈将孔广育查明开释，以昭体恤圣裔。实为德便。望速施行。须至札付者。

右札付河南信阳州准此

道光二十五年四月初八日

圣公府行

任邱县族人孔昭隆等呈为硬派差徭钱文请移县优免事

〔道光年间孔氏族人请优免差徭（三）（一四七一）之十〕

具呈直隶河间府任邱县族人孔昭隆七品执事官孔广顺等

呈为妄行派差恩移会援例优免以广 皇仁事。切族等于去年十二月间，重续支谱，蒙恩移会优免在案。不意族村乡约李会荣被官棚匠姜朝刚恃有手眼，衙门通熟，勾串三关乡地李西白等，捏控族父孔广祥族胞叔孔广启、孔广宏、孔广亮、孔广青等，并非 圣裔，支谱不真，硬派差徭钱文。蒙本县太爷押追。伊等出言藐视，族等无奈，赴府宪请示。蒙批，应否优免杂差，仰任邱县查明办理。不惟不准优免，仍传押办。反将支谱并嘉庆十九年免票扣留不发。族叔父等均已被累。伏思献县族人，蒙府宪批示，碑立文庙。又有景州亚圣后裔孟氏，蒙本省

前藩宪颜大人案下批示，先圣先贤四氏后裔，一切差徭，概行优免，查照恩例遵行。均有卷据可凭。今乡约派扰，族等受累无底。不得不匍匐来曲，伏乞

仁明宗主人恩准移会，查照 恩例将派办族叔父孔广青等钱文，并孔广顺等差徭，概行开除，

照例优免，出示竖立碑石，以广
皇仁。族等感戴鸿恩于无既矣。

道光二十五年六月 日

移德州为族人孔传祥等优免差徭事

〔道光年间孔氏族入请优免差徭（三）（一四七一）之七〕

袭封衍圣公府为移会援例优免事。本年十月十四日，据寄居德州族人孔传祥禀称云云。等情到本爵府。据此，查孔传祥等实系

先圣后裔，凡遇地方一切杂泛差徭，向邀优免，以别齐民。兹据前情，拟合移会。为此合移贵州，烦为查照文内事理，希将孔传祥等，除正供之外，其余一切杂泛差徭，援例优免。以广

皇仁，以示体恤。实为德便。须至移者。

右 移

德 州

道光二十六年十月十五日

圣公府行

五品执事官孔广台等稟为移文兴安县勒石优免差徭事

〔道光年间孔氏族人请优免差徭（三）（一四七一）之五〕

具稟五品执事官孔广台等寄居江西兴安县为恳恩移咨重修优免碑以厚 圣裔以广 皇仁事。始祖衍景、衍任，系

先圣六十五代孙，其先世一迁临江，再迁临川，三迁金溪，复迁建宁。衍景兄弟于康熙年间，始由建宁迁居兴安岑北上八都中军坂。历溯其源，诚 圣裔之正派， 阙里之后嗣。历朝凡系的真

至圣苗裔，无论流寓各省地方，除完正供外，一切杂泛差徭，概蒙

恩免。即临江临川金溪建宁等处，皆得例免。台等世居岑麓，百有余年。未得均沾

皇恩优渥，一体优免。道光三年，恭逢

皇上举行临雍盛典，谨将族谱呈请

衢州博士贾进京陪祀毕，转诣 阙里请鈐

先大宗主之印。蒙 博士体

先圣垂裕之恩，推

国朝优恤之典，移文来兴照例优免。旋蒙 申宪俯赐勒碑。至是遂得与曲阜一体同仁。今碑文剥落，人丁日增，恐世远年湮，难以稽查。故宜更正，急为重修，永免差徭。合将族姓五十余户，总立 圣裔户，以重 圣脉。除完正供外，一切练保、社正、里长、丁役、派捐、杂泛等项，概行蠲免。伏乞

宗主大人垂怜远族， 恩准移文兴安县，遵照前事，许令重修勒石县治，以昭久远，则感 宗主收恤之恩于无既矣。沾仁上稟。

道光二十九年 五月 日

咨直隶藩司为邯鄲县族人优免差徭立石事

〔道光年间孔氏族人请优免差徭（三）（一四七一）之一〕

袭封衍圣公府为据情咨会事。本年六月初三日，据流寓邯鄲县族人孔传中等稟称云云。等情到本爵府。据此，查圣贤后裔流寓各省者，与在本籍者例得一律优免杂泛差徭。该族人等，自道光十四年续修支谱后，移县照例优免在案。迄今十有七年，未经勒石。恐日久弊生，有辜

圣朝优渥之典。稟请咨会前来，相应备文咨会。为此合咨贵司，请烦查照文内事理，既经袁县令照例优免一切杂派差徭，仍祈饬知邯鄲县，给示勒石，以垂永久。实为公便。望速施行。须至咨者。

右 咨

直隶等处承宣布政使司

道光三十年六月初三日

圣公府行

宁晋县族人孔广钧呈为刁衿逼讼请移县主断并勒石免差事

〔咸丰年间孔氏族人请优免差徭（一四七二）之三〕

具呈宁晋县族人孔广钧

为据实直诉恳 恩移咨主断立石分差息讼事。切族等寄居宁晋县章杯村。乾隆戊辰，蒙吾七十一代先宗主修辑支谱，道光九年续修，复蒙七十三代 宗主铃印行县存案。又蒙本县专铃印，现有支谱可据，原无假冒。祸缘本村刁衿庠生荆玉琢，屡因讹借不遂，控族等冒充圣裔，幸前任苏县尊、孟县尊、古县尊据理讯明，将伊痛飭在案。詎意去年十二月，伊恶念复萌，主唆总保荆恒德并其父荆洛爱，乡保张锦暨侄张恒太、张二彪、张成群，月头张仁、张随明等多人，无故将族父子殴辱，具群至祠堂 至圣祖牌位前，百般毁骂，口不堪述。及族呈禀前任丁县主，张锦反捏族抗差，甚至张仁、张随明仗借荆玉琢之威，妄诬族等均系冒孔。县主李天堂讯，族等供明，除杂泛差徭优免外，兵皇大差，随众办理，从不违抗。伊等理屈词穷，均被杖责。不料荆玉琢老羞变怒，勾同副榜荆玉璞、庠生荆晋元、监生荆占魁、庠生荆克浚、监生荆冠林，硬出扛讼。且自任张锦等呈词，均出其手。更有党恶之壮头王利贡、

王合、王湛、史临壮、代书王文龙，为之拨弄其意，不使族等离宁不休。伏思族等人丁无多，合族仅地中亩两顷，安能与伊等富豪强族抗衡。无奈来曲恳乞。宗主垂念一脉，移咨县主讯拟主断，并恳县主按照邯鄯沙河二县贞珉垂以之例，谕令立石分办差务，永息讼端。族众均戴德无既。上呈

官保宗宪大人恩准施行。

咸丰叁年四月二十日

五品执事官孔昭鳌等呈为恳乞移会优免差徭事

〔咸丰年间府庙属官请优免差徭（一四九三）之三〕

具呈五品执事官孔昭鳌等居河南杞县傅屯社 为滋讼私扳差徭恳请移会事。缘职于嘉庆九年八月二十二日，奉

各宪明文，凡孔氏圣裔，例得邀免差徭，刊立碑记，由来久矣。忽于去年楚氛不靖，兵差过境。有地方张炳尧派孔广学马一匹，职等因大差紧要，不敢违阻。于去年八月初六日，业已支差。嗣后具有陈明禀帖在案。蒙 徐县主批示，着该地方张炳尧查照旧章优免，不得故违滋扰，致干查究。等语。于去年十二月初八日，复派孔广元车一辆，于本年二月初三日又派孔昭国车一辆。职等知兵差紧急，不可失误。虽 徐县主批示严明，仍照前辙支差。不意于本年二月间，有捐职恶信张省堂，乘间不良，架（假）公济私，胆敢勾串四乡愚民王尚德等，自造车册，不论地亩多寡，骡马有无，硬扳孔氏差徭，屡次呈控。窃思历代孔氏一族，

圣朝崇德报功，至优极渥。理应志切同仇，力图报效。而张省堂何人，一不系官长，二不为社首。

似此欺宗藐法，仗势滋扰。倘因公以济私，优免不足重而兴讼无息日矣。职等无耐，匍匐案下，据实禀明。叩请

太子太保爵宪宗主大人 恩准移会施行。罔族感德无既矣。
咸丰三年四月二十五日具

咨川督为泸州职员孔继富等伪造免差公文请飭讯办事

〔咸丰年间孔氏族人请优免差徭（一四七二）之七〕

太子太保袭封衍圣公孔为咨请飭属讯办事。案准

山东巡抚转准

贵部堂咨开云云。等因到本爵。准此，当即飭房检查文卷，并无四川泸州职员孔继富等所递呈词，亦无优免差徭咨文。此项公文无案可稽，显有假冒伪造情弊。应将泸州职员孔继富等传案确讯。公文系何人伪造，于何处领取，何人投递，必得澈底根究，以期水落石出。事关伪造公文，未便轻纵。兹准前因，除咨覆山东巡抚外，相应备文咨会。为此合咨贵部堂，请烦查照文内事理，希即札飭泸州并隆昌县，将职员孔继富、文生孔昭熙等传案，严讯确情，按律惩办。并将讯办缘由，先行咨覆。实为德便。施行。须至咨者。

右 咨

总督四川部堂

咸丰三年八月初十

圣公府

札付江苏铜山县为族人孔广铎具领车马事

〔咸丰年间孔氏族人请优免差徭（一四七二）之五〕

太子太保袭封衍圣公孔为据情移会事。本年八月初二日，据族人孔广铎等稟称云云。等情到本爵。据此，相应备文移会。并令孔广琴随文前赴

冰案，亲自具领。为此札付

贵县，烦为查照。希即将卜家店内所存孔天水大车一辆，牲口四头，如数点交孔广琴领回，以安农业。实为德便。望速施行。须至札付者。

右札付江苏铜山县准此

咸丰三年八月初十

圣公府

东昌府族人禀为恳请移会重申恩例事

〔咸丰年间孔氏族人请优免差徭（一四七二）之十三〕

具禀族人学录孔传绅执事官孔

继源

广兴等住东昌府青平城西孔家庄。为籍承

圣泽，世沐

皇仁、恩 恩移会重申

恩例事。切族等迁居东昌，虽历有年所，至今赖

圣祖覆庇，凡有差徭，均蒙

优免。

迨咸丰三年春，逆匪据临青时，屡有大兵由东昌境过，蒙

县主具帖请族等至署面商送差一事。族等念切同仇，又蒙 县主优崇，当允承办。然虽则出

车，实由借助。所虑者，恐有杂泛差徭，以此借为口实，致成牢不可破之势。若再遇杂泛差

徭，如援此以为定例，不惟

圣祖之流泽尽泯，亦大非我

朝崇儒重道之至意也。为此，叩恳

台下，倘蒙 恩准移会，俾 恩例重申，族等犹得世沐

皇仁，以重培

国脉，则不独族等之感戴无既矣。上叩
宫保宗主大人案下。

咸丰六年二月十一日

吉林厅族人稟为恳请咨会军宪准予竖立蠲免碑记事

〔寄居吉林府属各县孔氏族人申请续修支谱（〇九四二）之十八〕

具稟奉天吉林厅族人学录

孔继文
孔昭魁

五品执事官孔继贤七品执事官孔广信等

孔继麟

孔广录

稟为恳

恩咨会立碑蠲耗事。窃族等世居吉林，所有杂泛差徭，向蒙吉林厅主垂念圣裔，

概予优免。惟蠲免纪

恩碑记，年久未立，族人颇为憾。再族等应纳丁银，除正项外，每名加耗银三分，银米除正项外，每两或加壹钱或加贰钱。此项耗银，凡在绅衿秀才，皆蒙宽免。族等虽不敢自附于绅衿之列，倘蒙

军宪厅主俯念圣裔，格外加恩，准免纳耗，固为族等深愿。如或因各项耗银，例所应纳，难以全免，亦求酌量减数，以别齐民。则崇儒重道之情，永垂不朽，而族等世世子孙，皆感恩戴德靡尽矣。为此，稟恳

仁明宗主大人恩准咨会 军宪，转飭 吉林厅主，准于公所祖庙，竖立蠲免恩例碑文。并将各项
耗银酌核减免，以示优异。焚顶无既。沾仁上稟。

咸丰八年二月 日

泰安府泰安縣申復爲孔繼元應負兵差不應抗違事

〔咸豐年間府屬官請優免差徭（一四九三）之三六六〕

欽加同知銜調署泰安府泰安縣爲申覆事。本年玖月初肆日，蒙

太子太保襲封衍聖公府 札付，爲據情移會事。本年捌月貳拾伍日，據寄居泰安縣族人署五品執事官孔繼元稟稱，切職祖居曲阜，自道光年間始遷居泰安縣河凹村。旧年鄉約地方，知至聖后裔，原與齊民有別，不出徭役，自無派差之事。適今年懸姓地方，屢次令職出差，職未肯膺充。時伊即出言不遜，用多方威赫，職未深理校。詎料伊于本月妄稟職抗差不出。蒙縣主批示，候傳。職思伊定有刁言飭稟，不敢赴縣案直陳，須得星夜來曲阜，伏乞恩准移文，以免差徭。不惟職一人感戴，則閭族戶均感戴。等情據此。查

先聖先賢后裔，散居他處者，除正供兵差不免外，其餘雜泛差徭，向邀優免，久經遵行在案。今孔繼元雖寄居泰邑，實系闕里苗裔，原與齊民有別。茲據前情，擬合移會。爲此合移，煩爲查照。希將孔繼元所派差徭，援例優免，以示體恤，實爲德便。等因。蒙此。查此案前據敝縣況洞地方地保鉉光昌稟稱，爲恃矜抗差稟懇傳訊事，切小的里內，自辦兵差以來，俱系按

地亩摊钱。孔传勤系小的里内殷实之家，早先无不遵照办理。迨有伊子孔继源于去年自曲阜报捐庙员之后，即抗不摊办。小的屡向孔传勤理问，孔传勤情愿办理，孔继源坚抗不依。以致里内均出怨言，将致群相效尤。再遇兵差，难以催办。为此禀乞恩准传讯，以免误公。等情具禀到县，当经批准传讯在案。兹奉前因，拟合具文申覆，
袭封衍圣公府 鉴核。为此备由具中，伏乞
照验施行。须至申者。

右

申

太子太保袭封衍圣公府

咸丰玖年玖月

日知县方振业

襄垣县呈为查询山东各属孔氏曾否办理团练事

〔同治年间孔氏族入请优免差徭（一）（一四七三）之三〕

山西潞安府襄垣县为申请查明飭遵事。同治贰年陆月拾陆日，据卑县坪村保保约韩成然等具禀，所辖孔家洞孔庆善并社首孔闰月等串抗不出练勇经费钱文等情壹案，当经差传去后。旋据管理户事生孔宪存禀诉，缘生籍居襄邑，已拾世矣。岂敢串抗经费，以误军事。粤稽

汉高祖过鲁，亲谕免孔氏赋役，壹切杂泛差徭，俱行蠲免。以后历代俱蒙 恩免赋。后及

汉章帝幸鲁，赐孔氏衣巾，并免赋役。

宋高宗免赋税。

宋太宗诏免租税。

元世祖诏，将孔氏子孙杂税军役大小差徭，壹概豁免。户计（笈）不属州县管辖。明太祖俱遵历代旧例蠲免。

正统诏，凡孔氏子孙流寓他处者，俱照例优免。

成化免税粮叁分之壹。

正德尽免孔氏税粮。及我

朝

圣祖仁皇帝，俱照例蠲免。煌煌巨典，罔不恪遵。继蒙

户部咨，查

圣裔差徭杂派，概行蠲免。倘妄行排扰，定以舞弊严究。复蒙
袭封衍圣公札文到县，催免孔氏差徭。县主王太爷亦照札文蠲免。合

数朝之深恩，膏同雨露，俾万世之后裔，泽遍宗支。厥后县主历任太爷，间有大小差徭，概未及
我孔氏子孙赴差。是不但县主遵

君亲师，即书役亦莫不闻 恩崇 圣矣。何至今保约韩成然，张兴育违
恩狎

圣，妄行排扰。以不摊经费钱文，将生侄孔庆善等控案，蒙票差传。盖费由差出，免差则费
将焉附。今被伊等严加催科，迫生以不得不从之势，是不惟辱

先圣之灵，亦且反

先王之命矣。生虽懦弱，实难隐忍。不得不据实呈明，恳恩法究，以免妄排。是不但生感
仁天之德，即

先师在天之灵，亦为是幸矣。等情具诉前来，当经批飭，普天之下，莫非王土，率土之滨，莫非
王臣。团练经费，因贼匪欲扰山西，防堵地方起见，故

抚宪奏明奉

旨办理，非寻常差徭可比。本县亦系山东州县，前年甫来山西。查山东曲阜本县亦亲到其地，曲阜县办理团练，摊费摊人，与民间壹律。因

圣贤之后，较民间尤志切同仇，欲为众百姓观感故也。并未闻有梗顽不化，仗恃圣贤，既不荷戈矛而与贼斗，又不摊经费而募义勇，坐视

国家成败，作壁上观者。山东曲阜县孔氏子孙及兖州府属州县孔氏子孙，为国家出力死者，不知凡几。尔既不愿摊费募勇，亦可仿照曲阜孔氏之式，按户摊人，赶紧要口隘防堵，贼来则与贼斗，不愧为

圣人之后。所禀不办团练，殊属非是。惟尔远离圣化，不知君臣大义，候备文

衍圣公，查明山东各属孔氏，御贼情形，应否为我皇上出力办团之处，移覆遵办。尔壹面仍将经费钱文呈缴，听候

衍圣公飭遵可也。兹于柒月初捌日，又据孔宪存禀称，为传家世守冒罪再呈乞恩原凉事。缘生等以违

恩狎

圣妄行排扰等情，呈韩成然等在案。蒙批抄粘。切生等忝为，

圣裔，足履王土，身属王臣，防堵贼寇，衡以君臣大义，理应切志同仇，以为齐民倡。但我孔子以盛德而为万世师，累代崇封师

圣，而未尝臣

圣。蠲免壹切差徭，优待后裔，总是尊崇

先圣。钩批办理团练，山东曲阜等摊人摊费，与齐民壹律。窃意孔氏子孙，散处别省府州县者亦夥，律果如此。

衍圣公何以不将此规预行札飭。况乡勇之与本乡井自为守望之义，无事检派，自无患骚扰。间有不虞，斩木结竿而前，保家保境，似为两便。今生等远离桑梓寄籍此邦，原不知摊经费而募义勇，曲阜等处果属何式，惟念

先圣以温良恭俭之德，沐累

朝异数之

恩，

国家壹切差徭，概为孔氏后裔蠲免。

恩不敢妄，规自不可易。若云仗恃，不惟王章不赦，即质之中和之圣，亦不容子孙之若此也。近来摊办经费，生等实不敢惜有限之资，抗违公事。但孔氏执守家世

成规，确据无疑。及奉读钩批，转令清夜难安。今仁天业批示备文查明，静候移覆，暂宽呈缴。当经批飭暂缓出丁，暂缓摊费。理合备文申请

爵宪，查明山东各属孔氏曾否办理团练，或照山东按户出丁，不摊经费，或照山西不出人丁，摊费募勇，或既不必出丁，亦可不必摊费。团练壹事，孔氏不必办理。俯赐飭遵，实为公便。为此备由具申，伏乞

照驗施行。須至申者。

右 申

太子太保襲封衍聖公府

同治貳年柒月拾陸日知縣陳宗海

典史余承晉

直隶柏乡县族人孔继淇稟为地役意图扳扰毁坏蠲免碑事

〔同治年间孔氏族人请优免差徭（一）（一四七三）之十三〕

具稟族人孔继淇
孔广益

武生孔广登等寄居直隶柏乡县为纠众毁碑意图扳扰恳 恩移会讯究以正国恩以恤圣裔事。切族等自徙居柏乡以来，荷蒙 皇恩优免差徭。署前建立碑记，迄今已历十余传矣。忽于本年四月三十日，有邻村地方牛清臣、赵增盛、赵忠、赵克让、王得明、张凤秀，村邻王仁杰、王正民、王凤歧、王刘公等，纠领各村数十人，将署前蠲免碑记推倒捶碎。族于五月初间进城始知。回家告知合族，当即呈稟县主 庆天案下，迄今数月，未蒙堂讯。伊等并声言，不但毁坏碑记，更要毁坏 圣庙。似此藐视 国恩，欺灭 圣泽，莫甚于此。族出无奈，不得不匍匐来曲稟明，叩乞

仁明宗主大人恩准移会讯究施行。

同治四年七月二十七日

豫抚咨为兵差河工照派贡差杂差免支请飭族遵照事

〔同治年间孔氏族人请优免差徭（一）（一四七三）之二十七〕

兵部侍郎兼都察院右副都御史巡抚河南等处地方兼提督衔节制全省军务并驻防满洲营官兵兼理河道李 为

据情转详事。据布政使卞宝第呈，蒙抚部院批，据河南府申，新安县职员孔继儒呈控张明德等浮派差徭等情一案，蒙批司核议具详。等因到司。蒙此，查此案现据河南府知府陈肇镛详称，案蒙按察司批据新安县职员孔继儒等呈控张明德等浮派差徭等情一案，当提该原被等审讯。据张明德等供称，

先圣孔子后裔，日行差徭，虽蒙优免，而兵贡各差事较骤，大非寻常差役可比，不在优免之列。自应一体照派，以免偏累。质之该原告等，以为杂派既多优免，兵贡等差亦在其列，不应再有摊派，各等语。飭查案据并无优免明文。此案争讼已久，屡结屡翻，若不明立断案，不足以绝讼源。而

先圣后裔原与齐民不同，若不量加区别，又不足以昭隆重。今酌量核断，查兵差河工，非寻常所

有之事，兵行迅速，支应较繁。河工险出，迫不待时。以上贰项，最关紧要。非借众擎不能。

豫省情形，向系借资民力，新安地当孔道，人烟稀少，已较他处为难。若因

圣裔概准优免，非且民力不齐，临差致误，且恐不肖之徒，借此包庇，转致弊窦丛生。自应与齐民一体照派，以免规避贻误。其贡差一项，虽亦紧要，较之兵差河工，较易支办，当与其余一切杂差一概免支，以示优异。如此明定章程，庶无推诿妄派之弊，争端亦可侵息矣。是否允协理合详请核示祇遵。并请咨明

衍圣公衙门知照，实为公便。等情到司。据此，本司查该府议将兵差河工，飭令孔继儒等嗣后一体照派，其贡差与下余一切杂差，一概免支，以示优异。尚属公允，理合遵批核议详请鉴核，批示飭遵。并请咨明衍圣公衙门查照，等情到本部院。据此，除批飭遵照外，相应咨明。为此合咨

贵公府，请烦查照施行。须至咨者。

右 咨

衍 圣 公 府

同治六年五月十七日

猷县族人孔广远等稟为县役违章滥派恳请移府核办事

〔同治年间孔氏族人请优免差徭（一）（一四七三）之三十一〕

具稟河间府猷县族人广远等

昭旺等

为不照旧章差地妄派滥恩核办事。切族自同治四年九月间，地保书役硬派孔姓夫差，票传孔姓不一，事出无奈，随赴县递呈数次，县尊未曾准理。乃由县赴府，至五年二月间，递呈府尊案下，蒙批，该县立即遵照旧章，查明示遵，毋违。特札。不料县尊仍复迟延未办。又由府赴省，至六年六月间，至藩宪衙门呈控，蒙批，仰河间府札飭该县，立即查案飭遵，一面详覆。至本年二月初，熊县主殉难，后有胡县尊三次莅任，府尊又发札一件，县尊不但不免，又借修补城工名色，派书役下乡按亩勒捐，每亩小地京钱六十文。孔姓丁多地少，捐项难办。

县尊即出红谕一纸，将本地方族长广远，拥护上车，族人见族长年老血衰，难以进城，随苦留回家。不知书役何以回稟。县尊，即出严拿火票，差七班总头至夜跳墙入院，声言拿人。吵嚷时警动合村。俱言族长一无做贼，二无杀人，因何犯此大案。即获住人二名看时，有地

保张云会、状头张广义，即送至 府尊案下，当将二人押发回县，仍令 县尊确切查讯孰虚孰实详覆察核。乃差役等仍然下乡滋闹不休，不容孔姓进城。似此威逼勒派，情实难甘。为此据实禀明，伏乞

仁明公爷宗主大人恩准移会河间府，提案讯办。实为德便。施行。上叩。

七班 牛喜山 张广春

吴均平 路培云

翟玉安 周天祥

覃和山 李盛奎

胡生云 周昆山

户书 卢洛三 尤文奎

工书 毛荣贵

地保 张云会 李文燮

李文廷 许廷柱

同治七年十一月初三日

杞县族人孔广瀛等稟为恳请移县建碑优免差徭事

〔同治年间孔氏族人请优免差徭（二）（一四七四）之二〕

具稟河南开封府杞县族人生员孔广瀛五品执事孔庆吉等为再恳移会以便建碑事。缘同治三年十一月间，族等来曲以优免差徭车马杂派等情，稟请移会杞县，查照山东孔氏之例，一体优免，刊立碑文，以垂永久。当蒙 查县尊恩准优免出示晓谕在案。不料次年即遭捻逆之乱，流离颠沛，未遑刊立。现已平靖，合族公议，诚恐日久弊生，书役人等再有妄派扳拉情事，自应遵照县示勒石黄宫，以杜扰累。再于嘉庆九年间， 宗主移会优免，蒙 董前天将孔氏一族摘除里甲各社地亩，提入付屯社八甲牌中，迄今丁多族繁，率多较出外社，殊属有违旧规。为此合再陈明，伏乞

宗主大人恩准移会杞县，查照旧章，建碑 黄宫，戴德无既。上稟。

同治九年七月 日

直隶省藩司咨为查明祁州居民孔广会身分免差事

〔寄居直隶省各县孔氏族人申请续修支谱（二〇〇）（〇九七三）之二十四〕

钦赐□□□□承宣布政使司布政使军功随带加一级记录二次钱 为

咨查事。据祁州刘牧详称，案准卑前州丁牧移交，据州属庞各庄保地封雨顺稟称，窃蒙发贴督宪告示，谕飭各村监生以及捐职功牌，不准优免杂差。今身村有孔姓捐职，以为圣府后裔，不随众办差，各捐职以为观望，请核示。等情。并据民人周维贞周恩温等呈称，窃身村遇有差徭，向系四街分办，惟身等与孔姓一街，孔姓三十余户，民地二十余顷。身等共十余户，地六顷余亩。办孔姓差徭，由来已久。自咸丰年间，孔广会充膺保地并充社书后，自谓捐职，即不随身等办差，以致观望。内有输差管差之孔洛海、孔洛福与李姓给孔姓过继之孔新来，亦不办差。身等仅地六顷余亩，按二十余顷输差，力有未逮，请体恤贫民以均苦乐。等情。据此，丁牧未及传讯卸事，卑职到任接移交，旋据周维贞等复来案呈诉，并据孔广会即孔洛海等以周维贞等不按旧章具呈前来，当将两造传案。讯据周维贞供称，伊村差徭向与孔姓随同办理，自咸丰三年孔洛海口称捐有功名，不随同出差，伊等不敢惹他。今年因

奉有均差告示始来案呈告。讯之管理户事职孔广会即孔洛海供称，伊于咸丰元年，在圣公府捐七品职衔奉有藩宪札文，有卷可查。又有续来家谱，例得优免杂差。系孔昭文峻使保地等硬派差徭，各等语。讯据孔洛福等，供词相同。并据呈出家谱一本，系于咸丰元年由山东领来。卑职查孔洛海等如果实系

至圣后裔，与齐民有别，例得优免杂差。惟据称前次业已奉文飭调旧卷，于同治七年被匪烧毁无存，难以稽考。差务攸关，自应详请查明批发，以免周维贞等所借口。除飭令两造候示外，拟合具文详请查核，俯赐飭承查明咸丰年间有无准

圣公府咨会优免卑州孔广会等杂差卷据，前州有无将地亩数目造册呈送立案，可否咨请

圣公府查覆，迅速批示抵遵，实为公便。等情到司。据此，查祁州住民孔广会即孔洛海等果否于咸丰年间捐有职衔，并是否实系

至圣后裔，应办杂差已否优免，检查未准。贵公府咨会有案。现据该州具详前来，自应咨查明确，以凭核办。除详批飭候示外，拟合咨查。为此合咨

贵公府烦为查照，祈即查明孔广会曾否于咸丰年间在

贵公府捐有职衔，并孔洛福等果否实系至圣后裔，应办杂差已否优免。刻日查明原案抄录移覆过司，以便转飭遵办施行。须至咨者。

右 咨

衍圣公孔

同治十年二月二十五日

押

七品执事官孔继桂等禀为外县孔氏应与曲阜孔氏一体优免事

〔同治年间府庙属官请优免差徭（一四九四）之二十八〕

具禀七品执事官孔继桂住湖北省钟祥县

为优恤湮〔没〕叩 爵移会复 恩例以别齐民事。窃职系属 圣裔，仰承祖德，荷蒙历朝优崇。凡一切地亩杂派差徭，概行蠲免。至我 国朝，恩纶倍渥。具呈大部，已经咨行督抚准照旧章优免在案。查自顺治元年至道光十九年，其间杂派差徭以及堤工亩费，概行蠲免。历世相因，督抚州县无不通飭在案。奈约地吏役捺案不举，朦官滥派，致令 圣裔与齐民无异。同治八年，蒙 宗主移会钟邑，承准查郑家集、殷家集、孔家山等处，均系 圣裔，除钱粮正供照常完纳外，其余堤工亩费及保甲等项徭役，例应一体蠲免。出示晓谕，仰县属军民人等知悉，嗣后遇有前项差徭，各遵照分别办理，慎勿妄行扰累。等因在案。兹缘钟邑狮子口溃决，派夫修筑。詎有廩生高折桂、监生许继元等，纠聚二十余人，联名具禀，捏职借工敛费，排抗误工等情在案。蒙 府宪胡批，查孔氏优免例，仅山东曲阜县 圣裔嫡派，免其差徭。其余各府州县孔氏人等，均在照章按亩派费，不得混行优免。其将各名下应出亩费一体派解

工用，勿得任意排抗。倘敢迟延，飭宪拿究，以为玩视堤工者戒。职查优免 恩例，屡奉上宪文内所开，凡系 圣贤后裔，杂派差徭概行蠲免等语。既云 圣贤后裔，则是不论何县 圣裔均在优免之内，原无曲阜嫡派之别。更查 恩例，出自曲阜嫡派，而他县则无之。则是曲阜之嫡派为 圣裔，其余虽在曲阜而非嫡派者，不得为 圣裔矣。若止蠲免曲阜，而不及他县，则是曲阜之圣裔，独沾优恤之恩，而他乡之 圣裔，不被其泽矣。其与上宪文内之凡系 圣裔，一概蠲免，不与齐民相等何。职思鍾邑堤工，原系保卫身家，曷敢抗违。但恐此例一破，而

皇恩优恤之典，几成空名，

朝廷大同之政，竟致参差矣。为此叩乞

仁明宗主恩准移会，复 恩例以别齐民，则衔感无既。上叩。

同治十二年三月 日

永宁县族人孔昭煜等稟为请移文蠲免差徭事

〔同治年间孔氏族人请优免差徭（二）（一四七四）之十五〕

具稟族人生员昭煜、宪立住河南省河南府永宁县为恳请移文优复 恩例事。切族系大宗正派，至三十八代祖迁居河南洛阳县。至六十二代祖又迁居永宁县，耕读为业，蒙历朝恩例永免杂泛差徭。近因南匪过境，永城已失，无卷可查。书役因无案卷，遂行派扰。窃思 至圣后裔，一切杂泛差徭，概行蠲免。巨典煌煌，族等何敢遽开弊端。为此匍匐来曲，

叩稟

宗主大人恩准移文，重申 恩例，族等感戴无既矣。上叩。

同治十二年闰六月 日

泰安縣申為聖裔孔繼元名下雜泛差徭業經遵札援例優免事

〔同治年間府屬官請優免差徭（一四九四）之三六六〕

申文

泰安府泰安縣為申覆事。案蒙

爵憲札開，為據情札付優免事。據五品執事官孔繼元稟稱，切緣

至聖後裔無論住居曲阜流寓外境者，歷有優免恩例，除錢糧地丁正供外，凡一切雜泛差徭，概行蠲免，原與齊民有別，久經通飭在案。詎有職本村地方欺職異鄉，每年科職大錢貳千，以為雜差之資。稍有分辯，即以抗差稟究，索勒更甚。種種情弊，受累不堪。為此具稟，伏乞恩准備文移縣優免施行。等情到本爵。据此，查

先聖先賢後裔，向與齊民有別。遇有雜泛差徭，例准優免，久經遵辦在案。今地方科派，實屬有違定例。既據具稟前來，除稟批示外，擬合據情札付。為此札付，煩為查照，希即將該執事官孔繼元名下雜泛差徭，援例優免，以別齊民而示優異。實為公便。施行。須至札付者。等因到縣。蒙此，除查明遵辦外，擬合具文中覆爵憲查核。為此備由具申，伏乞

照驗施行。須至申者。

右 申

襲封衍聖公府

同治拾叁年肆月初伍日

知縣郭定柱

札付东光县为黄白二差应否优免请飭遵照并希出示事

〔乾隆道光同治年间圣贤后裔暨四氏学生员等请优免差徭附墨拓碑文
(一五二八)之二〕

袭封衍圣公府为再行札付事。案据族人孔昭文、孔昭麟等禀称云云。等情到本爵。据此，查此案前准移覆，以

复圣后裔应免差徭，无案可稽。该族人孔昭文等杂泛差徭，概行优免。至于黄白二差，仍与齐民一体同办。即经转飭遵照在案。兹复据所请黄白二差，与杂泛差徭一体优免，出示晓谕，以垂不朽。稟请前来。伏查该族人等杂泛差徭，既准豁免，黄白二差，应否一律优免，以免书役妄派之处，相应据情札付。为此札付
贵县，烦为查照，希即转飭该族人等遵照，并希出示晓谕，以杜扰累而别齐民。实为公便。施行。须至札付者。

右札付直隶东光县准此

同治十三年九月十五日

圣公府

札高淳县为漆桥孔氏优免差徭事

〔寄居江南各县孔氏族人申请续修支谱（三）（一〇三七）之三十四〕

袭封衍圣公府为据情札付事。案据漆桥族人孔广汉、广赓、昭云、繁元、昭杰、庆麟、宪鸿、庆成等来曲禀称云云。等情到本爵。据此，查此案前准来文以该族人等续修宗谱等词一案，当经札覆转飭令将宗谱咨呈，再行给序铃印在案。兹据所禀，草谱修就而条规谱序未攷，不敢刊正。并称，该族人向系儒籍，编立圣裔户优免杂泛差徭各情，核与成案均属相符，自应准如所请。至设有奉祀生六名，据称载在学政全书，业由该族人禀经贵县批准有案，亦应查案照办。除禀批示并另给谕单缮发谱序条规一并飭遵外，相应据情札付。为此札付贵县，烦为查照，希将漆桥孔氏等复立儒籍圣裔户，优免杂泛差徭，并将奉祀生查案照办，以别齐民而复旧章，实为公便。施行。须至札付者。

右札付江南高淳县准此

同治十三年十月二十七日

圣公府

五品执事官孔传恩等稟为恳恩援例免派筑堤差徭事

〔光绪年间孔氏族入请优免差徭（一）（一四七五）之一〕

具稟族人五品执事官孔^{继伟}传恩孔广泗亚圣裔孟广信等为屡派差徭有违恩例恳请查案移咨以免扰

累而广

皇仁事。窃照先圣先贤四氏后裔，一切差徭，概行蠲免，历经准免有案。上年十一月间，河工派买楷料，蒙本县主按地派买树楷，族人等因思虽有蠲免之名，河工关系甚重，且奉县主谕令承办，不得不恪遵办理。业将楷料十二万余斤，照数运送工次。至于价值不敢承领，借申报效之忱。不意运料甫经完竣，现又按地派夫筑堤，奉命之下，进退两难。伏思父母之命，固不可违，

国家之典，亦不可废。惟有据实沥陈下情，恳祈俯念族人等本有蠲免之例，况前次派买楷料，业已遵办，如数运送，情愿报效，不敢领价。并非抗违不遵。此次派夫筑堤，仍恳援照优免成案，移咨 官保抚宪，查案飭县予以优免。庶于派办之中，仍寓体恤之意。为此联名吁请，

伏乞

仁明爵宪公爷恩准电察，移咨抚宪查照，札飭定陶县将族人等应出之夫，概予免派，以示体恤
而免扰累。感戴鸿慈，实无既极。上稟。

光緒元年正月 日

执事官孔昭荣等稟为乡保硬派圣裔差徭恳恩移会事

〔光绪年间孔氏族人请优免差徭（一）（一四七五）之十二〕

具稟执事官孔昭荣年四十八岁住河南彰德府安阳县人
恩生孔宪文年四十八岁住河南彰德府安阳县人
为据情稟明叩 恩行文到县免派差徭事。切族今春蒙 宗主行文到县，当蒙县主 赵将一切
寻常差徭，批准优免在案。不料今秋有乡约袁希德、保正杨文耀硬派谷草机户，族未允许。
伊竟口出恶言，辱骂孔氏冒充圣裔，仗公府来文，抗不出差。并言公府来文不如蒿草，不若
故纸。捏稟孔宪壑即孔宪吉、孔广玉即孔广义、孔庆河即孔庆魁，票差虎役刘升、陈贵私将
孔宪吉等三人锁起，威逼勒索钱文。经候补县余审问，不遵正堂钧批，口出不逊之言，说
宗主纵宠后裔横行，仗势欺人，差徭不准不出，如敢强说孔姓，定行掌责。似此乡保串通，
不遵堂批，硬派差徭，为此奔轶据情稟明。叩乞

仁明公爷 恩准行文安阳县，照旧优免差徭。施行。

光緒二年八月 日

札安阳县为乡约违例硬派请援旧章优免孔昭荣等差徭事

〔光绪年间孔氏族人请优免差徭（一）（一四七五）之十三〕

袭封衍圣公府为据情札付事。案据执事官孔昭荣等禀称云云。等情到本爵。据此，查先圣先贤四氏后裔，遇有差徭，概行优免，历久奉行在案。兹查执事官孔昭荣等所禀，前蒙批准优免在案。而乡约袁希德等，何得违例硬派谷草机户等差，并肆行辱骂锁押勒索。如果属实，殊为不法。既据该员等具禀前来，相应据情移会。为此札覆贵县，烦为查照文内事理，希将孔昭荣等名下差徭，仍照旧章援例优免，毋任乡约等朦蔽硬派，以示体恤而别齐民。实为公便。施行。须至札付者。

右札付河南安阳县准此

光绪二年八月初二日

圣公府

尼山学录孔继昶等稟为恳恩移县再立蠲免碑记事

〔光绪年间孔氏族人请优免差徭（三）（一四七七）之一〕

具稟清平县族人尼山学录孔继昶生员孔广照执事官孔广霄监生孔广洙

为公恳移文复立蠲免以恤族情而崇国典事。窃族等仰承祖德，历蒙优崇。自迁居清平以来，素有蠲免。立有碑记，人所共见。缘世远年湮，旧碑残缺。族等念及前人建碑之处，踪迹若无，恐日久弊生。公议再建碑记。为此，公恳

宗主谊思木本水源，各文移县，照例再立蠲免碑记，则府牒一伸，斯

皇仁可广。族等不为（惟）同沾 圣朝雨露，亦且感蒙

仁明爵究大人荫庇。族等幸甚，不胜感激之至。 上叩。

光绪贰拾壹年叁月 日

安阳县申为圣裔优免差徭应依支谱为凭执事官不合朦混具禀事

〔光绪年间孔氏族人请优免差徭（一）（一四七五）之十四〕

河南彰德府安阳县为申覆事。光绪贰年捌月拾壹日，蒙

爵宪札开，据执事官孔昭荣、恩生孔宪文禀称，切族今春蒙行文到县，当蒙县主赵将壹切寻常差徭，批准优免在案。不料今春有乡约袁希德、保正杨文耀硬派谷草机户，族未允许。伊竟口出恶言，辱骂孔氏冒充圣裔，仗公府米文，抗不出差。并言公府来文不如蒿草，不若故纸。捏禀孔宪壑即孔宪吉、孔广玉即孔广义、孔庆河即孔庆魁。禀差虎役刘升、陈贵私将孔宪吉等叁人锁起，威逼勒索钱文。经候补县余审问，不遵正堂钧批，口出不逊之言。说宗主纵宠后裔横行，仗势欺人，差徭不准不出，如敢强说孔姓，定行掌责。似此乡保串通，不遵堂批，硬派差徭，为此奔轶据情禀明。叩乞恩准行文安阳县，照旧优免施行。等情到本爵。据此，查

先圣先贤四氏后裔，遇有差徭，概行优免，历久奉行在案。兹查执事官孔昭荣所禀，前蒙批准优免在案。而乡约袁希德等，何得违例硬派谷草机户等差，并肆行辱骂锁押勒索。如果属实，

殊为不法。既据该员等具禀前来，相应据情移会。为此札付烦为查照文内事理，希将孔昭荣等名下差徭，仍照旧章援例优免。毋任乡约等朦蔽硬派，以示体恤而别齐民。等因到县。蒙此，随卷查本年叁月贰拾捌日，蒙

爵宪札发安阳县族人支谱壹本，当即遵照备案。旋据职员孔昭荣等具呈，请免差徭前来，查系支谱有名，遵例批示准免在案。嗣于闰伍月间，据县属大高村乡约袁希德等，以孔宪壑、孔庆合、孔广玉等抗公滋事等情，具禀到县。卑职当因人心不古，包揽诈骗，情伪百出。凡办理应否优免差徭，须以是否圣裔为断。而是否圣裔，应以支谱为凭。遍查奉发支谱，并无孔宪壑等叁人之名，显非

先圣后裔。卑职身任地方，理宜实事求是，不敢稍存颛顾，任听冒滥邀恩。是以传讯，断令支谱无名之孔宪壑等叁人，照旧与齐民壹体应差，取结在卷。兹该职孔昭荣等抹杀前情，前赴

爵府朦混具禀，且以毫无影响诋漫之词，添砌禀内，不知是何居心。即禀内声叙孔宪壑即孔宪吉、孔广玉即孔广义、孔庆河即孔庆魁等语，亦显系张冠李戴，盖既是圣裔，名载支谱，自应依谱称名，何以于谱名之外，别又称谓。况县讯时，孔宪壑等又何以不自供明。其间有无情弊，理合具文申请

爵宪鉴察，澈查核示，以便遵办而符定制。实为公便。为此备由申覆，伏乞照验施行。须至申者。

右 申

袞封 衍 圣 公 孔

光緒貳年捌月拾肆日

知县赵集成

族人孔庆升等稟为回籍修谱恳请移会优免差徭事

〔寄居四川省各县孔氏族人申请续修支谱（二）（一二〇五）之三十五〕

具稟吕官户族人孔庆升寄居四川省忠州垫江县系贡生孔广誉寄居重庆府长寿县孔宪清寄居顺庆府邻水县孔庆林寄居大竹县等为回籍修谱优免差徭协恳移文以恤远宗事。缘生祖希瑶，于明建文游学入川，制

业邻水，自六十一代祖宏颐建

圣祖之家祠，遵曲阜之祭典，屡次归鲁谒陵，历奉 部文行查，飭行川省，凡属四氏圣贤后裔，不入编氓，与齐民有别。一切地亩杂项差徭，概行蠲免。其散居各省者，俱令所在有司，加意优恤。历三世公高、公胆迁居长竹两邑。至八世尚奇，迁移垫江。亦屡次修谱，代袭奉祀一名。自乾隆五十三年，生叔高祖继纓偕传学公修谱后，惟长邑仅修支谱。于同治四年，竹邑修支谱。光绪十三年，而邻垫两邑，至今百有余年，尚未修辑。迄今代远年湮，奉祀乏嗣。族长物故，优免虽历有 恩诏明文，日久弊生，实为俱（具）文。况又有强绅于吏每覬觐生等庙会祀田厘税，以为奇货，不饱其欲，遂致勒提抽收。故川属州县，固有遵例蠲免者，亦有捺案不行者。是使生族各属，有得蠲免，有不得蠲免之殊。而所谓一切地亩杂项差徭尽行

蠲免者，几湮没不彰矣。今值

公府示谕修谱，生始邀同各属族人，匍匐来曲，大同修谱。协敢公吁

爵宪大宗主恩准照例移文到川各属，蠲免生等一切地亩杂项、厘税、差徭。并飭治将勒石，

以垂永久。俾生等得优游于光天化日之中。免追呼拖累之苦。不惟生等永沐隆恩，而维持之

功，亦与金石并垂不朽矣。沾恩上呈，伏乞

仁明爵宪大宗主台前赏准施行。

垫江孔宪庆升

邻水孔宪清

长寿孔继信

大竹孔庆林

宣统二年五月

四川垫江大水

各办公文一角

四县支谱

日

二、府庙属官优免差徭

宿州礼生朱广俊等启为恩给书文以开优免事

〔顺治年间府庙属官请优免差徭（一四七八）之七〕

江南省凤阳府宿州沐恩相礼生员朱广俊等

启为恩给书文以开优免事。诸生于昨三月内蒙

大文宗收录门墙之下，衣巾送学，已沾

隆恩。惟优免一事已经二载，毫末不除，诸样杂差照常无异。恳乞大文宗垂怜，发给书文与凤道，再与本州知州，免丁免差。倘再沾

雨露，万代感

恩。上

启。

顺治十三年十一月二十二日具
准发书三处

移滕县为胥役作奸重派司乐官王璐夫徭希予除免事

〔顺治年间府庙属官请优免差徭（一四七八）之九〕

少保兼太子太保袭封衍圣公府为提究积蠹以惩藐抗事。据本府司乐官王璐呈前事内称，前沐移文滕县优免夫役，已蒙前任刘父母落房举行。拒以积蠹张化凤、刘竹芳等屡索未遂，机乘沈父母新任，胆将前文朦朧抽匿，以致复派贴帮河夫，日逐索害。似此猾胥，法宜呈（惩）究，恳移

道府，以剔积弊。等因到府。查得司乐一职，

钦设之官也。所有夫徭，例应除免。去年特移文知会。拒胥役朦混作奸，以致夫徭重派。为此，

再移文前去

贵县，烦将本官名下一应夫徭概行除免。但事属贵县，不便转移，希仍将化凤等律以应得之罪，庶以肃官常而厘积蠹矣。须至移文者。

一移文

滕县

顺治十四年三月十六日

少保兼太子太保袭封衍圣公 押

乐舞生祁秦启为蠹书扳报房科恳乞咨究事

〔顺治年间府庙属官请优免差徭（一四七八）之十二〕

平阴县乐舞生祁秦等

启为藐视帖文扳报差役乞准咨豁以复盛典事。切秦等供职庙庭，蒙给札帖，一切差役杂扰概行优免，札帖昭然。陡被蠹书王法乾等拨官藐视，将身等报补房科，痛加刑责。有申文魁等四人，已拘认役在县。不惟有坏盛典，亦且大伤府体。恳乞

本府老爷电准急行咨究法惩，庶盛典有光，恩例不虚。无任激切。叩启。

被启 王法乾 姜从义

顺治十七年九月十四日叩启

准行文本县

邹县乐舞生聂以松启为县主毁札动刑恳恩给示事

〔康熙雍正年间府庙属官请优免差徭（一四七九）之一〕

圣庙乐舞生聂以松系邹县实在民籍

启为恳恩给示以光大典以全府体事。窃照邹县十五人自膺乐舞以来，十有八年，杂泛差徭从未扳扰。前有本社里老报身，公直竟行锁拿。身持札赴县理辨，本县朱爷不由分诉，扯身动刑，将札帖揉撕。似此锁刑毁札，大坏恩例，有伤府体。伏乞

□明老爷恩准施行，庶万世之恩例不坏，而历代之府体大正矣。感恩上启。

康熙十年十月二十五日具

查明移文

移曲阜县为查明邹县乐舞生聂以松有无被扳里差实情事

〔康熙雍正年间府庙属官请优免差徭（一四七九）之二〕

袭封衍圣公府为移查优免事。据邹县乐舞生聂以松稟称，身供职祀事，例有优免差役，帖文昭然。陡被里书报身里长，承催粮银，被差役将身锁系驴（颈）颈。及见 大爷，仍欲责身，将札存留不给。乞 老爷天恩作主，急行豁免，庶庙典有光。等因具稟到府。据此，为照查乐舞生在

圣庙供事乐舞，例有优免。今据聂以松稟被里书报应里长，有无实情，拟合移查。为此，合用手本前去

贵县，烦为移查明白，照例优免施行。须至手本者。

一手 本行

曲阜 县

康熙十年十一月十六日

袭封衍圣公 押

四氏学教授申为邹县征办军饷并无抗违事

〔咨行河督鲁抚优免孔颜曾孟四裔地亩摊派河工帮贴一应杂差（一）（一四五〇）之十九〕

孔颜曾孟四氏学为再吁天恩等事。蒙

本府钧票前事，票仰四氏学教授沙潢、学录孔尚侃照票事理传谕邹县各户口将本年条银湊办完纳。此系奉拨军饷，毋得刻迟。如再抗违，立提重究不贷。等因到学。蒙此，查得四氏族属寄居邹县者甚多，一切正项钱粮自应该县按户催比。如有奸猾抗延者即指名申报，以便究拟。今邹县止称抗违，并未声说抗粮何名，明系该县里书希图迟延军饷，而坐四氏族属以抗违之名。朦混申详，无凭查催，拟合回报。为此，今将前由理合具申，伏乞照验施行。须至申者。

右 申

太子少师袭封衍圣公府

康熙貳拾肆年陆月
再吁天恩事

拾柒

日教授沙潢
学录孔尚侃

手本兗州府为行查孔孟庙户乐舞礼生造册移送以资优免事

〔康熙年间圣贤后裔暨四氏学生员等请优免差徭（一）（一五二五）之十〕

太子少师袭封衍圣公府为下邑力役宜均等事。准 兗州府手本前事内开，蒙 布政司宪票前事，据该府呈详孔孟庙户、礼生、乐舞优免缘由等因到府。准此，随檄行本府属员百户、管勾、典籍、司乐及各翰博确查去后。案查前准

贵府手本前事，业将

圣庙供事庙户、乐舞、礼生等优免杂泛差徭。恭遇我朝定鼎，奉有圣门典例，俱照前朝期于优渥之

旨钦遵在案。又各翰博赴 部呈准，奉有两次 部文通行申飭，并无更改，为例日久，详查移覆在案。今准大移照查

圣庙供事庙户、乐舞、礼生等优免杂泛差徭，耑供庙事，相沿数千百年。恭遇我朝定鼎，奉有圣门典例俱照前朝期于优渥之

旨，钦遵在案。再查顺治十三年与康熙二十三年，据颜曾孟仲四翰博赴 部呈准，奉有两次 部

文通行申飭，并无更改在案。凡庙户自置民田，悉照寄庄户编派，加粮免差，成例相沿日久。前经邹县申详

抚部院，恐有借名投入豁免丁差之弊，批行驳查间，本府仰体 院慈，期子为道为民，恐有借名豁免等弊，严行查核。随传集本府属员百户、管勾、典籍、司乐等员严加清查。其历代拨庙户一百一十五户，以供洒扫、佃户五百户，以供蒸尝。至在庙供事乐舞生三百六十名，供事礼生二百四十名，于康熙二十五年，业经将乐舞礼生名册移报 太常寺，俱有成数在案，查明并无借名投入豁免丁差之处。口庙户虽有定额，而历年既久，各户之消长不一。至乐舞礼生在庙供事，亦时有去留更易。今准行查，又据各翰博申报名数，本府覆核无异。拟合一并开册移送

贵府，烦为查照详请施行。须至手本者。

计移送

册叁本

一手本覆

兗州府

康熙三十年十月

太子少师袭封衍圣公

兖州府手本为滥免差徭偏累小民清查优免旧例事

〔康熙年间圣贤后裔暨四氏学生员等请优免差徭（一一）（一五二六）之五〕

兖州府为滥免差徭偏累小民事。蒙

巡抚部院佛 批，据本府呈详邹县廖登第等告刘玉华等缘由前事，蒙批，前为协济河夫，该县详请各圣贤裔在邹地亩与户役礼乐各生人等地亩应否优免，本部院批司查覆再三。嗣准圣府咨称，寄庄地亩已纳粮包差在内等语。复经行司详议，据称并无借名冒免之处，是以批令照旧遵行在案。不意该县竟不查照原额寄庄亩数，将额外地壹千肆百余顷之地寄庄，是否该县私征入己，岂得轻置不究。况除

圣府各博士外，或有别项绅衿亦借寄庄混免累民之处，亦未可定。仰该府统行严查，并将该县寄庄有无旧案呈报批夺缴。等因批行到府。蒙此，又蒙 巡抚部院佛 宪牌为大棍积蠹等事准

世袭翰林五经博士孔毓璠等呈廖登第等缘由前事，蒙此，一并抄发邹县一并确议去后。续据该县详称，查看得孔孟等六庙圣贤后裔与夫庙佃、乐舞、礼生人等地亩，概从优免，相沿已

久。查有康熙二十三年奉到 部文，为恩恩再给明文等事准博士孔毓琰呈称，宗族庙丁礼生一切杂项差徭，概行蠲免，业经前任张令申覆，照依顺治十三年例蠲免，并无更改，此固以为当免而平素实无何项应免何项不应免之成案也。乃张令又于康熙二十三年奉到 院行内有一款，孔孟例地照旧除免，至续置民田，俱照民例应差，绅衿相礼庙户亦不得豁免，百姓均徭，勒石现存。无如张令于二十三年勒石，于二十六年去任，其任内并无分别摊差之事，此则以未可概免而实仍前无一不免者也。邹邑历来旧规可指述者如是。卑职于二十七年二月十六日受事，凡民间赋税自正项钱粮米石之外，其余一切杂项差徭，尽行革除。只有河夫一项，为钦工重务，不可废缺。但遇金点河夫仅有里民应役，自六庙族人、庙佃、乐舞、礼生等以及闾县绅衿，并无摊派河夫之例。卑职目击小民独累，思欲详请裁定，未敢遽行。至二十九年，奉有直陈东省诡寄等事一案，飭令绅衿、衙役、兵丁人等田地与民一例当差，则绅衿人等遵奉 宪令均差无疑矣。独有各庙之绅衿百姓，其人亦云众矣，例地寄庄与夫续置民田其地亦不齐矣，以为当分别派差。而 部文有一切概免等语，以为当率循旧例，而新行严切，不敢有违。此所以有下邑力役宜均，圣贤优免当辨之请。嗣蒙

抚院大老爷准据 衍圣公咨称，圣贤后裔与夫庙佃、乐舞、礼生人等续置民田俱照寄庄编派，粮已包差。蒙飭照旧遵行，以示优恤，不得扳抗，仍取遵依报查。卑职视为只取遵依，未蒙飭查，随具遵依，除豁在案。今廖登第等告为豁免差徭等事，蒙 宪飭查，随查得孔孟圣府并族人例地九百九十四顷余亩，至各庙族人以及庙佃、乐舞、礼生人等续置民田一千五百余顷内，只有寄庄地五十四顷余亩，原在额定寄庄四百九十五顷余亩内照依寄庄纳粮，其余一

千四百六十五顷四十五亩俱照实在编派，是寄庄实在之多寡各有确数矣。然求其所以悉从免差者，若非可以片言为剖判也。窃念部文云一切杂差概行蠲免，或杂差甚繁，抑非关紧要，固未尝指明漕运一工一项也。若张令既遵部文优免矣，乃又中院立有军需河道、孔孟续置民田及绅衿相礼庙户与民一例应差之石既勒石垂永久矣。仍又自为因循而绝无派差之事，总缘优免无别，所以上下周章，终无画一之规，昭其法守。至卑职未清查果否寄庄而辄具遵依，非不素察于寄庄实在之数目，但执认照旧二字，以为历来各庙人等概未摊差，今仍遵照往例矣。疏略之愆，夫亦何辞。若云将此一千四百余顷之地照寄庄私征入己，事关圣贤后裔等赋役大故，岂容渔利自便可支饰了局也。再若大棍积蠹一案，就里情节，其地亩人户寄庄实在与滥免差徭一案无异耳。至谓查某某地例应优免，某地例应当差，此部文与院文各出一词，卑职何敢擅定。但揆之例地属额设优恤，寄庄已包差在内，似应从免差之例。至若各庙续置民田及庙佃、乐舞、礼生人等地亩应否优免，

上宪自有主裁，此无容下吏漫为置喙者也。等情到府。据此，拟合移会。为此，合用手本前

贵府查照移文内事理，希查例地自应优免，其庙户人等续置民田，所有金点河夫等项，是否优免，有无旧例，希即查明过府，以凭核转。切望切望。须至手本者。

右 用
手 本

康熙三十一年七月初一日

山东藩司咨为圣贤庙庭人役地亩免差应分别处理事

〔康熙年间圣贤后裔暨四氏学生员等请优免差徭（三）（一五二七）之八〕

山东等处承宣布政使司为违

旨殃民叩天作主示除大害事。康熙五十年三月二十九日，蒙

巡抚部院蒋 批，据本司呈详前事，查得 圣贤后裔免差一案，前蒙
宪案准

户部咨开，圣贤后裔以及庙丁、礼生、乐舞人等，凡杂泛差徭概行优免，转行遵照在案。今据兖州府详，据嘉祥县详称，据闾学生员张岗等以宗圣后裔遵奉部文概行优免差徭，虑受偏累，争鸣有先。已故博士鲁贞豫将己田一例当差，勒有碑文，永昭来兹。今若悉行优免，民累愈多，请照旧例均役。而博士鲁尚溶等又称，概行优免之举系优崇圣贤巨典，出之部文，执欲遵奉。两执一词。将鲁官及族人、庙丁、礼生本名地亩造册请示，或照前院旧碑仍令均差，或遵奉

大部新行概予优免，请示前来。又准

衍圣公咨称，嘉祥为曾夫子发祥之地，其墓庙祭田不隶有司，无凭坐差，其所免差徭指行粮地耳。查四氏优免，仰荷

皇仁，历奉

部文申飭通行在案。非独靳于宗圣之后裔，亦非独靳于宗圣之梓里也。今张岗抗

部颁之明文，其悖已甚。希将四氏优免之处，再为行府檄县照例遵行。等因。查四氏优免系遵奉

部文及

宪台批允转飭，今据该府请示前来，本司未敢擅专，合无呈祈

宪台批示，以便转飭遵行。具呈蒙批，圣贤后裔杂泛差徭，既奉部文概行优免，而庙丁、礼生、乐舞人等冒滥者亦应分别，毋致偏累小民。此体宗圣之素心暨博士鲁贞豫公之良法，不可废也。前准

衍圣公咨，已檄该司转飭照例遵行在案。仰该司一并酌议，画一详报。缴。等因批司。蒙此，又于康熙五十年四月十六日，蒙

本都院批，据批司呈详同前事覆查得圣贤后裔免差一案，蒙

宪批，圣贤后裔，奉准部文杂泛差徭概行优免，而庙丁、礼生、乐舞人等冒滥者亦应分别，毋致偏累小民。仰司酌议画一详报。等因。此诚轸恤民隐之至意。即县详内亦云，免例一开，包揽射利，免者愈多，累者愈累等语。是免差之部文固当只遵，而除弊之法亦不可不立。本司遵议，除庙丁、礼生、乐舞人等冒滥者自应遵照宪批严禁优免，以示至公。其执

事庙庭者应自四十九年新奉部文为始，以前名下地亩照例准其优免，以后续置者概不准免，则包揽之弊可绝。其庙丁、礼生、乐舞人等自奉准部文为始，以前有名者照例准其优免，以后投充者概行严禁不免，则冒滥之弊可除。如此，既不悖于部文，亦不至于冒滥。如庙丁、礼生、乐舞人等如有死亡事故革除者，应报明本县并报明

衍圣公方许顶补，永杜冒滥。缘系批议事理，本司未敢擅专，合无呈祈

宪台批示，以便转飭遵行。具呈蒙批，庙丁、礼生、乐舞人等杂泛差徭，既经该司议明，应自四十九年奉准部文为始，以前名下地亩并以前有名者准其优免，以后续置并以后投充者严禁不免。仰即转飭遵照，余如详行。缴。等因批司。蒙此，除行兖州府转飭遵照外，拟合移会。为此合咨

贵府烦为查照

院批及移文事理，希便查照施行。须至咨者。

右 咨

袭 封 衍 圣 公 府

康熙伍拾年肆月二十日

山东藩司咨为严禁投充冒滥优免事

〔康熙年间圣贤后裔暨四氏学生员等请优免差徭（三）（一五二七）之九〕

山东等处承宣布政使司为严禁冒滥优免之弊以苏民累事。康熙五十年六月十九日，蒙巡抚都院蒋 宪牌前事，我 国家崇儒重道，

先圣贤后裔凡有差徭自应优免。至于庙丁、礼生、乐舞生等田地，实在庙执事者合而计之，亦不过二三十顷为止耳。本都院访得，包揽钱粮冒滥诡寄者甚多，若一概请免，必致累及小民，殊非

先圣贤均田均役至意。此后如有借名优免、投充冒滥、混开混报偏累里民者，该司即便转行革除。如有不遵，一体申究。为此，牌仰该司官吏即便转饬知照。毋违。等因到司。蒙此，除行兖州府遵照外，拟合移会。为此，合咨 贵府烦为查照施行。须至咨者。

右 咨

袭封 衍 圣 公 府

康熙伍拾年陆月二十三日

札付武定州为希概免祀生刘国勋等差徭事

〔康熙年间圣贤后裔暨四氏学生员等请优免差徭（三）（一五二七）之十〕

太子少师袭封衍圣公府为移会事。案查 贤儒后裔奉祀生仰荷

皇仁，比照廩增附生员例，将本生名下一切杂徭概行蠲免。前有武定州祀生刘国勋、侯文忠、刘昌龄由本府给札，移文到 案，随经

贵州衣顶送学作养已极。诚恐里书人等借端混扰，合再移会。为此，合用札付前去

贵州，烦为查照先今文内事理，希将祀生刘国勋、侯文忠、刘昌龄栽培优待，并飭里书人等毋得滥派差徭。感荷 右文至意为不浅矣。须至札付者。

一 立案

武定州

康熙五十年七月二十九日

太子少师袭封衍圣公 押

山东藩司票为乐输实系派累未便允行事

〔咨行河督鲁抚优免孔颜曾孟四裔地亩摊派河工帮贴一应杂差（一二）（一四五一）之九〕

布政司侯为乐输凿池工费叩天恩准洋清事。康熙五十二年四月二十五日，蒙巡抚都院蒋批，据本司呈详前事，查得邹县详挑城濠每亩输新制钱半文以作工费一案，蒙宪批司查议，遵即转行兖州府查议去后。今据该府详称，筑堤、浚河、修桥原系地方官应行之事，以之派累里民固为不可，然出于绅士乐输，则以地方之人公费完地方之公事，似为无碍。详请前来。查筑堤修濠固属要务，第查详内止据绅士呈称乐输，而该县又称统计县内中下地八千八百余顷，每亩半文等语，虽称乐输，事涉派累，似乎未便允行。应令该县设法疏浚，以竣此工。缘系查议事理，本司未敢擅便，相应呈祈 宪台批示，以便转飭遵行可也。具呈蒙批，如详转飭遵照。缴。等因批司。蒙此，合行飭知。为此，票仰兖州府官吏照票事理，即便转飭遵照。毋违。

郟城县申为爵帛生邀免官差原未呈缴札付候验特申覆事

〔乾隆年间府庙属官请优免差徭（一）（一四八〇）之二十三〕

曹州府郟城县为恳恩移文优免以光祀典事。本年九月二十八日，承准

袭封衍圣公府移文前事内开，烦为照例优恤，俾趋跪供事，祀典无误，须至移会者。等因。承准此，遵查卑县李北地方旧官中董廷选呈报夏世卓殷实老练，堪充官中等情到县，当即票传点验去后。嗣据夏世卓禀称，切童居住夏家楼，在杨家海从师读书。昨忽被官中董廷选报童充旧官中，现蒙差唤。念童既食德衣疇，理应效奔走之劳。但童读书有日，岂肯白衣终身。大场既毕，不久岁试。欲舍差以应考，恐误催科之期。欲舍考以办差，又恐失作养之意。为此，叩恳俯察下情，曲赐矜全，感戴无既。上禀。等情到县。据此，查童生并无优免差徭之例，随即飭差带验。于本月十六日，经卑县当堂点充官中，夏世卓具有认状在卷。兹承准大移内开夏世卓于乾隆二十六年二月初一日报充

圣庙乐舞，遵补 崇圣祠爵帛生，给有札付等情。查夏世卓如果上年在 公府报充乐舞，补有执事，给有札付，当董廷选报伊官中在卑县具禀之时，禀内因何不将现充爵帛生情由据实

声明，且又不将札付呈验，直至卑县点充具认之后，复赴

公府具呈恳恩优免，似难凭信。兹蒙 大移除一面差吊夏世卓原领札付查验外，所有夏世卓未将在 公府邀补爵帛生及未呈验札付缘由，理合查案据实声覆。为此，备由具申，伏乞照验施行。须至申者。

右 申

衍 圣 公 府

乾隆贰拾柒年玖月贰拾玖日

前事

兖州府移为书院祭田应否另招佃种请核断事

〔查究侵隐孔庙邹县尼山祀田地亩（二）（四〇五七）之一〕

特授山东兖州府正堂加二级纪录四次叶 为息恩原情斧断事。准

贵府移开，据刘士荣禀称，切身承种尼山祭田，被邹县生员沙临捏霸强赎，幸蒙 本府太老爷烛奸断归祭田，各具遵依在案。惟身徒受假捏措赎之名，而沙临不特无过，反得攘夺身田，何以安良善而儆邪奸。情实难甘，不得不再为禀明，伏乞原情恩断施行。等情。据此，查尼山建立 书院设立学录一员，凡遇采办祭品以及一切杂差大差，悉系佃户承值当差。乃沙临系邹县庠生，差使深为不便。至刘士荣虽无遁情，但甫经断归，遽然更张，亦非妥适。是田系祭产，案经前断，拟合据情移商。为此，合移贵府应如何平允以息讼端，烦为核覆施行。等因到府。准此，查采办祭品以及杂差大差等项，各佃户应行承办。沙临既系邹县庠生，有无违碍之处，敝府无案可据。但前项地亩业经滋邑讯明，实系 书院祭产，断归管业。应否另召佃种，并作何承办一切差务之处，应听贵府照例办理。为此，合关 贵府，请烦查照施行。须至关者。

右 移

袭封衍圣公府

乾隆二十九年七月十三日

前事

移 押

札付五经博士颜士埰为准令乐舞生郑立钦注册免丁事

〔乾隆年间府庙属官请优免差徭（二）（一四八一）之十六〕

袭封衍圣公府为恳恩檄飭豁免丁银事。据乐舞生郑立钦呈称，切生入庙充膺乐舞，小心供事，从无失误。但生系复圣庙丁户，凡庙庭有事，生应往役，否则按丁纳银。窃思生既供事于至圣之庙，又奔走复圣之门，一身两役，势难分应。恳乞恩准移会豁免，俾生得永充乐舞而无两顾之忧，则感〔恩〕无既矣。等情。据此，合行札飭。为此，札付该翰博遵札事理，即将乐舞生郑立钦注册免丁，令其专充乐舞，以便供事。毋违。须至札付者。

右札付五经博士颜士埰准此

乾隆三十八年闰三月二十三日

曲阜县移为准免乐舞生罗应举之父充膺百长事

〔乾隆年间孔庙各屯厂官庄佃户请优免差徭（四）（一五一〇）之四十三〕

署兖州府曲阜县为恳恩转移优免事。乾隆四十一年正月二十一日，准

贵爵府移开，希即转飭查明该乐舞罗应举之父罗天福免其报充百长，实为公便。等因。准此，查罗天福既系乐舞罗之父，除免其充膺百长外，拟合备文移覆。为此，合移

贵爵府，请烦查照施行。须至移者。

右 移

衍 圣 公 府

乾隆四十一年正月二十六日

前事

移押

乐舞生李克忠等呈为恳恩移送优免差徭事

〔乾隆年间孔庙各屯厂官庄佃户请优免差徭（七）（一五一三）之七〕

呈

具呈乐舞生李克忠等

呈为恳恩移送优免差徭事。切生等蒙 恩选充乐舞，供事

阙里庙庭，杂泛差徭例邀优免。除本身之外，免供丁二名，凡曲阜县差事概予优免迄今。生等有

田地数亩，坐落邹县，兹蒙邹县概行派出，现在原差催纳，理宜呈明。伏乞

公爷恩准移送优免，感戴无既矣。上禀。

计呈开粘单一纸

乾隆四十八年九月 日

计开

公孙社大薛村刘丕成供丁 刘滋地亩钱四百五十文
百顺地亩钱五百二十文

胡希凤 地亩钱一千二百五十文

胡运 地亩钱二百五十文

胡治礼 地亩钱六百文

元兴社富村 李习即纯公供丁地亩钱八百文

仲三地亩钱五百六十文
捷元地亩钱四百五十文

东屯李克忠地亩钱三千五百文

移曲阜县为礼生教习贾承绪并无抗违殴差事

〔乾隆年间府庙属官请优免差徭（七）（一四八六）之三〕

袭封衍圣公纪录一次孔 为陈明情由恳请移释事。据礼生贾承绪呈称，切生补充

圣庙礼生，例免本身及供丁一切差徭。生供丁贾承绪，贾进孝即承业之父，生两家公喂牛一只，昨有练地派生牛拉车，当经禀明移免未允。生已将牛套车，行至南关，因众家俱将牛卸至家中饮喂，生亦将牛牵至家中饮喂。及套车之时，生牵牛较迟，是以生牛未曾使出，并无抗违殴差情事。乃原差以殴差具禀县案，现蒙拘押。并正值演礼之时，理合陈明。原领钱一千合并呈缴。等情到本爵府。据此，查礼生贾承绪系属礼生教习，领有札付，在

庙历供

大差。兹据前情，相应据情移会。为此，合移

贵县烦为查照省释，实为公便。施行。须至移者。

计移缴钱一千

右 移

曲阜县

乾隆五十四年十一月二十七日

圣公府行

佾生郑淑裕呈为恳请移县优免大差派办事

〔乾隆年间府庙属官请优免差徭（七）（一四八六）之四〕

具呈乐学佾生郑淑裕住西关

呈为大差切急恳 恩豁免事。切佾蒙恩拣选入庙，例捐供丁三名。佾无供丁可免，佾只有魁隆小铺为生。近蒙 本县太爷派办大米二十石，黑豆五十石，麸子一万斤，以为大差之用。

理应急公奉上，但佾铺本小利微，兼以身居庙庭习仪伺候，实难兼理。诚恐误差干咎，不得不据实陈明。恳乞

公爷移文豁免，感戴无既。上呈。

乾隆五十四年十一月 日

移曲阜县为转徼原发乐舞生庞丕业等名下供丁银封事

〔乾隆年间府庙属官请优免差徭（七）（一四八六）之九〕

袭封衍圣公纪录一次孔 为恳请移缴事。据乐舞生庞丕业等呈前事呈称，切生等荷蒙将名下供丁摊办麸豆杂项行文优免，所有原发银封理合呈缴。伏乞恩准移会转缴，实为恩便。等情到本爵府。据此，拟合移会。为此，合移

贵县烦为查照来文事理，希将原发乐舞生庞丕业等名下供丁银封查收。仍祈见覆施行。至移者。

计移送乐舞生

庞丕业供丁 庞丕基银一封

郑淑裕供丁 魁隆店银一封

程发旺供丁 程发聚银一封

广天添供丁 祥瑞号银一封

右 移

曲阜县

乾隆五十四年十二月初六日

圣公府行

移曲阜县为优免礼生乐舞生等杂差事

〔乾隆年间府庙属官请优免差徭（七）（一四八六）之十七〕

袭封衍圣公纪录一次孔 为恳请移免事。据礼生张元进，乐舞胡儒林、刘承荣、柴秉美、刘永江、刘永孝、张广考等呈前事呈称，切照生等荷蒙拣选，给札供事，例免地方差徭，即历届

大差从未派办。昨有练地差役派生等办买劈柴、秫秸并喂养羊只，强交钱文。惟是生等常川在庙演习礼乐，势难分身办理。为此，呈明恳恩移免，并将原发钱文随文移缴。等情到本爵府。据此，查礼生张元进、乐舞生胡儒林等领有札付，久经在 庙供事，所有地方差徭例应优免。兹据前情，并呈缴原发钱文前来，查无影射情弊，相应移会。为此，合移 贵县烦为查照来文事理，希将礼生张元进、乐舞生胡儒林等现在派办劈柴、秫秸并喂养羊只各项差事，均予优免，以维成例而示优异。实为公便。须至移者。

计开

礼生宋肇瓚派供丁宋玉恭杆草一千斤系春亭社发钱二千文

礼生张元进劈柴一千五百斤发钱三千文系崇圣社

乐舞胡儒林供丁存奇杆草五百斤发钱一千文系小雪社

乐舞刘承荣秫秸四百文系西忠社

乐舞柴秉美供丁思忍劈柴五百斤张羊社

乐舞刘永江供丁文灿派羊六只系东忠社

乐舞刘永孝派羊六只系东忠社

乐舞张广考派羊二只系张羊社

右 移

曲 阜 县

乾隆五十四年十二月十七日

圣公府行

七品执事官孔昭熠呈为县役强派杂差借差殴辱恳乞作主事

〔乾隆年间府庙属官请优免差徭（七）（一四八六）之十四〕

具呈七品执事官孔昭熠

呈为借差殴辱 恩移究事。切本月十五日，有快役王文诗差令孔衍文、孔传曾等在单家村派办杂差，硬赴门生内宅揭锅运椅，抬床拉棹。门生父言道，若办差事，何须用强。伊不容分说，即将门生父殴打撕衣，并将门生母推倒跌伤。所骂之言秽污难堪。门生父无奈，进城告诉情由。似此借差殴辱，情实难甘。理合据实陈明，叩乞

仁明大宗主恩准作主，阖家焚顶。上呈。

并被撕袍子一件

干证郭振清

被呈孔传曾

尹太环

刘希黄

乾隆五十五年二月

来函为学差按临时礼生广永年等杂货铺碍难免差事

〔乾隆年间府庙属官请优免差徭（七）（一四八六）之五十五〕

日昨接奉

手书，备悉一切。兼稔

世老先生履祉安和，顺时集庆，可胜慰忭。礼生广永年等屡承

淳囑，本应如

命。第该生等既经开设杂货铺，原不禁人购买。前已批示一切杂差，二铺优免。但遇学差按临，除赴泮买办外，或有不时之需，不得不就近照市价买补。兼各铺程万顺等金称，同一开铺，逐利所籍，何以二铺独大占体面，概不理落。似此，则学差可俱掉臂不顾矣。事处两难，

尚希

鉴原。特此泐

覆。顺候

台佳不一。

弟

名另泐

任文运呈济宁州为优免差徭恳请勒石事

〔修治滋阳县境孔庙祀田附近河堤（四八五五）之三十一〕

具呈世袭奉祀 恩生任文运

为呈验前案 准勒石以垂永远事。切据乾隆二十七年

特授济宁州正堂加三级纪录六次纪功五次徐 为呈明优免花户地亩清册给示晓谕等事，据生员任者静等稟称，切生等仰叨先贤后裔，于康熙五十四年蒙 抚宪蒋 将任姓循照闵仲之例，一体优免差徭在案。又于乾隆廿三年，蒙 恩详请 河宪部堂张 批准，开河、筑堤、捕蝗以及一切杂差概行优免，并给示晓谕亦在案。生等恐有假冒得滥邀

盛典，恐负优恤之至意，为此，造具清册，叩乞 恩准铃印发房存案。仍乞给示晓谕勒石，以垂永久，不惟生等感恩，即 先贤亦佩德无既矣。等情。据此，除册籍铃印外，合再出示晓谕。为此，示仰该地方约地庄长知悉，嗣后 先贤任子后裔，差徭概行优免，各宜凛遵毋违在案。蒙此，合宜勒石以垂永远。但尔时未经勒石，今日久未敢擅便。为此，呈验原示，恳 准勒石，感戴无既。上呈。

济宁直隶州正堂张

批准勒石

乾隆五十五年六月

日具

此石原不合置于家，但恐仍前假冒滥刷，故未立于州署。倘遇迁移徙口毋忽。案存工房。前案存总科。

程万顺等稟为广泉顺等仗恃礼生抗不赴县领价事

〔乾隆年间孔庙各屯厂官庄佃户请优免差徭（八）（一五一四）之三十五〕

具稟杂货铺户 程万顺 郑魁荣 卢未太
王协顺 广祥瑞 王泰顺

稟为屡抗不遵恩 恩差追追事。切有广泉顺等抗办 学差，身等具稟，蒙恩传讯。伊仍坚抗，又稟案下。蒙批，查广泉顺等虽系 文庙礼生，应免杂差，但 学宪按临需用物件，本县除差人赴州买办外，间有短缺，不得不就近照市价买补，并非杂差可比。广泉顺等既经开铺，自应买卖从众，何得坚执沮公。该铺等仍邀同广泉顺等秉公核算，赴县领价，其余杂差免伊二家摊办可也。支单一纸，发还身等。遇批同赴伊铺结算。伊言系

圣庙礼生，虽有批示，必不摊办。身等无奈，叩乞

仁明太爷恩准差追，感德无既。

乾隆六十年五月 日

批候差追

曲阜吴令函覆为县役不合擅用礼生车辆事

〔嘉庆年间府庙属官请优免差徭（一）（一四八七）之二十四〕

曲阜县吴太爷来书

孔二太爷安启

嘉庆五年七月十三日到

接奉

台谕，敬悉一切。查此次兵差过境，雇用车辆，所有府中礼生之车，敝役不合擅行动用。既蒙

札示，遵将该差枷号。俟查明果系王荣先车辆，即当给还原物也。肃此奉覆。恭请

福安。敬辟

尊谦，惟

鉴不备。

名正具

乐舞生王建清呈为恳移泗水县援例优免事

〔嘉庆年间府庙属官请优免差徭（一）（一四八七）之三十〕

具呈乐舞生王建清系左舞部

呈为恳 恩移会援例优免事。切生充膺乐舞，领有札付。嗣于嘉庆三年十一月二十一日丁忧，六年二月二十一日服满起复。虽系备补，仍常在庙供事。兹因泗水县差役派生出小车一辆，伏查礼乐诸生，例蒙优免，为此，呈请移文泗水县援例免办，则感 恩无既。伏乞

公爷恩准施行。上呈。

计开

乐舞生王建清曲阜县王家村人寄籍泗水县临西社南里仁村

本名承粮 供丁二名
王元康
王建彩

嘉庆十年九月二十一日

袭封衍圣公府批 准据情移会可也

洙泗学录孔广垚稟为长垣县捏详罪款押辱命官恳恩昭雪事

〔清朝时期直隶长垣定兴两县生员等借名助修境内孔庙请免差徭
(一四五五)之九〕

洙泗学录孔广垚稟 为无辜受辱并被捏详乞 恩辩明伸冤事。情因职奉

宗主大人为长垣县匡城里请免差徭公文一角赴长垣县投递，适遇垣邑派拨五台差务，垣邑共六十里，分每里派大钱一百六十千文。职人衙投文，面见县令。伊言此差徭(赔)垫甚多，匡城里户人诚能额外急公，我即准免以后差徭。户人闻信，遂踊跃急公，额外输诚办大钱二千正，托职代为完纳。职念户人皆代种

圣庙祭田，职既主祭，代为销缴似亦无妨。不意县令既已收讫，次日忽蓄意生心，大堂迫见，声言行贿买免差徭。职与伊表白，伊不容分说，大肆污辱，言职以四十两银捐办前程。算得甚么，仗持一纸文书，就来搪塞尊官。言多不逊，有碍 宗主，不敢详述。伊遂叱彼虎役将顶帽摘去，着三班头役押在典史衙署，刻不容便，立逼递贿赂干结。职不肯递。此四月十三日事。迨十九日，又当堂吩咐，今日辰刻我已五路起详，将尔革职，尔当随差归籍，遂点差将

职解回考城。职思户人托缴钱文，原系军需，并非行贿，有户人可证。况有公文转请，职又何必与之买贿也。即学录之官，原由 宗主选择，并非捐纳，伊乃目为捐办，且目为四十两银前程。又不奉批文预先摘去顶帽，竟然任意捏详递解回籍。职虽卑微，亦系

朝廷命官，公爷属员。以一县令乃大作威严，辱职如奴隶，予夺若自操言又侵及 宗主。似此耻辱难堪，且惧捏详罪款，不得不叩禀

宗主大人案下，辨明无辜，昭雪前耻，庶孔氏之体统不至扫地，捏详之罪款难加。职身则顶感无既矣。

嘉庆十五年四月 日具禀

为飭令将孔广垚递回原籍及辨明其并无行贿事

〔清朝时期直隶长垣定兴两县生员等借名助修境内孔庙请免差徭
(一四五五)之十二〕

遵批等事。嘉庆十七年正月十七日，蒙

宫保总督部堂温 批本司呈详长垣县前置知县陈华祝禀报学录孔广垚代缴生员曹维屏等办差钱文行贿免差一案，请示遵等缘由，蒙批如详飭遵。至学录孔广垚虽讯无行贿情事，但囑令生员曹维屏等呈求

圣公府札付该县免差，持符干预地方公事，实属不合，仰候移咨

圣公府斥革，并咨

河南抚部院转飭遵照仍飭令将孔广垚递回原籍考城县收管，毋任逗留滋事。缴。等因到司。蒙此，合行抄看飭遵。为此，仰府官吏照牌事理，立即遵照院示转飭该县，迅将孔广垚递回原籍考城县收管，毋任逗留滋事，有干未便。速速。

计粘抄看一纸

本司覆查学录孔广垚代缴曹维屏等办差钱文，既据该府等质讯明确，委系孔广垚一时误会，冒昧封投，并非有心行贿。该县陈令传问时不过互相分辩，亦无咆哮情事。且事在本年两次恩旨以前，应如该府所请，免其置议。生员曹维屏、曹焕然、朱虎变赴

公府呈求札付该县免差，系为修庙起见，并无不合。其设借钱帖嘱令孔广垚代缴，时值该县正办大差，因无人夫，故凑集大钱二百千以作雇夫之用，本属急公，均无庸议。该署令陈华祝经办差务，虽系俱照旧规派办，并无浮勒情事，第此案并无讯得确情，始则率以孔广垚贿求通禀，请将该职员顶戴斥革，继复不候批示辄将该职员擅行递借。事出两岐，实属纒缪。应请将署长垣县事试用知县陈华祝记大过二次，以观后效。至该处

孔庙既已颓败，自应修葺。应请将所缴钱文给与曹维屏等领回，听其自行鸠工使用，不得官为经理。并令匡城里之五村逐年指修，毋致日久倾圮，春秋致祭，一应差徭，仍照旧规。大差办六免四，小差全免。谕飭该五村遵办，以照永久而息讼端。余均如所议办理，是否允协。

乐舞生萧崇慈禀为县主不顾供丁优免之例派差肆辱恳乞庇佑事

〔嘉庆年间府庙属官请优免差徭（二）（一四八八）之八〕

具禀乐舞生萧崇慈

禀为恳 恩庇佑事。切身蒙 恩准入

圣庙供事多年，每年将乐舞生名次并每名供三丁名次送县优免差事。今于本月二十二日，忽被县主差传，将身同龔胞兄萧崇惠拘押充膺地方任状，于旧行优免之例，已属不合。且于二十四日，身入

庙演乐之后，身与兄送饭，并被县役辱骂。身与理讲，詎料壮役高存忠喝令将身采倒，拳打脚踢，面上耳傍抓伤三处，发辫采去一片，并将顶帽脚踏，顶子投于尿坑。声叫乐舞生名字，嗾骂不堪口述。似此不逊，身被羞辱无足轻重，恐其有玷

圣庙体统。不得不据实禀明，叩乞

仁明公爷 恩准庇佑。施行。

嘉庆十六年三月 日

移曲阜县为县役拘押供丁妄派县差请照例查办事

〔嘉庆年间府庙属官请优免差徭（一一）（一四八八）之九〕

袭封衍圣公府为恳恩行文准免县差事。本年三月二十五日，据司乐李光祖申前事申称，有乐舞生萧崇慈云云。又据乐舞生萧崇慈具禀云云。等情。据此，案查

至圣庙额设乐舞生一百八十四名，于顺治元年经 山东抚院方

具题钦奉

恩旨优免本生一切差徭，仍免本户二丁，以供本生往来盘费。等因钦遵在案。历年造册移送

贵县存案。今查萧崇惠实系萧崇慈胞兄供丁之人，例应优免差徭。乃 贵役拘押充膺地方已属不合，而乐舞生萧崇慈为伊兄送饭，壮役高存忠等辄敢肆行殴辱，实属不法。拟合移会究办，查明免差。为此，备移

贵县，烦为查照来文事理，即将壮役高存忠等究办示儆，飭令将供丁萧崇惠释放，免其充膺地方，移覆存案。实为公便。望速施行。须至移者。

右 移

曲阜县

嘉庆十六年三月二十六日

圣公府行

司乐李光祖申为乐生等坚不演习请核夺事

〔嘉庆年间府庙属官请优免差徭（二）（一四八八）之十〕

司乐李光祖为申请核夺事。本日卑职在

庙飭催演乐，以备明日

学台考验音律。无如学长并乐生等抗违不遵，佥称萧崇慈供丁崇惠本县太爷派充地方，公爷行文关提，不惟不发人，反将萧崇惠掌责十下。嗣后倘再派差事，我等皆是如此，要这乐舞生何用。职再四开导，坚不演习。职无奈，不得不据实禀明，伏乞

爵宪电核施行。须至申者。

右 申

袭封衍圣公府

嘉庆十六年三月二十九日申

乐舞生李肇元呈为县役诈财殴骗恳乞移究事

〔嘉庆年间府庙属官请优免差徭（二）（一四八八）之十四〕

具呈乐舞生李肇元住辛安社张庄村户籍

呈为指官殴骗恳 恩移究事。切生于本年三月间选充乐舞，领有札付，一切杂派差徭例有优免。詎有练地王福如于九月二十四日，带领不知姓名衙役二名突至生家，口称派车送兵，勒索钱文。生赴庙考乐，生叔在家，言既情愿出夫，不能出钱。当触伊等虎怒，将生叔自卧房拉出，采发攒殴不堪。生叔畏伊凶恶，央到高丕杭交给京钱一千，方得饶命。更可恨者，伊等临行扬言，你家现有乐舞，俺今打了你，又使了你一千元，你就起（启）了

公爷，间之（简直）一样。似此诈财殴骗，肆言糟辱，情实难甘。伏乞仁明公爷恩准移究，庶衙役知儆。不胜感戴。上叩。

被呈王福如衙役二名

干证高丕杭

嘉庆十八年九月 日

乐舞生邹义呈为地方硬派出差恳乞移会优免事

〔嘉庆年间府庙属官请优免差徭（三）（一四八九）之一〕

具呈乐舞生邹义

为明知硬讹恩 恩援例优免事。窃照

至圣庙乐舞生于顺治元年经 山东巡抚方 具 题

钦奉

恩旨优免本生一切差徭，仍免本户二丁，以供本生往来盘费。等因历久钦遵在案。今生充膺乐舞，常川供事。有地方孔昭灿率领县役六七人，将生大车一辆硬拿出差。生告以乐舞例不出差。詎云不管你乐舞不乐舞，全当我抢了你的，你就是乐舞也吓不着人，遂率人将车拉去。窃思地方孔昭灿前于四月间拿生牛当差，已蒙 恩差官将例不出差之例告知本县。今又拿车，是地方孔昭灿明知生充乐舞，将生例得优免之差徭，屡次硬讹硬拿。理合呈明，伏乞

公爷恩准移免，庶

恩例不空存，乡懦得拯救。焚顶无既。上呈。

嘉庆二十二年九月初十日

乐舞生□沂禀为县役派差肆辱恳乞作主事

〔嘉庆年间府庙属官请优免差徭（三）（一四八九）之三〕

具禀乐舞□沂住张羊社荀家村

为援例被辱下情难咽禀明电鉴事。切生于九月十四日同工人官化泗赶集，遇练地东野绪池领县役张传恩等数人，硬将生工人官化泗拿去推车。及生赶上告系乐舞，诨云，俺是奉的太爷票子，你不必拿这乐舞吓吾。你不说是乐舞，这差尚有商量，既是乐舞，不必多说，快跟着俺，看耽误了工夫。将生拥在一边，不容说话。伏思乐舞免差系蒙

皇恩，在 庙供事原冀有荣。今乃一提乐舞，遂被如此之辱，情何以堪。为此备陈，伏乞 公爷电察施行。

嘉庆二十二年九月十五日

执事生袁体中呈为县差扳报米户恳准移免事

〔嘉庆年间府庙属官请优免差徭（三）（一四八九）之九〕

具呈执事生袁体中供丁永茂店

呈为恳 恩移免以维成例事。切生充膺乐舞，在执事部供事 开设小铺生理，所有一切县差向邀优免。今于本月初三日，忽有县差报生米户，立逼赴常平仓领谷，刻不容缓。理合呈明公爷恩准移免施行。

嘉庆二十二年九月 日

裕州启事厅邓昭稟为捏充社副恳恩专差移覆事

〔嘉庆年间府庙属官请优免差徭（三）（一四八九）之十八〕

具稟河南南阳府裕州启事厅邓昭年三十九岁 为违例捏报充膺社副恳 恩专差移覆事。切职于嘉庆二十二年九月间恭谒

圣庙，蒙恩赏给启事官一名。职荣身回家，安分守己，从未格外滋事。詎有本州乡约张恭于本年三月间，隔里捏稟职充膺社副，蒙差张学顺将职差拘到州被押，羞辱难言，吓诈钱文。职具呈稟覆为恳恩批示以便遵行事。缘稟传职充膺社副，理应恪遵，不宜烦渎。但职在

公府拣选启事厅，今岁正月告假回家祭祖，目下即要赴

公府任事，忽蒙差催在州充当社副，恐误

公府执事。等词。蒙批，查

公府启事厅例应由 部补充，尔曾否奉有 部照，未据声明，倘然捐纳虚衔，即与齐民无二，毋任推诿。职见批恐有不测之罪，持批连夜奔轅，叩 宪以讨专差移覆，免职受累，以彰公府之鸿慈。为此，伏乞

仁明公爷恩准施行。

嘉庆二十三年五月初八

批 查 公府启事厅例应由 部 充补，尔曾否奉有 部 照，未据声明，倘然捐纳虚衔，即与齐民无二，毋庸推诿。

启事官孟学孟等呈为恳请列入儒籍优免差徭事

〔嘉庆年间府庙属官请优免差徭（三）（一四八九）之三十二〕

具呈署启事官孟学孟随朝伴官张发荣焦宏道 呈为恳 恩移会以全体制事。切职等住居邱县，本籍旧规凡有职衔及生员、监生俱称儒户，优免差徭，由来久矣。职等蒙 恩拣选委署，今职窃意亦可以光闾里而异齐民也。詎自接委以来，并不得列入儒户，仍然与编氓无别。伏思职等职分虽微，亦系载在缙绅，反不能与生监一律免差，似觉有伤体制。理合据情陈明，伏乞

公爷恩准移会原籍，使职等改拨儒户，优免差徭，则感戴无既矣。谨呈。

嘉庆二十四年四月

日

掌书刘廷辅为县台派差锁押勒索恳乞移文事

〔嘉庆年间府庙属官请优免差徭（三）（一四八九）之四十二〕

具呈掌书刘廷辅住河南鄆城县

为据实呈明恳 恩移会事。情缘三月二十四日，蒙本县票派职全车一辆，立等应用。乃差役并不要车，硬行折价要大钱二十一千文。职未允许，即传赴城。县台当时讯问，你为何抗车不出？职言不敢抗违，但职系

至圣庙员，与齐民有别，例有优免，又有去岁优异文在案。县台说，不论你是何功名，竟敢抗违不出，将职严行锁押。职受苦难支，即交付该差车价钱五大千文，方许讨保放出。为此，匍匐来曲，据实禀明，伏乞

公爷恩准移文本县，将职释宁，以免派车马，以正官箴。感戴无既。上呈。

嘉庆二十五年五月 日

移奉天新民厅为伴官孟兴义等援例优免差徭事

〔道光年间府庙属官请优免差徭（二）（一四九一）之二〕

袭封衍圣公府为公恩鸿慈援例转移以广

皇仁事。道光七年四月二十一日，据伴官孟兴义、屯官孟广成等具呈前事，词称云云。等情到本爵府。据此，查

圣贤后裔散处各省者，例应优免一应杂泛差徭。今该伴官等实系 亚圣裔孙，寄居 贵治地方，似应援照成例，准予优免，以昭体恤。兹据前情，拟合移会查核办理。为此，备移 贵厅烦为查照，希即酌量优异施行。须至移者。

右 移

奉 天 新 民 厅

道光七年四月二十一日

圣 公 府 行

伴官阎珍稟为恩准移会遵照旧规不许额外科派事

〔道光年间府庙属官请优免差徭（二）（一四九一）之十九〕

具稟伴官阎珍系河南卫辉府汲县人住南乡二图白露村去城三十里

为据实陈明更坏旧规外派号草息 恩移会以辨名分事。缘汲县自 国初以来，四乡分作二十图。每图修办差车一辆，二十图共车二十辆。各图有保正一名催办，儒一民二。地亩钱文，喂养车马，儒户完纳丁地钱漕，别无杂项，民户加纳草筋，入号养驿。凡有职人员均按儒户办公，历有年所。不料南二图保正黄金堂抗违旧规，以号草捏稟县主批候差拘比追。职以向借不遂，外派号草等情具稟县主案下，蒙批，查捐纳庙员职衔，不特无免差之例，亦无照儒户之论。据称保正黄金堂向借不遂，浮派号草是否属实，候质讯察夺。示后将职拘案。职以理分变（辩），不惟不允分说，且声称尔捐纳庙员非儒户可比。保正借此代辱，讹去大钱二十千文，利己坏规。窃思生监礼生尚为儒户，独于 圣庙职员外派号草，若不辨正名分，卑贱何分。受讹被辱，情实难甘。为此，匍匐来曲，据实陈明，叩乞

仁明公爷 恩准移会，遵照旧规飭令保正不许额外科派号草，感戴无既矣。

道光十六年三月 日

賚奏官崔建明稟为县役违例科派肆行糟辱恳乞移会优免事

〔道光年间府庙属官请优免差徭（二）（一四九二）之三十七〕

具稟賚奏官崔建明
崔长济青州府高苑县人

稟为违例科派肆行糟辱恳

恩移会核办事。切职等于道光二十二年蒙

恩委署今职，在曲恪供职守。兹于本年三月间请假回籍省亲，突有县中保地索派差徭。职等因忝居属吏，遇有地方一切杂泛差徭，向邀优免，以别齐民，未敢违例允许。不意遽触其怒，伊等即肆行糟辱，将职衣服拨落，毁谤难述。职等无奈，当经呈明县主。伊等恃有手眼，传讯无期，至今催捉职等更甚。为此，匍匐来曲，据实稟明，伏乞仁明爵宪大人恩准移会县天，援照向例优免，以昭体恤，职等感戴鸿恩无既矣

賚奏官刘运新稟为恳请移府飭县以免拖累事

〔咸丰年间府庙属官请优免差徭（一四九三）之五〕

具稟賚奏官刘运新系直隶广平府威县东北乡东徐村人为攀拉抗欠差徭恳 恩移府飭县以免拖累事。切职蒙 恩选补，于本年二月初八日来曲供职。突于二月二十八日，适有工人郭成来曲送信，现在县主因帮助房山差徭，谕令各户每亩地出京钱贰拾文，限十日全完。职闻此事甚急，既蒙县主差派，不能稍缓，即着工人赶紧回家。差徭之事，如数缴出。职方稟请爵宪大人赏假回籍，职未及归，又有工人郭成来曲，蒙县主示谕，说职率领村民，抗不完差。伏思职在曲供职，并未回家，何得率势村众攀拉，不辩自明。情实难甘，叩乞 官保仁明公爷 恩准移府飭县免传，以免拖累。职感戴无既矣。上稟。

咸丰五年三月二十六日稟

广平府威县申为武生刘运新有无在庙供职事

〔咸丰年间府庙属官请优免差徭（一四九三）之十〕

代理直隶广平府威县为详请事。详武生刘运新等传帖聚众，抗差劫犯，拒伤捕勇，首要各犯脱逃无获壹案，除全详备录书册不叙外，现讯地邻人等供称，刘运新尚在山东供职，所供是否属实，理合详请

宪台查核，俯赐飭查。刘运新现在有无在

至圣庙供职，飭知下县，实为公便。为此，备由另册具申，伏乞照详施行。须至详者。

右 详

太子太保袭封衍圣公府孔

咸丰五年四月初一日知县沈宝桐

郛城屯屯官段守美为恳恩移县优免杂差事

〔咸丰年间府庙属官请优免差徭（一四九三）之十六〕

官保公爷

郛城屯屯官段守美禀为恳恩移县优免杂差事。窃职系泰安县人氏，蒙 恩委署郛城屯屯官。回籍后安分守己，耕种度日，县尊从不派当杂差。今有地方李广顺屡次向职借贷，因一次未允，伊即捏词禀知本县，硬行派差。伏思定例，凡庙庭职员所遇杂泛差徭，概行优免。今无故被扰，难保非李广顺从中舞弊，情实难堪。为此，叩恳

仁明公爷恩准移县优免，以安农业。沾仁上稟。

〔略〕

二月初九日

伴官魏宗明稟为恳乞援例优免差徭事

〔咸丰年间府庙属官请优免差徭（一四九三）之二十一〕

具稟伴官魏宗明直隶东光县人

为恳 恩援例优免差徭以昭体恤事。切职于咸丰二年蒙 恩选补伴官后，遇有地方差徭，屡蒙本县 仁天鸿恩，优免在案。第恐日久弊生，书吏不遵旧例，妄行科派，与齐民无别。为此，匍匐来曲，伏乞

官保仁明公爷恩准移会，援例优免，以昭体恤。施行。

咸丰六年九月 日

执事生郑金炎为恳乞移县免派差徭事

〔咸丰年间府庙属官请优免差徭（一四九三）之二十三〕

具禀执事生郑金炎叩禀

公爷台前，敬禀者，切礼乐两学例免差徭，碑文可考。缘生父郑继禹卖杂粮生理，兹值 县主派碾漕米，理合遵例禀明。叩乞

公爷恩准移县，免派碾米差徭。感戴无既。

咸丰六年九月 日

奎文阁典籍申为礼生张凤岐被邹役逼差传押恳请移会释回事

〔咸丰年间府庙属官请优免差徭（一四九三）之三十〕

奎文阁典籍为详请移会事。恭照

至圣庙额设礼生，现在额数不敷，且于礼仪有未娴熟者亟应教习，以供大典。奉

礼谕令卑职督同学长等认真学习，毋稍疏懈。等因。蒙此，卑职遵即差传入

庙学习去后。兹于本月初六日，据门斗禀称，旧礼生张凤岐住居曲阜南新庄，与邹境毗连，种有邹境地数亩。邹县差役以兵差过境，要车为名，将该礼生传押在县，未能来学。稟请核办前来。卑职查在

庙礼生向例执帖人免二丁，即曲阜一切差徭素邀优免。现当礼生学习正在吃紧之时，未便因张凤岐尚未来学稍滋疏懈。除将已到礼生督同学长等认真教习外，所有张凤岐一名应请

爵宪移会邹县释回来学，以便令其学习礼仪。实为公便。为此，备由具申，伏祈

照详施行。须至详者。

咸丰玖年叁月初柒日典籍杨岳春申

移邹县为礼生张凤岐因欠差传押望速释回习礼事

〔咸丰年间府庙属官请优免差徭（一四九三）之三十一〕

太子太保袭封衍圣公孔 为据详移会释回事。本年三月初七日，据奎文阁典籍杨岳春详称云云等情。据此，查礼生张凤岐系曲阜县俊秀，经本爵拣选礼生，给予札付文 庙学习礼仪，所有差徭例准优免。现因兵差过境，派出车辆，将该礼生传押在案，未能来学。是否实系因差被押，抑系差役索诈，自应备文移查。祈将该礼生张凤岐先行释回，以便飭令上学教习礼仪。如必须该礼生承办车辆，或须津帖差费，即由

贵县移会本爵转飭照办，以免拖累。兹据前情，拟合移会。为此，合移贵县烦为查照，希将被押之礼生张凤岐释回。施行。须至移者。

右 移

邹 县

咸丰九年三月初八日

圣公府 行

司乐高凤鸣申为乐舞生应免一切杂泛差徭以利习礼事

〔同治年间府庙属官请优免差徭（一四九四）之七〕

详文

署司乐高凤鸣

为详请出示晓谕辨明

恩例移文到县一体飭行事。据该乐舞呈称，乐舞生如四氏后裔事例，一切地亩杂项差徭概行蠲免。

比来县役妄行派扰，疲累不堪。等因到职。职查优复

恩例，凡属圣贤后裔以及庙丁、相礼、乐舞，一切地亩杂项差徭概行蠲免，经前宪屡次申飭遵行在案。迄今各州县奉行不善，扳扰时开，致使

历朝优崇之典湮没不彰。而且奸吏恶役妄行派扰，嘲讪诸生不直一钱。此时相礼乐舞含羞忍辱，有冤难诉，官司乐者又不为之申究，故皆灰心丧气，哄然而散，供事者寥寥无几矣。夫当此派累难堪之际，人心最易感激也。愈玩已甚之时，祀典亟宜整顿也。

爵宪前曾札职选补乐舞，职遍求之，仅得数人。又札百户派户人而卒未能派得一人者，非尽职等

办理之不善，抑以乐舞在今日不惟无益于一己，而反有累于一身。职恐如此办理，徒废心力耳。然则遂不办理乎？曰是有道，莫如先感其心而作其气。恳祈

爵宪大人作速出示晓谕各处，方今地方已靖，凡属庙丁、相礼、乐舞一切杂项差徭，复行照例蠲免。如有县役妄行派扰之处，许该生指名揭告，移送究办。一而移文到县，着一体饬行。再

移咨 东抚，行文申飭充属各州县，凡属圣贤后裔及庙丁、相礼、乐舞一切地亩杂项差徭，循照旧例，出示晓谕优免。俾约地知有

恩例不敢仍行派扰，而礼乐诸生既得重沐

皇恩。谁不感思

宪德，吾知其必将共相劝勉，踊跃争先，亦不事传派而多愿充补矣。然后明赏罚，示训诫，集金丝堂而肄业之，月月考验，俾无生疏，将见

庙庭之上再闻

盛世之音，岂不美哉。为此，备由详申，伏祈

爵宪大人恩准施行。

计带原呈一纸

右 申

袭封衍圣公大人爵下

同治二年十一月二十二日

启事官李纯如等稟为恳乞移会援例优免差徭事

〔同治年间府庙属官请优免差徭（一四九四）之十二〕

具稟启事官李纯如等直隶广平府永年县人

为蒙弊阔派恳请移会援例优免事。切职等上蒙拣选飭委，均经备文移查，取到本县印结并族邻甘结在案。合见职等身家清白，并无违碍。忽于去岁十月间，有本社地方杨元合、保长杨金贵等陡生事端，硬向职等阔派杂差，索诈钱文，且言出钱若干可免名下差徭。职思优免例有旧章，准否豁免，究竟权操县上，岂得私行賄买，是以当日未遂其意。伊反捏词妄控。幸蒙本县尊洞悉利弊，当堂讯明，温语开释。职不胜焚顶感戴。第思优免定例，凡属国学庠生俱得沾被特恩。即以职等忝列 庙庭官职，亦系 钦设，似应有别齐民，援入优免之例。为此，奔轶叩恳，伏乞

爵宪大人恩准移会查例酌夺。施行。

同治六年二月 日

札付河南汤阴县为伴官吴清免充乡约事

〔同治年间府庙属官请优免差徭（一四九四）之十六〕

袭封衍圣公府为据情札会事。案据前署伴官吴清禀称云云。等情到本爵。据此，查该伴官吴清既经本爵拣选，给有信牌，系属职官。乡约一差，究系贱役，似未便派令充膺，自应免其接充，以示区别。兹据前情，除呈批示外，拟合札会。为此，札付贵县烦为查照，希将该伴官吴清乡约差使免其充膺，实为公便。望速施行。须至札付者。

右札付河南汤阴县准此

同治六年四月十三日

圣公府

河南汤阴县申复为已签饬大户免报伴官吴清充膺乡约事

〔同治年间府庙属官请优免差徭（一四九四）之十四〕

河南彰德府汤阴县申覆据伴官吴清呈称大户李蕴玉等报伊充膺乡约等情饬令另报由

河南彰德府汤阴县为申覆事。同治陆年肆月贰拾贰日，蒙 袭封衍圣公府札开，案据前署伴官吴清呈称，被本里大户李蕴玉等报伊充膺乡约，伊现系委署人员，势不能充当等情，饬即赶令大户另报妥人接办公事。等因到县。蒙此，除签饬该里大户李蕴玉等另选妥人接充办理外，兹蒙札付，理合具文申覆袭封衍圣公府查核。为此，各由俱申，伏乞 照验施行。须至申者。

右 申

袭封衍圣公府

同治陆年肆月贰拾伍日 知县双林

中覆事

札付直隶东明县为咨奏官李时清清免差徭事

〔同治年间府庙属官请优免差徭（一四九四）之三十一〕

袭封衍圣公府为据情札付事。案据咨奏官李时清禀称，窃照东明各项大小差徭，凡有职人员均各一体遵办。至于马草、地保、更夫等项，既蒙拣选，可否吁恳优免，稍与齐民有别，以示优异，理合禀请查核。等情到本爵。据此，查该职员所禀各项差徭，均照章遵办。惟所请免纳马草等项，该职员既属职官，应否准免稍示区别之处，相应据情札付。为此，札付贵县烦为查照核覆，实为公便。施行。须至札付者。

右札付直隶东明县准此

同治十二年十一月十一日

圣公府

直督咨为张环等借题免差朦官渎禀请注销该案以杜刁狡事

〔清朝时期直隶长垣定兴两县生员等藉名助修境内孔庙请免差徭
(一四五五)之二十二〕

太子太保文华殿大学士兵部尚书兼都察院右都御史总督直隶等处地方军务紫荆密云等关隘兼理粮饷河道长芦盐政管巡抚事一等肃毅伯李 为

咨明事。据定兴县知县朱乃恭禀称，切于光绪元年十一月二十九日奉到

袭封衍圣公府来文，以据阜县武举张环、文生李梦龄、武生孙桐、监生杨泽等禀请将阜县阎台村旧有

至圣庙一座重为修理，优免该村班车并草束杂差，令即遵照办理。等因。卑职随查得此案先于同治十二年三月卑前县彭令任内，曾据素不安分之庙员阴世祥等禀经

衍圣公批准阎台村捐修

圣庙优免该村差徭等因行文到县，并蒙本府转准衍圣公府照会前因，札饬查覆。当经卑前县彭令将定邑系九省通衢，差务纷繁，不得不借资民力，断难免差情形申覆在案。乃阴世祥等以前

谋未遂，隐不露面，复有武举张环等出头，径赴衍圣公府续禀前事，行文来县。卑职至愚，以为该村既旧有

圣庙，如果村人因庙宇残败，集资修理，以存古迹，原无不可，而必欲借此免差，是其意固不在修庙而在渔利。阳博尊崇

圣教之名，阴图包揽差徭之地。人心不古一至于斯，卑职所为长太息者也。然免差苟无害于地方，卑职亦何借此一村差徭不为善举。无如定兴附近

皇畿，近年西陲兵事未竣，差使之繁无异涿、良。所有地方一切差徭，自军兴筹饷捐例减成，家号素封者无不报捐贡监职衔，借图免差。他如鹿公祠之扫地夫，儒学挂名之门斗，营汛挂名之兵丁，以及功牌庙员等项，无不可借词免差，其流弊不可言喻。就卑县现在差徭而论，较诸先年原额已不及十分之三，办理甚形拮据。至班车一项，尤为紧要之需，万难稍减。闻台村向分南北二店，设有班车二辆。南店应办班车四分九厘，合带管之寥家庄二分，南合庄八厘，南幸村一分三厘，石相村一分，公出车一辆。北店应办班车八分，合带管之翟家庄二分，公出车一辆。共计车二辆，入号当差，历有年所。定邑统计班车十八辆，按大小村庄均分派办，向有旧规。然车少差繁，不敷应用，每由署中自备重价雇觅农车，赔累情形，当亦合邑绅民所共见共闻。诂该武举张环等不顾官之为累，只知借题免差，哄诱愚民，图饱欲壑。在衍圣公府远在隔省，未能详悉下情，遂致允其所请。但事关大局，今日以此为名，明日借彼为题，纷纷效尤，何所底止。势必至地方官事事棘手，终日难安。为今之计，惟有已减者不复增，现有者不能减，庶劣衿无所施其伎俩，可以相安于无事。若论

圣庙一层，我

国家尊师重道，直省各郡邑无不建庙，春秋致祭。至该村之庙，不过因相传至圣辙环时曾宿于此，土人追仰遗徽，于顺治九年立庙以祀，本不在

敕建之列，规模迥非郡邑学宫可比。查该村富庶为定邑最，如其诚心景仰，不忍庙貌就圯，尽可在村中各富户捐资修葺，即由卑职酌量捐廉倡率亦所乐从。惟不准向外村科敛，以杜扰累。倘或该村无力捐办，则当兹物力艰难之际，此事究非急要工程，稍为从缓亦未始非宜，夫圣教在乎正心诚意，心术不正，何言乎教。若而人者固当见斥于门墙，而为

圣人所深恶痛嫉也。卑职以政体攸关，未敢因其修庙之举，致启小民抗差之渐。用敢缕晰直陈，合无仰恳宪恩，将不能免差缘由据情咨覆衍圣公府备查。并声明嗣后该绅衿等如再以免差续禀，即请径行批驳，以省案牍。理合抄录公府原文禀呈查核批示。等情到本阁爵部堂。据此，查所禀系属实情，应准照办。除批飭遵照外，相应咨明。为此，合咨

贵府烦请查照，将张环等呈请之案注销。嗣后如再有图免差徭赴府渎禀者，即请径行批驳，以省案牍而杜刁狡。须至咨者。

右 咨

衍 圣 公 府

光緒元年十二月初十日

监印官文巡捕候补县丞严暄

张羊庄小甲等稟为乐舞生酆克固藐例抗差恳乞追究事

〔禁止窃刈林草（四九七〇）之十二〕

具稟张羊庄小甲 酆绍升
张广根等
酆绍全

为藐例抗差恳 恩示谕以儆奸狡事。情缘张羊庄地有肥磽，租有轻重，所有上中地每亩纳租或七斗，或五斗。特因割草出夫，故将上地拨出六十亩，以备差用，每亩仅纳租贰斗五升，向系旧章，遵循已久。不意数年以来，有乐舞生酆克固狡猾异常，托词供职，将出夫之地霸种十数亩。每逢割草时，硬行抗差不出，数年未皆系小甲等代顾采割。前已稟明，蒙 恩委查清楚，未蒙出 示晓谕，故伊等仍行抗违。且不但伊自违抗，而复暗勒贿赂，唆挑马怀信、马秀伦、酆式田等仗伊势亦皆不遵，因是小甲等受害无底。万出无奈，故复恳 恩示谕。伏思庙庭供职者不惟伊等，且有礼学并执事官等，皆不敢违例，而独伊等肆行抗违。倘不追究，而异日诸皆效尤，岂不将割草之差尽废。似此奸狡，不得不叩乞

仁明公爷恩准施行。

光緒十一年八月二十五日 稟

袁封衍聖公府批

查該庄向有撥出減租地六十畝，招佃領種，以供府中各差，歷久飭遵在案。今據小甲等稟稱，樂舞生鄴克固陵挑馬懷信、馬秀倫、鄴式田等抗不出夫采割林草，實屬借端生事。若謂選充樂舞生即不應出夫供差，豈不知夫從地出，既系樂舞生亦不應再行佃種官地。懷疑觀望，本應差傳懲責，因供事廟廷，從寬免究。仰候出示曉諭，毋再抗延干咎。切切。 九月十一日

直督咨为捐纳庙职仍应照章供办差徭并请立案免借滋讼事

〔光绪年间处理府庙属官讼案（一七）（三八六六）之二十二〕

太子太傅文华殿大学士兵部尚书兼都察院右都等关隘兼理粮御史总督直隶等处地方军务紫荆密云饷河道长庐盐政管巡抚事一等肃毅伯李为

咨明事。据曲周县知县张豫泰详称，光绪十八年七月初七日，准

衍圣公府咨开，曲周县人庙职赵步云等稟控该县户书牛落法等朦朧舞弊，怱惠本县将各庙职无故革除，请飭照旧注册。等因到本阁爵部堂。准此，查该县因何将该庙职等革除，据称应供差徭仍照旧章供办，不敢抗违。是否属实，应飭该县根查明确，据实具覆核办。除咨覆外，札县立即遵照办理，并蒙

袭封衍圣公府札同前由各等因到县。蒙此，查卑前县李令应培任内，因查卑县报捐

圣庙职衔一名有免差地三百亩者，不数年民户尽成衿户，差徭俱归无着，是以查明定章，飭将凡系庙职按照衿户纳差者，于册内一律除名。是除其供办差徭册内衿户之名，令其照齐民一律遵办，并非革其原捐庙职，亦非户兵两房之舞弊也。卑职于六月二十九日到任后，访闻该庙职

等名为顶戴荣身，实则为优免差徭起见。往往捐一庙职挂注衿户，不特将本身所有之地亩差徭全行优免，即亲友族邻之地亩尽为包抗。是捐纳有限之款项，可以荣身，得以优免无限之差徭。借词挟制，因之捐庙职者日多一日，免差徭者日甚一日，弊混丛生。且庙职之数目难稽，真伪难辨，其弊不可胜言。卑职正拟清查弊窠，适奉 衍圣公府札付等因。遵查光绪十三年，蒙前升任藩司松、前升任臬司陶刊发差徭定章告示，后开条内有其在

衍圣公府捐纳伴官等类，仍照向章不准免差。等因。是所为（谓）向章者即不准庙职免差之向章也。兹查 衍圣公府札付内赵步云等原呈所称，应供差徭情愿照旧遵办，不敢抗违等语，并令出示。等因。其所谓照旧者是否照卑前县李令以前将该庙职等同在衿户免差之旧章，抑系照奉发直隶差徭告示内，其在衍圣公府捐纳伴官等类仍照向章不准免差之旧章，既未明晰声叙，即属有意朦混。如准其出示，是又上其圈套，受其朦混矣。即此一端，则赵步云等之赴衍圣公府呈控危词耸听亦属显然。拟请将捐纳

圣庙一应职衔准其顶戴荣身，仍复遵照奉发直隶差徭定章，一概不准优免，以符定章而免弊混。并请咨请衍圣公府，凡遇捐纳

圣庙一应职官照内填注不准优免差徭字样，永远立案。俟奉批后再行出示晓谕各庙职等均照齐民一律供办差徭，庶几庙职违抗差徭之讼端可绝。是否可行，未便擅专，拟合遵札将根查明明确缘由，据实详请查核批示遵行。并咨请

衍圣公府照办。实为公便。再，查卑县差徭衿民各户难免无弊混情事，现既遵照定章整顿清查，如有抗违不遵者，应请按照例章从严，另文详办。合并声明。等情到本阁爵部堂。据此，

除批据详已悉，捐纳庙职光绪三年已有定章，不准免差。此项捐职只准顶戴荣身，其应出差徭，仍令照齐民一律派办。仰即出示晓谕遵照。如敢抗违。即行追取执照，详请咨革，一面按照例章惩办。并候咨明

衍圣公府，嗣后凡捐纳庙职照内，均填注不准优免差徭字样，永远立案，以免借词滋讼。仍录报司道府查照。缴。等因。印发外相应咨明

贵府烦请查照办理。施行。须至咨者。

右 咨

衍 圣 公 府

光緒十八年八月二十二日

咨直督为蒋学海并非专差请飭扣留严究以杜假冒事

〔光绪年间处理府庙属官讼案（一七）（三八六六）之四十〕

袭封衍圣公府为咨覆事。光绪十八年九月二十日，准贵阁爵督部堂咨开，以据布政使裕呈称，窃查光绪四年，准衍圣公府咨开，直省为

畿辅重地，差务纷繁，原不应概行优免。惟绅衿既准免派杂差，而四氏后裔虽经编审入籍，究与齐民有别，应请查核有案准免者仍予免派。此后不准再请，以示限制。蒙宪合以四氏后裔如系绅衿，准其照章优免本身杂差地亩，若非绅衿，仍应出差。分别咨覆并札司通行遵照。光绪十三年，又经前司会同臬司厘定章程，凡四年以前有案准免者仍予免派，详蒙宪台批准刊发告示。各在案。今据清苑县详称云云，须至札付者。等因。并附乾隆癸酉暨咸丰辛酉两次重修北蛮营村

文庙碑记两张，均由曲阜县人蒋学海投递到县。讯据供称，奉文到直投送，不知何事，等语。伏查历年成案并前奉札文、告示、章程与来文均不符合，究竟何所适从。拟合详请查核批示，并请转详咨明查覆。等情到司。据此，本司云云，请烦查照。等因到本爵。准此，当即飭查

档案，并无札行清苑县优免四氏后裔差徭之文，亦无专差蒋学海投递之案。此项札文，确系伪造。蒋学海，曲阜县查无其人，现在是否仍在清苑县，应请飭即扣留严讯追究。假印札文究系何人所造，蒋学海系何人所差，俟将假印追出，咨送销毁，从严究办，以儆不法而杜假冒。兹准前因，相应查明咨覆。为此，合咨

贵阁爵督部堂，烦请查照转飭核办。实为公便。施行。须至咨者。

右 咨

总督直隶爵阁部堂

光緒十八年十月初八日

圣公府行

三、公府仆役优免差徭

仆役王元进启为新买庄宅乞请发示以免扳扰事

〔清朝时期本府仆役请优免差徭（一五二四）之一〕

启

老爷位下，今买到单县李家楼庄宅一处，恐彼处乡保及无知之辈妄行扳扰，又兼无人照管，乞老爷批照发示。上启。

十一月初一日小的王元进叩

准

鸟枪手杜一鳌启为扳报里书乞发帖优免事

〔清朝时期本府仆役请优免差徭（一五二四）之二〕

具启人杜一鳌系鸟枪手

启为乞豁扳报事。切身在府答应，家居滕县，今被扳报里书。身执批优免手本告辨，貌若故纸，视为假笔，乞

老爷恩准，讨发玉帖，衔恩叩启。

顺治十四年十一月二十九日具

准发帖

仆役李惟康启为乞恩给示以免同行扳扰事

〔清朝时期本府仆役请优免差徭（一五二四）之三〕

具启人李惟康叩

启为讨示以免扳扰事。切康蒙恩给发官银，开设杂货纸铺，以备府用。恐同行扳扰，失误应供等货，俯（伏）乞

老爷天恩给示，以便答应。上

启

顺治十四年十二月三十日小的李惟康叩头

准示

铁匠宋玉珮启为乞恩作主豁免扳扰事

〔清朝时期本府仆役请优免差徭（一五二四）之五〕

具启人宋玉珮系泗水民现在府铁匠

启为乞恩作主豁免扳扰事。切身在府答应，趁食活生，在本县并无分厘地土。今被李士迪扳身协膺里长，承催钱粮，勒索帮贴银十两，扰害难堪，乞老爷讨发玉帖行县豁免，举家顶戴。叩启。

顺治十七年三月初十日叩启

准发帖

移曲阜县为扳派家人庙户佃户军需烦请优免事

〔清朝时期本府仆役请优免差徭（一五二四）之六〕

为循例吁恩移文以复旧典事。本年十一月二十五日，据家人陈维拯等稟称，切照府属员役，凡系在官，例有优免，一应杂差、临米、耗银等项概未派及。今忽被各社里书扳派军需，赴究府交纳。切思拯等身在府供事，何能越境奔走，循例优免安在。此例一开，后将扳累无已。为此，连名叩乞天恩详察旧例，俯准移文，庶旧典以复而扳扰可杜矣。又据生员高超等呈为移文优免以复旧典事。切照生籍佃户，叨列儒庠，优恤异典，已非一日。今蒙派养马军需，急公乐输，敢曰不前。但此例一开，有负国恩。况生不在编氓之籍，独不沾优恤之典。伏乞恩准移会，杂泛差徭循例优免。又据佃户人陈世忠等各社不齐稟为原例优免以广

皇仁以隆国典事。切照佃户人至于一切杂差，蒙恩除豁，历代优恤，已非一日，今蒙派养马、军需、临米、贴并、河夫等项，理应急公，但两处差役，一身难当。伏乞恩准移会，杂泛差徭悉恩豁免。各等情具稟到府。据此，为照本府族人隶在曲阜，凡一切杂差例概优免。至本府属员役及庙佃户人，俱系

欽撥人丁，不載民籍，從來一切雜差亦例行優免。今據控辦運軍需，或亦差繁所致，但恐撥派頻至，以供役廂佃之人難以重累，優免典例似宜永遵。既據陳維拯等具稟前來，擬合移文。為此，合用手本前去

貴縣，煩為查照旧例優免。施行。須至手本者。

康熙九年十一月二十五日

曲阜县手本为军需草豆出于地亩均非杂差事

〔清朝时期本府仆役请优免差徭（一五二四）之十一〕

兖州府曲阜县为循例吁恩移文以复旧典事。准

袭封衍圣公府手本前事，据家人陈维拯等稟称，切照府属员役，凡系在官，例有优免。一应杂差、临米、耗银等项，概未派及。今忽被各社里书扳派军需，赴兖府交纳。切思拯等身在府供事，何能越境奔走，循例优免安在。此例一开，后将扳累无已。为此，连名叩乞天恩详察旧例，俯准移文，庶旧典以复而扳扰可杜矣。又据生员高超等呈前事呈称，生籍佃户，叨列儒庠，优恤异典，已非一日。今蒙派养马军需，急公乐输，敢曰不前。但此例一开，有负国恩。况生不在编氓之籍，独不沾优恤之典。伏乞恩准移会，杂泛差徭循例优免。又据佃户人陈世忠等各社不齐稟为原例优免以广

皇仁以隆国典事。佃户人至于一切杂差，蒙 恩除豁，历代优恤，已非一日。今蒙派养马、军需、临米、贴并、河夫等项，理应急公。但两处差役，一身难当。伏乞恩准移会，杂泛差徭恩恩豁免。各等情具稟到府。据此，为照本府族人隶在曲阜，凡一切杂差例概优免。至本府

属员役及佃户人，俱系

钦拨人丁，不载民籍，从来一切差杂亦例行优免。今据控办军需，或亦差繁所致，但恐拨派频至，以供役佃佃之人难以重累，优免典例似宜永遵。既据陈维拯等具禀前来，拟合移文。合用手本前去贵县，烦为查照旧例优免施行。等因。准此，查得本县于未准之先，其一切杂泛□养马、河夫并〔未〕派于族属及员役户人，优恤久矣。至于临米、耗银乃奉

旨正项赋税，应随条编照地均输。军需、草豆出于地亩，或领价值，或兑正赋，均非杂差可比也。为此，合用手本前去

贵府，烦为知会施行。须至手本者。

右 用

手 本

康熙玖年拾贰月

日

移泗水县为请免户下郭振扬报充甲长事

〔清朝时期本府仆役请优免差徭（一五二四）之十八〕

袭封衍圣公府为恩恩移文优免事。据本爵府户下郭振扬呈前事呈称，窃身住泗水县滕家庄，在府伺候已经多年。今有泗水练地报身充膺甲长，身不能一身充膺两役。理合禀明，叩乞恩准移文优免施行。等情到本爵府。据此，查郭振扬系本爵府户下，向在府中供役，兹据前情，拟合备文移会。为此，合移

贵县烦为查照来文事理，希将郭振扬免其报充甲长。实为妥便。须至移者。

右 移

泗 水 县

乾隆四十三年十二月二十六日

圣公府 行

泗水县移为郭振扬规避县差重充府役应予除名事

〔清朝时期本府仆役请优免差徭（一五二四）之二十〕

署兖州府泗水县为愚恩移文优免事。乾隆四十四年九月十六日，准贵府移开，据本爵府门下郭振扬禀称，切身在府伺候有年，近因寄居泗水孔家庄，今有乡长阎大如报身充膺甲长，催办差务。身现在府内效力，不能兼顾。理合禀明，赐文移请另为报充。实为恩便。等情到本爵府。据此，查郭振扬现在本爵府内供役，未便再膺甲长。一身两役，诚难兼顾，致贻公务，相应备文移会。为此，合移贵县烦为查照来文事理，希将郭振扬免其充膺甲长，转饬另行报充，实为德便。等因到县。准此，为查郭振扬系去年十二月内承充甲长，如果伺候公府差遣，则彼时何难即行禀退，明系充膺甲长在先，乃规避差徭复投充公府。一身两役，本由自愿。今值

大差紧要，不便更易生手，另饬报充。再查敞县境内凡遇差务，每多借口公府当差，任意抗违。如事事移查，有烦案牍，若听其捏朦，临时推诿，必致迟误公务。拟合移会。为此，合移贵府烦为查照米移事理，希将郭振扬规避重充之名钩除，以示刁玩。并查明无论礼生、祀生、

庄头、佃户一切磨差人役，如现在住居散县境内者，逐一开列姓名、住址册籍赐发过县，以凭查核。自后凡有差使均免承办，以省彼此移查，以杜捏混，庶为公便。须至移会者。

右 移

袭 封 衍 圣 公 府

乾隆四十四年九月十八日移

移曲阜县为请免号派买办王国宁官猪事

〔清朝时期本府仆役请优免差徭（一五二四）之三十〕

袭封衍圣公纪录一次孔 为恳恩陈明号派官猪事。据本爵府买办王国宁禀前事禀称，切照今岁府内大厨房宋管事交身猪十四口，令身喂养，以备差用。又着身办买鸡鸭等项。现今曲县差役将猪号派十口催令领价。理合据实禀明。叩乞恩准移会。等情到本爵府。据此，恭照来岁承办

大差，本爵府所有应用猪口，恐届期难以猝办，预令该管事发价购买。查王国宁在本爵府办买鸡鸭等项，该管事分拨喂养猪十四口，以备差务急需。兹据前情，相应移会。为此，合移贵县烦为查照来文事理，希将本爵府分拨王国宁喂养之猪口，飭令该差免其号派，实为公便。须至移者。

右 移

曲 阜 县

乾隆五十四年十月二十九日

圣 公 府 行

曲阜县移为飭令王国宁买猪养肥以备祭祀事

〔清朝时期本府仆役请优免差徭（一五二四）之三十九〕

兖州府曲阜县为移覆事。本年十月二十九日，准

贵爵府移开前事，烦为查照来文事理，希将本爵府分拨王国宁喂养之猪口，飭令该差免其号派，实为公便。等因到县。准此，敝县查此项祭猪原系

圣庙应用，历届俱系酒店糖坊领价代养，临时按斤找补钱文，历届办理定有章程，并无号派之说。

今王国宁实系开设糖坊之家，已领大钱十二千买猪喂养，原非号其拨养猪口。恭照

辇辂经临，释奠重典，凡属臣民皆尚抒诚将事。王国宁开设糖坊、安乐利之休，何得有心抗违，

以循例领买之事捏称号派。稟请移免，拟合关覆。为此，合移

贵爵府飭令王国宁遵照章程买猪喂养肥大，以备祭用。临时仍按斤发价。实为公便。须至移者。

右 移

袭封衍圣公府

乾隆五十四年十一月初七日

移押

曲阜县移为王得增领银承办买卖街毋借故希求优免事

〔清朝时期本府仆役请优免差徭（一五二四）之三十二〕

兖州府曲阜县为移覆事。本年二月初九日，准

贵爵府移开前事，烦为查照来文事理，希将王得增名下摊派高粮、木柴等项均予优免，实为公便。计移缴原银一封。等因。准此，查王得增承领银封办理买卖街已经数月，今差临在即，忽以伴役求免，殊属取巧。且买卖街奉有明文，招商承办，并非派扰。邻封尚且一体协济，本境铺户何得希求优免。拟合移覆。为此，合移

贵爵府，希将王得增原领银封仍赐饬发，照数买备，不得有误。实为公便。须至移者。计移送

银一封

右 移

袭封衍圣公府

乾隆五十五年二月初十日

移 押

东房伴役鲍书元禀为乃兄报充练地请移会释放事

〔清朝时期本府仆役请优免差徭（一五二四）之三十五〕

具禀东房伴役鲍书元住邹县程庄叩禀

公爷台下，切小的同兄鲍书安均在东房伺候有年，忽有邹县练地薛方得报小的之兄鲍书安充膺湖上程庄练地，现经传案。理合禀明，叩乞

公爷恩准移会释放，感戴无既。上禀。

道光三年二月 日

碾磨房陈得仁稟为恳请移县豁免碾米差徭事

〔道光同治年间孔庙户人请优免差徭（一五〇四）之八〕

具稟碾磨房小的陈得仁

稟为再恳 鸿恩移县豁免差徭事。窃小的本系户下，又充膺

府内碾磨房有年。前于道光十三年，蒙 恩移县准免碾米差徭在案。今地方孙士伦复派小的碾米。伏思小的充膺 府内碾磨房，恭值 府内丧务临迳，日夜伺候不暇。且在 府当差员役及户佃人等例免差徭。兹被地方孙士伦迫催，不得不稟。伏乞

仁明公爷 恩准移会豁免施行，则感戴无既。

道光十五年八月 日稟

仆役刘传顺禀为新买住房请免租存案鈐用契约事

〔清朝时期本府仆役清优免差徭（一五二四）之三十六〕

具禀沐恩刘传顺

为承买住宅恳 恩免租存案鈐用契约事。切顺于本年十二月凭中说合买到已故纸匠孔继忻之妻孔宋氏住房一区，居住为业。但此房系府内房租，前蒙

府主恩免租钱在案。现在新政加税，恐县中官人垂涎扳拉出税，有负 府主之恩，遂开县人
之利。顺伏思再四，不得不具禀，叩乞

仁明公爷 恩准免租存案，鈐用契约，以免后患，则感戴无既矣。

宣统三年十二月 日

衍圣公批 如请，准存案。 十二月初九日

四、船户优免差徭

独山屯屯户赵发梅等稟为地保混派车船夫役恳移优免事

〔乾隆年间孔庙各屯厂官庄佃户请优免差徭（一五〇八）之十三〕

具稟独山屯屯户赵发梅
刘标等

稟为恳恩移知旧例已免科派差徭事。切独山屯屯户自

钦拨以来，有司一切差徭暨行优免，因办理庙廷大丁、粟鱼、果品以及祀银耳。故于乾隆十三年，

复蒙抚台大老爷阿飭行州县，凡属有司差徭不许滥派屯户。各州县俱已出具遵依遵行在案。

不料近因江南河工，鱼台县地保差役混派身等车船并挖河夫役。切思身等既系屯户，凡备办祭品、祀银自不敢抗违。今合屯被鱼台县派及船只河夫，身亦不敢抗。但一身二役，实难承当。顾此失彼，以至于罪。身等无奈，不得不据实陈稟。恳乞

公爷转移鱼台县查照旧例，免派身等差徭船只，庶祀事得以办理而不致有误矣。上禀。

乾隆十八年十一月 日具禀

郭朝如 朱克书 赵梅书 刘发 张梁 张园

移徐州府分府为拘走公府单县祀田粮船烦为查照事

〔乾隆年间府庙属官请优免差徭（三）（一四八二）之十一〕

袭封衍圣公府为禀明事。据单县孔家集本爵府船户石文礼禀前事禀称，切身领到公府船二只，坐落孔家集，节年运送祀田粮石柴薪等项。于本年十月间，被徐州三府太爷将船拿去，以备差使。又将身手票取去，声言票系假的。身不得不据实禀明，伏乞电鉴。等情到本爵府。据此，查单县孔家集地方，有本爵府祀田坐落该处。每年收获籽粒，缘陆路运送维艰，是以设船二只，以备装载，发交船户石文礼收管，给有印票。兹据该船户具禀前情，相应备文知照。为此，合移

贵分府烦为查照施行。须至移者。

右 移

江南徐州府分府

乾隆四十一年 月二十九日

移鱼台县为优免独山屯屯户摊派船只事

〔乾隆年间孔庙各屯厂官庄佃户请优免差徭（六）（一五二二）之一〕

袭封衍圣公府为移请循例优免事。据独山屯屯官刘大显、赵荷崇稟称，切照独山屯坐落鱼台县，为

钦拨

至圣庙祭田五屯之一，以供烝尝，历办大差，例免徭役，其来已久。兹于乾隆四十四年十二月内，突有县役带同埠头胡元向职等言称备办大差，摊派船只。职等当即明白剖切告以旧例去后。詎该役等竟入湖泊封号屯船四十余只，乃复声言并非实用船许多，只须折钱贴纳，即免伺候等语。现在催办甚急，刻不容缓。理合具稟，恳请转移循例优免。等情到本爵府。据此，查

圣庙

钦拨祭田坐落充、曹、泰三府十余州县，历办大差，凡屯佃各户一切杂项差徭均得循例优免。即现在

圣驾南幸，

查籍经由东省各地方，查照往例，并未扳及屯佃各户。伏途

贵县久莅东土，屡经承办大差，前任郛城屯民莫不感恩感德。今独山屯户事同一例。兹据该屯官刘大显、赵荷崇具禀前来，相应备文转移。为此，合移

贵县烦为查照来文事理，希将独山屯户派办船只俯赐循例优免。在该处屯民固感洪慈，而本爵府亦佩德匪浅矣。须至移者。

右 移

鱼 台 县

乾隆四十五年二月初九日

圣公府行

独山屯屯官刘大显等稟为差役号船派夫恳恩移请优免事

〔乾隆年间孔庙各屯厂官庄佃户请优免差徭（五）（一五一一）之三三十六〕

具稟独山屯屯官

刘大显
赵荷崇

稟为稟明恩赐转请移会优免事。据独山屯屯户刘士学、张大升等稟称，切身等佃种祀田，一切徭役向邀优免。今次办理大差，已曾按照地亩派捐夫价。嗣因差役扳扰，号船派夫，当蒙

公爷移文本县太老爷援例优免在案。迨有南靠地方练地派身等出夫，又东靠东单地方练地亦派身等出夫。但身等穷佃，本屯已有应出差使，再出县差，已属一身两役。今两靠地方又复重派，是一身三役。身等穷佃，何能支持。为此，恳恩移文本县太老爷援例优免，实为恩便。等情到职。理合据情转稟，伏乞

爵宪恩准移会施行。须至稟者。

乾隆四十五年四月 日

独山屯官稟为印烙屯船年久难认陈明利弊事

〔嘉庆年间孔庙各屯厂官庄佃户请优免差徭（四）（一五一八）之二五〕

独山屯屯官刘瀛敬请
赵连润

公爷万福金安。稟者蒙谕同候

院道宪委东阿县正堂赴独山屯印烙屯船，卑职即遵照办理。又蒙抄发藩宪准

公府咨文移复文稿云云，当经委员驾临之时，亲将藩宪复文呈送。委员亲阅。委员亦未云如何，止云委我烙印我即烙印就是了。职亦不敢问。经于四月二十九日、五月初二日，依次将独山庄、赵家庄船烙完，止遗独山出外逃荒未归者二只未经印烙，赵家庄打鱼台县差未回者四只，送祭鱼未归者一只未经印烙。蒙委员面谕职等将遗漏船只具稟东阿县正堂，俟屯船回时再稟鱼台太爷印烙。卑职不敢不备细稟明。伏思印烙火印长不满三四寸许，若遇雨激浪吹日晒，三二年即模糊难认矣。且物不能久而不弊，若船弊坏再造，又孰能再请。上宪单烙印记。且委员临行吩咐，也俱画红头黑尾，岂不好看。屯民此时亦不知烙印足凭乎？红头黑

尾足凭乎？亦不知鱼台县是以烙印为凭，红头黑尾为凭。当时斯二者皆无足虑，恐经年之后，风雨浪吹，印即不真，即有红头黑尾，恐埠头视为儿戏矣。卑职不得不将将来利弊陈明，伏乞

仁明公爷电阅施行。

嘉庆二十二年五月

日申

鱼台县移为印烙屯户船只请烦查照事

〔嘉庆年间孔庙各屯厂官庄佃户请优免差徭（四）（一五一八）之二十七〕

移文

济宁直隶州鱼台县为移会事。案查敞县稟请印烙屯户船只一案，前准贵爵府造册先后移送，当经会同委员逐户点验烙印开摺会衔通稟在案。兹准东阿县萨令关会，接奉抚部院批，据稟已悉，仰仍呈明衍圣公。毋迟。缴。图摺存。等因。录批关会前来，拟合抄录稟稿移会。为此，合移贵爵府，请烦查照施行。须至移者。

计粘抄稟稿壹纸

右 移

袭封衍圣公府

嘉庆貳拾貳年陆月初陆日移

前事

东阿县知县萨
鱼台县知县潘 谨稟

大人阁下，敬稟者窃卑职接奉

宪札 委赴鱼台会同该县即将屯户船只姓名编号印烙，务须认真办理，不得借端滋扰，仍
济东道宪札 飭

将遵办缘由及印烙过各船号次数目开摺具稟。等因。遵即订期关会，卑职备文移会

公府，传齐屯户船只去后。卑职即于四月十七日驰抵鱼邑，尚未接到

公府回文。复经卑职专差备文移催，始于二十四、二十八等日将船户姓名分别南牌中牌，编
列号次，先后造册移送前来。卑职等前赴河干，逐户点验。查南牌船户共一百七十一号，内
有郑廷太、张家修、刘悦、赵茂珠四户船只先期封雇临清，□剥赵朝宾一户船只，因赴
公府送鱼未回，中牌船户共一百三十七号，内有刘秉庄、刘允和二户船只据屯官刘瀛、赵连
润稟称，业已贸易外出，容俟回日另行补烙外，所有南牌船户赵潭等一百六十六号，中牌船
户张兴举等一百三十五号，均在船头左边印烙满洲屯字为记，易于办（辨）认，似可无庸再行
分别。如

公府必须用红头黑尾，亦当听其自便。理合将印烙过屯船号次并烙印字模绘图开摺稟呈

慈鉴。恭清

福安。除送稟

抚宪外，卑职谨稟。

稟会同印烙过屯户船只由
稟抚宪 藩宪 济东道 运河道

独山屯民船户周广佑禀为地保夺船抢锚恳请恩准移追事

〔嘉庆年间孔庙各屯厂官庄佃户请优免差徭（四）（一五一八）之三四〕

具禀独山赵家庄屯民船户周广佑第七十一号

禀为假差抢铤（锚）恳恩移追事。切身于去年九月十五日在本湖东岸捕鱼，有滕县杨庄地保周居、杨高兴等到身船上而称有差拿船。不容分说，逼身将船撑至杨庄，着身守候，船上铁铤（锚）伊等拿去。延至十月中旬，不见派身何差，铁铤（锚）亦未送还。湖水冻结，身始还家。及今春，身至杨庄取船，寻伊等要铤（锚）数次，皆不见面。身思船以铤为主，无铤（锚）则船不能使。身以船为命，抢铤（锚）即是杀身。似此假名差事，强抢铁铤（锚），情实难甘，叩乞

仁明公爷恩准移追施行。

嘉庆二十三年正月 日

鱼台县移为查办屯船编号以免封雇混淆事

〔嘉庆年间孔庙各屯厂官庄佃户请优免差徭（四）（一五一八）之十八〕

济宁直隶州鱼台县为札谕事。蒙

巡抚部院陈 批，据该 禀请委员印烙屯户船只缘由，蒙批，据送屯户船数清摺随禀抄发，仰东道作速委员前赴该处，按照摺内船户姓名，编列号次，印烙为记，以免封雇时致有混淆。仍谕令委员不得借端滋扰。此缴。禀抄发。等因。蒙此，除委东阿县萨令就近前赴该处，按照摺开屯户船只、姓名、编号印烙外，合行札飭。札到该县，即便遵照会同委员妥为经理，迅速编号印烙开摺禀报。并将派调协济剥船赶紧封雇齐全，解赴临清听候验收拨用。均毋违误，速速。等因到县。蒙此，拟合备文移会。为此，合移 贵爵府请烦查照文内事理，希将有船各屯户逐一传齐，听候委员查看印烙。望速切速。须至 移者。

右 移

袞封衍圣公府

嘉庆二十二年四月初九日移

前事

独山屯赵家庄屯官申为遵飭查办屯船恳请移会备案事

〔嘉庆年间孔庙各屯厂官庄佃户请优免差徭（四）（一五一八）之十九〕

具详独山屯赵家庄屯官赵连润

详为遵飭查办屯船恳请移会备案事。本月十二日，蒙

爵宪札飭将屯户船只照四氏学三界湾屯船之例，红头黑尾，编号办理，易于辨认。职已将各船只遵照办理，造册呈送。惟有孔传勤屯船二只，自去年十二月二十六日拿去，至今未放。

郑廷太、赵茂株、刘悦、张家修船四只，虽已编号挂牌，奈该埠头硬行抢去，派赴临清。理合据实说明。伏乞

爵宪恩准移送船册备案，并将孔传勤、郑廷太等船六只追还，到日再行办理。实为恩便。须至详者。

计详送南牌屯船册六本

右 申

袭封衍圣公府

嘉庆贰拾贰年肆月 日详

济宁州申为公府屯船例免差徭行户居民不得揽载酿事

〔孔庙独山屯祀田湖船管理（四八三二）之十〕

署济宁直隶州正堂加五级纪录十次赵 为申明示禁事。案查 衍圣公府各屯户置有船只入湖捕鱼，向蒙

恩例蠲免差徭，屡经出示晓諭在案。诚恐日久玩生，差役借端讹扣，民船假称府户，致酿讼端。

除移会 公府諭各屯户将船头标明

公府字样，给予腰牌，飭各屯官造具各屯船户姓名、船式、大小、只数移州查核，以示分别，以隆

恩礼外，合行出示晓諭。自示之后，遇有 公府屯户鱼船在湖内者，差役埠头不得借端妄扣，行户居民不得向该船揽载酿事。倘不遵諭，从重枷示河干，满日重责，决不姑贷。毋违。特示。

一 立
示 稿

道光二年八月 日

屯官赵连润禀为船户张在意等捏助盘费借机勒索恳请讯追事

〔孔庙独山屯祀田湖船管理（四八三二）之十二〕

具禀屯官赵连润叩禀

公爷案下，敬禀者职屯船户等因州役县差叠行讹诈，公愚爵宪移文州主，出示严禁，修碑书谕，永垂不朽。职在曲守候，自七月至今半载有余，所用盘费皆职自出，资财从不用屯户分文。讵有张在意、赵廷顺指职名目着船户每号出京钱一百文，共出京钱一百余千文，假捏助职盘费，究系伊二人分肥。职不惟未见分文，亦未见伊二人之面。似此借端诈骗，污职清名，理合禀明，伏乞

仁明公爷恩准差拘讯追施行。上禀。

道光二年十一月 日

东抚咨为奉旨封雇船只屯户毋得影射包揽事

〔道光年间孔庙各屯厂官庄佃户请优免差徭（二）（一五二〇）之八〕

兵部尚书兼都察院右副都御史总督巡抚山东等处地方管理营田兼提督衔节制全省军务世袭一等侯琦 为

咨明事。窃照本爵部堂于道光五年四月初四日，准兵部火票递到

军机大臣字寄河南巡抚程 山东巡抚琦 道光五年四月初二日，奉

上谕，据孙 等奏，河口一带，日见淤垫。本年节候较早，恐黄水涨发，未渡军船为数正多，计算时日已迟，盘坝接运需用船只较多，应行赶早雇备。除将截留江广代造直隶剥船并江省原设官剥尽数选用外，其余均须雇用民船。查黄河内装载货物，惟豫省之西河船最大，现在黄河上游所在均有。除在江省者由魏元煜飭属就近封雇外，请于豫省雇西河船四、五百只。山东境沿河曹、单二邑亦有此船，应尽数雇用。等语。着程 琦 接奉此旨，即将各该省西河船只赶紧尽数封雇，委员押解，务于四月内解至江省，以资接运，无得迟误。又山东运河内南阳、夏镇以及台庄等处多有贩运豆麦之船，每船可装米数百石，着琦 将此项船只一并雇

备，解往江省应用。所有前项商船该抚等雇定后，应如何酌给运脚、口粮之处，已谕知孙等会筹妥议，即行知照各该抚可也。将此由四月里各谕令知之。钦此。遵

旨寄信前来，等因到本爵部堂。承准此业经恭录檄行司道，并飞飭鱼台等县在于各管境内，赶紧尽数封雇，星速禀报，以便委员陆续解江备用及委员前往协办在案。惟查嘉庆二十二年，因封雇剥船，经

贵公府以系屯户渔船例免差徭咨会释放，并严飭鱼台县查照屯册免其封雇。等因。当经 陈前院飭令济东道委员前赴该县，按照摺内船户姓名编列号次印烙为记。现在东省钦奉 谕旨，封雇船只，原为漕粮系

天庾正供，刻不可缓，尤非从前剥船可比。在本爵部堂固难料该县必不封用屯船，则

贵公府即不能保屯官必不渔利影射包揽。况打鱼船只较少（小），商贾揽载船只较大，此时按前送清摺稽查，则船不能言，又安保不以商载大船朦混，势须特行参办，殊费周折。查前院当日既将屯户船只按船印烙，惟有查照印烙为凭。除批令该县照办外，拟合咨会。为此，合咨

贵公府烦请查照，希即严飭各屯户，务各遵照驾用前册印烙号次船只，毋得将商民大船包揽顶冒屯船。倘恃符包揽，借端渔利，本爵部堂定即据实

奏参，不能如从前一味含混也。仍祈见覆施行。须至咨者。

右 咨

袭封衍圣公府

道光五年四月十七日

札独山屯屯官为东抚来咨封雇船只屯户毋得包揽顶替事

〔道光年间孔庙各屯厂官庄佃户请优免差徭（二）（一五二〇）之十〕

札独山屯屯官^{刘瀛}赵连润知悉，道光五年四月二十日，准

巡抚爵部堂咨开，希即严飭各屯户，务各遵照驾用前册印烙号次船只，毋得将商民大船包揽顶冒屯船。倘恃符包揽，借端渔利，本爵部堂定即据实参

奏，不能如从前一味含混也。等因到本爵府。准此，合行札飭。为此，札仰该屯官等，札到遵照札内事理，务须严飭各屯户遵用前册印烙船只，毋得影射包揽顶冒，以及借端滋事情弊。倘敢不遵，一经查出，定将该屯户提案究办。该屯官等尚其秉公查办，毋得玩忽含混，致干革究。凛之慎之。毋忽。此札。

计粘单一纸

道光五年四月二十日

圣 公 府 行

票役为查明南屯船户封印以杜影射事

〔道光年间孔庙各屯厂官庄佃户请优免差徭（二）（一五二〇）之二十一〕

袭封衍圣公府为查明粘封事。据独山屯屯官赵相臣禀称，南屯船户印烙船只迄今涂糊，腰牌迷失，买卖船户借此影射，恳赏印封以备查考。等情前来，合行查明粘封。为此，仰役执封前去，着该屯官即将南牌有船各屯户编列号次，查明印烙给封。毋得徇情含混，以致影射顶冒，如违查究。速速。须票。

计发

印封一百七十一张

道光九年十二月十一日

圣公府 行

諭伴官酆化邦为查驗独山屯船只事

〔道光年间孔庙各屯厂官庄佃户请优免差徭（三）（一五二一）之三十二〕

諭伴官酆化邦知悉，查独山屯南北两牌旧有烙印屯船只编列号次，迄今多年未经查驗，恐日久弊生，难免无影射情事。除札飭该屯官查明造册并出示晓諭外，合行諭知。为此，諭仰该员前往，遵即会同屯官查明造具清册呈驗后，再行发给印封，以凭遵照。毋违。此諭。

道光二十四年十一月十七日

圣公府

諭屯戶趙大鵬等為發給獨山屯船印封事

〔道光年間孔廟各屯廠官庄佃戶請優免差徭（三）（一五二一）之三十四〕

諭該屯屯戶監生趙大鵬、趙唐等知悉，照得獨山屯舊有采辦芡菱蕪魚船支一百余號，凡有司差徭向邀優免。恐日久弊生，以民船冒充屯船，規避影射，深為未便。前已委員查明各船戶船只大小、姓名、住址，經該屯官造具花名印冊申送在案。合行諭知。為此，諭仰該生等即傳諭各船戶頭，將在冊各船戶傳齊，听候委員前往發給印封，以杜影射。如有臨期不到者，立即扣除。毋違。此諭。

道光二十五年三月十六日

聖 公 府 行